

LES
PASSE TEMS
DE IAN ANTOINE

DE B A I F.

A

MONSEIGNEUR
LE GRAND PRIEUR.



A PARIS,

Pour Lucas Breyer Marchant Libraire te-
nant saboutique au second pilier de
la grand' salle du Palais.

M. D. LXXIII.

AVEC PRIVILEGE DV ROY.

Handwritten mark

100



A MONSEIGNEUR
LE GRAND PRIEUR.



ENRY, ô de Royale plante,
Amoureuse & genereuse ante,
Sion des Princes adoué,
Si desirez qu'on vous conoisse,
D'un renom qui à jamais croisse,
Des siecles a venir loué:

C'est à vous, qui dès votre enfance
Des lettres auez conoissance,
Au giron des Muses instruit,
D'elles le protecteur vous rendre,
Leur auancement entreprendre
Contre qui leur honneur détruit.
N'est-ce pas vne grand' vergogne,
Qui notre âge peruers témogne,
Qu'home se trouue tant osé,
Que desur le sçauoir remettre
Les forfaits que voyons commettre,
En conseil l'ayant proposé.
Et pour ce veut qu'on s'achemine
Par tous moyens à sa ruine,

En luy deniant tout suport:
Et s'est mis en sa fantaisie,
Que de là sourdoit l'heresie
De tous les autres maux l'aport.
Mais je dy moy que l'ignorance
S'accompagne d'outrecuidance
Pour faire ce monstre d'erreur:
Et non pas du sçauoir l'vsage,
Qui l'home rend modeste & sage,
Non enclin à telle fureur.
L'home bien instruit de la Muse,
Gastant son esprit ne l'amuse
Contre les secrets de la foy.
Car non rebelle en toute humbleesse,
Le chemin des Peres ne laisse,
Sous vn Dieu, vn Roy, vne Loy.
Ce fut Dieu le tresadmirable,
Qui tresbenin & secourable
La parolle aux hommes donna.
Ils se font tous diuins par elle:
Sans elle la race mortelle
Guiere plus que la beste n'ha.
Par la parolle la pensee
Entre les hommes dispensee
Se communique de leur voix.
De là les citez s'établirent:
De là les Princes ils élirent:
De là s'arretterent i's loix.
Dieu depuis pour rendre assuree
Auecque plus longue duree

De la parole le beau fait,
 A fin qu'au loin se püst transmettre,
 Donna l'usage de la letre,
 Marque de ce qu'on dit ou fait.
 Par elle les choses sacrees
 En leur entier sont demourees:
 Par elle les loix se tiendront.
 Et par elle aux âges qui viuent
 Les faits des non viuans reuiuent,
 Pour le bien de ceux qui viendront.
 Par elle les arts necessaires,
 Aux humains & diuins affaires,
 Conseruez ornent la cité.
 Par elle les belles emprises,
 Et les inuentions exquisés,
 Viennent à la posterité.
 Par elle le cours de l'annee,
 Ainsi qu'elle est bien ordonnee,
 Par heures par jours & par mois,
 Va réglé pour marquer les âges:
 Pour t'assigner tes labourages
 A faire tout comme tu dois.
 De Dieu le present admirable,
 Par l'homme, sans luy miserable,
 Ne se jette pas méprisé:
 Mais viue sous la main Royale,
 Maintins de faueur liberale,
 Plus que jamais autorisé.
 A l'exemple de vos bons Princes,
 Vous les Nobles de leurs prouinces,

Les bonnes lettres caressez.
Et comme trop soigneux vous êtes
D'exercer le cors, ainsi fêtes
Que vos esprits soyent exercer.
N'est-ce pas à nous grande honte,
Que nous faisons tant peu de conte
De ce qu'avons de plus divin?
De ce parquoy nous pauvres hommes,
Hommes, non bestes brutes, sommes?
De quoy Dieu nous fut si benin?
Du cors nous avons tant de cure
Pour le netir de toute ordure,
Pour le vetir pompeusement,
Pour l'endurcir à mille peines,
De combas & de chasses vaines,
Pour le reposer richement!
Mais nous laissons moisir nos ames,
Qui des cors doiuent estre dames,
Mises des cors à labandon:
Sans les polir de leur rudesse:
Sans les fasonner d'une adresse
Qui les conforme à la raison.
Des bonnes lettres la doctrine
L'esprit defriche, & déracine
Les vices mauuais arrachez.
Et le prepare à la semance
Qu'il resoit, qui porte abondance
De fruits en leur tems recherchez.
Mais, ó bonne Filosofie,
Tant s'en faut que lon s'étudie
Pour tes bienfaits de t'honorer.

Mesme la plus part te méprisent:
Beaucoup de toy malins médifent
O sans malheureux t'aborrer.
Tu n'es qu'un nom de moquerie,
L'exercice de janglerie,
Entre ceux qui s'enflent sous toy.
Nul te suit pour estre plus sage:
Mais te tourne à son avantage
Pour mieux faire fraude à la loy.
De l'ignorance la manie,
Ou la bestise te manie,
Pour s'en targuer en son erreur.
Si l'un dans vne nuit obscure
Envelope la verité pure,
L'autre s'en arme en sa fureur.
Et qui te suit pour bonne escorte
De sa vie ? ou pour rendre acorte
Son ame au choix de la vertu ?
Nul ne sçait le meilleur élire,
Nul ne sçait éviter le pire,
Qui suit le grand chemin batu
De l'ignorance: qui méprise
L'honneur, le forfait autorise,
Meconnoist la diuinité:
La pieté vraye renuerse:
Loix & droiture bouleuerse:
Abarbarist l'humanité.
La terre onques ne fut couverte
De plus de monstres, à la perte
De nostre chétif genre humain.
Jamais ne fut plus souhetable

Vn bon Hercules indomtable,
Qui deployast sa forte main.
Entreprenez, ó sang de France,
La guerre contre l'ignorance,
La grande peste des mortels.
Plantez d'honneur les exercices:
Extirpez la race des vices:
Ainsi meritez des autels.





P R E M I E R L I V R E

D E S P A S S E T E M S D E

I A N A N T O I N E D E B A I R :

A S A M U S E .



FIN que les saucices,
Les boudins, les épices,
Les capres, les pruneaux,
D'accoustremens nouveaux
N'ayent faite, sus Muse,
Qu'on me gaste, qu'on m'vse



Mille & mille milliers
De rames de papiers,
Quoy que dire lon t'ose,
Que rien je ne compose
En mon oisif séjour,
Qui vaille voir le jour.
Quoy que les vieux seueres
Contrefaisans les peres,
Ne veuillent approuver
Ce que je puis trouver.
Pér, Muse, toute honte,
Sus, Muse, ne tien conte,
Des propos assotteꝝ
De ces vieux radoteꝝ.

Te donnent-ils salaire,
 Que tu doiues leur plaire?
 C'est assez, tu te plais
 En cela que tu fais:
 Oubly leur moquerie,
 De douce tromperie
 En tes vers te flatant,
 Que tu vas regratant
 Sur tes papiers, aux heures
 Que le moins tu labeures,
 Donnant à ce plaisir
 Le moins de ton loisir:
 Puis qu'il te plaist composé
 Tous les jours quelque chose,
 Gaste force papiers:
 Et si ces beaux gorriers
 S'en fachent, n'aye crainte
 De répondre à leur plainte,
 Puis qu'ils plaignent mon bien
 Qui ne leur couste rien:
 Que mien est le dommage,
 Ains mon grand auantage:
 Car le tems qu'il faudroit
 Passer en autre endroit,
 Ou tenant la raquette,
 Ou jouant la reinette,
 Ou les dets maniant,
 Et là Dieu reniant,
 Sans que rien pis ie face,
 A ce jeu je le passe,
 Et ne pér que le tems
 En ces doux passetems.

A V R O Y

ESTRENE.

1 5 7 0.

SIRE, comme les Roys sont les mignons des Dieux,
 Aussi sont des grans Roys les tous-divins Poëtes,
 Qui du vouloir divin sont les saints interpretes,
 Et qui chantent l'honneur des Roys victorieux.
 Si des Dieux gardiens des Princes glorieux,
 Implorez la faueur vous grãd R O Y que vous estes:
 Moy Poëte petit faisant comme vous faites,
 L'implore de mon R O Y le secours gracieux.
 Ainsi vole tousiours deuant vous la victoire,
 Les rebelles domtant : ainsi l'heureuse gloire
 De vous & de vos Chefs couronne les beaux faits.
 O mon Prince, ô mon R O Y, ne rejettez arriere
 Cët extreme recours de mon humble priere:
 Ainsi les Dieux amis vous donnent vos souhaits.

 TABLEAU DE LA
 ROYNE MERE.

QUEL tableau voy-je icy plein de diuinité?
 Passãt, dy que tu vois tout l'honneur de nostre âge.
 Comment ? ie ne l'enten, si ne dis dauantage.
 Tu vois toutes vertus sous peinte humanité.
 Quelle Dame est-ce icy ? C'est vne magesté.
 Pourquoi en dueil piteux ? d'vne Royne en venudage.

I . L I V R E

Qui sont ces quatre à part chacune en son image?
 C'est Esperance, & Foy, Iustice, & Charité.
 Qui sont les sept auprès? sont les arts liberaux,
 Qu'avecque les Vertus cette Dame rassemble
 En sauueté cheZ soy par ce tems plein de maux.
 Donc rapporte, estranger, que le peintre voulant
 Monstrer l'estat où sont arts & vertus ensemble,
 A peint cette grand' Royne en cet habit dolent.

E P I T A P H E D E B V E I L .

ARRESTE toy, Passant, ly ces vers, & differe,
 Bien que tu sois pressé, pour vn peu ton affaire:
 Le loyer n'est petit si tu t'en vas plus sage,
 Apprenant sans danger d'vn autre le dommage.
 Celuy BVEIL je suis, qui ay remply la France
 Du renom honorable acquis par ma vaillance:
 Ayant d'vn braue cœur fait suffisante prouue
 De moy par tous endroits où le vaillant se treuue.
 Vertu d'aupres de moy ne s'est point éloignée
 De la faueur de Mars tousiours accompagnée,
 Tant que durant la guerre aux perilleux alarms,
 Méprisant les hazards j'ay fait mettier des armes.
 Mais au tems de la paix en querelle priuée,
 Moy celuy dont la vie auoit esté sauuée
 De cent mortels dangers, las j'ay perdu la vie,
 Et d'vn jeune guerrier le fer me l'a rauie
 Sous qui Mars fut caché: car il prit sa figure
 En faueur de Venus pour venger son injure.
 La cruelle Venus se sentant outragée
 De quelques mots legiers, voulut estre vengée:

*Importuna son Mars, & n'ut iamais de cesse
 Jusqu' à tant qu'elle fut de son vouloir maistresse,
 Et qu'il prit (bien que tard) contre moy sa querelle,
 Pour faire à grand regret vne vengeance telle.*

*Mars ainsi me laissa : mais Vertu non volage
 N'a iamais delaisé mon assuré courage,
 Qui autant qu'en la vie apres la mort encore
 D'un immortal honneur mes faits d'armes decore.*

*Va: raporte, Passant: Mal certaine est la vie
 De l'homme qui mortel en sa force se fie:
 Le foible fait souuent que le plus vaillant meure:
 Le seul fruit de vertu apres la mort demeure.*

A M O N S I E V R D E
 V I L L E R O Y S E C R E -
 T A I R E D' E S T A T.

C O M M E sur le coupeau d'une grand' roche dure
 Vn pin enraciné demeure verdoyant,
 Soit que le chaud soleil de l'esté flamboyant
 Ramene la chaleur, ou l'uyer la froidure,
 Toustours planté debout, d'un fueillage qui dure,
 Garde le bel honneur: & toustours s'égayant
 D'un fruit en ses rameaux sans cesse pomoyant,
 Parmy aspres cailloux repousse tout iniure.
 Ainsin, ó V I L L E R O Y, planté non ébranlable
 Aux plus hautes grandeurs de la peruerse Court,
 Où les vices ont cours, te maintiens ferme & stable:
 Et maintiens la vertu, qui seule te commande:
 Et recherchant l'honneur, où fraude regne & court,
 Plus le vice y est grand, plus ta gloire en est grande.

I. LIVRE
DV PRINTEM S.

LA froidure paresseuse
De l'uyer a fait son tems:
Voicy la saison joyeuse
Du deliceux Printems.
La terre est d'herbes ornee:
L'herbe de fleuretes l'est:
La fucillure retournee
Fait ombre dans la forest.
De grand matin la pucelle
Va deuancer la chaleur,
Pour de la rose nouvelle
Cueillir l'odorante fleur.
Pour auoir meilleure grace,
Soit qu'elle en pare son sein,
Soit que present elle en face
A son amy de sa main.
Qui de sa main l'ayant uë,
Pour souuenance d'amour,
Ne la perdra point de uë,
La baisant cent fois le jour.
Mais oyez dans le bocage
Le flageolet du berger,
Qui agace le ramage
Du rosignol bocager.
Voyez l'onde clere & pure
se cresser dans les ruisseaux:
Dedans voyez la verdure
De ces voisins arbrisseaux.
La mer est calme & bonasse:
Le ciel est serain & cler:

La nef jusque aux Indes passe:
Vn bon vent la fait voler.

Les menageres auétes
Font çà & là vn doux bruit,
Voletant par les fleuretes
Pour cueillir ce qui leur duit.

En leur ruche elles amassent
Des meilleures fleurs la fleur,
C'est à fin qu'elles en facent
Du miel la douce liqueur.

Tout resonne des voix nettes
De toutes races d'oyseaux,
Par les chams des alouetes,
Des cygnes dessus les eaux.

Aux maisons les arondelles,
Les rosignols dans les boys,
En gayer chansons nouvelles
Exercent leurs belles voix.

Doncques la douleur & l'aise
De l'amour ie chanteray,
Comme sa flame ou mauuaise
Ou bonne ie sentiray.

Et si le chanter m'agree,
N'est-ce pas avec raison,
Puis qu'ainsi tout se recree
Avec la gayer saison?

DE SILE.

SILE me veut pour son mary,
Et n'y a rien qu'elle ne face:
Mais moy i'en seroy bien marry.

Quelque contract qu'elle me passe.
 Ainsi qu'elle m'en presse tant:
 Tu me donneras, ce luy dy-ie,
 Cinquante mille écus contant,
 Sans qu'à les rendre ie m'oblige.
 Et pour la premiere nuitee.
 Ne gouteras point le deduit,
 Mais tu t'en passeras couchee
 Seule à part dans vn autre lit.
 A ton nés, si ie le demande,
 J'auray ma garce entre mes bras:
 Sans gronder, si ie le commande,
 Ta seruante m'enuoyeras.
 Et le plus souuent à ta vuë,
 Pour caresser me jecteray
 Desur la premiere venuë:
 Et haut & bas la tasteray.
 Quand nous irons en compagnie
 Si loing l'vn de l'autre serons,
 (Tant fois-tu parce & iolie,)
 Que iamais ne nous toucherons.
 De me baisser point de nouvelle,
 Garde toy de t'y presenter:
 Si d'auenture ie t'appelle,
 Ta leçon ie te veu chanter.
 Garde toy d'estre si ofee,
 Si ma femme vne fois tu es,
 Me baisser en femme épousée:
 Car ie le trouueroy mauuais.
 Ne me baise comme ton frere,
 Il y auroit trop d'apetit:

Mais comme quelque bonne mere
 Baiferoit son fils par aquit.
 Si tu peux supporter en somme,
 Tout cecy sans rien refuser,
 Touche là, tu as trouué l'homme
 Qui est contant de t'exposer.

A MONSEIGNEUR
 DE LANSAC.

MONseigneur j'ay par vous plus d'une fois tenué
 La fortune, & jamais ne m'a daigné sourire.
 Je disoye à par moy : Qui nous peut écondire?
 Le ciel guide celuy par qui suis présenté.
 Or (graces au bon Dieu) ie me suis exemté
 Jusqu'icy de peril : mais si faut le vray dire,
 Deslors ie preuoyoy fortune a venir pire.
 Las ! elle est auenuë, & j'en suis tourmenté.
 Possible le ciel lors de maligne influence
 Rompoit nostre entreprise : Ou DIEU, qui tout preuoit,
 Ny pauvre ne me veut, ny riche en abondance.
 Implorons les bons Dieux, MONSEIGNEUR & suport.
 Ma barque si auant en tourmente se voit,
 Qu'il faut ou qu'elle rompe ou qu'elle arriue au port.

EPITAPHE DE MADA-
 ME DV HOVLME.

Gilon de Montejan icy gist endormie
 Du somme qui se doit à tous egallement.
 Si la vertu faisoit viure immortellement
 En terre, elle y viuroit d'une immortelle vie.

I. LIVRE

Mais pource qu'il falloit abandonner ce monde
 Pour recevoir au ciel loyer de sa vertu,
 Elle decede apres que viuante elle ut
 Tout l'heur qu'on peut auoir où tant de mal abonde.
 D'un illustre lignage ayant pris sa naissance,
 Elle fut mariee en tresnoble maison,
 Qu'elle peupla d'enfans, pour y voir à foison
 Les enfans de ses fils prendre belle acroissance.
 Dieu la favorisa en si grande largesse,
 Qu'il ne luy manquoit bien qu'elle deust souhaiter,
 Et contente la feit en ce monde arrester
 Jusque au dernier soupir d'une heureuse vieillesse.
 Or, Passant, s'il est beau que lon pleure & regrette
 Les esprits vertueux, monstre grande douleur:
 Mais s'il faut s'esjouir de la grace & de l'heur
 Qu'ils reçoient au ciel, vn seul soupir ne jette.

E S T R E N E S.

AV jour que l'an renouuelle
 Cherchant de vous estrener,
 O gentille Damoyelle,
 Quel don vous puis-ie donner?
 Si vostre beauté regarde,
 Je ne sçache assez beau don:
 Mais vostre bonté me garde
 De vous offrir rien de bon.
 Sinon qu'enrichir vous fuisse
 D'eau la grand mer ondoyant,
 Ou qu'éclairer j'entreprisse
 Au beau soleil flamboyant.

Mais quand vostre esprit j'admire,
 Desireux plus que d'auoir
 D'apprendre tousiours, & lire
 Les liures de bon sçauoir:
 Je vous appreste vne estreine
 Que n'aurez pas à mespris,
 Où l'art & l'vtilite peine
 Du labourage est compris,
 Ensemble du jardinage,
 Qui vous fera souuenir
 En le mettant en vsage,
 De plus long tems ne tenir
 Vostre jardinet en friche,
 Mais dauant le renouueau,
 Faire vn bon jardinier riche
 De cc jardinet tant beau.

EPITAPHE DES COEVRS DE
 MESSIEURS DE L'AVBESPINE PERE
 ET FILS SECRETAIRES D'ESTAT.

Deux cœurs en ce tombeau reposent enfermez,
 Les plus beaux et plus nets que fait oncques nature,
 Qui viuans ont esté le séjour de droicteure,
 Bien aimans la vertu, de vertu bien aimez.
 Qui de tous les François de l'honneur enflammez
 Ont laissé dans les cœurs vne triste pointure
 D'vn regret de leur mort, qui encore leur dure,
 Morts autant regrettez que viuans estimez.
 Ces deux cœurs, ô passant, enuironnez d'espines
 Ce sont les cœurs de deux surnommez Aubespines.

I. LIVRE

Et du pere & du fils : sçache des deux le sort.
 Au faict bien conuenoit le nom d'espine blanche:
 Leur foy comme la fleur fut nette, pure & franche:
 Le soing public ce fut l'espine de leur mort.

GOSSERIE CONTRE LE
 SONET DE IOACH. DV BELLAY
 DES COMPARATIFS.

BEau Belier bien beslant, bellieur, voire bellime
 Des beliers les belieurs qui beslent en la France,
 Qui d'un haut beslement effroyas l'ignorance,
 Fortieur d'elle qui fut des fortieurs la fortune.
 BELIER qui vas broutant de L'OLIVE la cime,
 Qui à ton doux besler de doucime accordance
 Des neuf doctimes Sœurs l'excellentime dance
 Atraisnes du coupeau d'Helicon le hautime.
 Beau BELIER vaillantime à hurter de la teste,
 Qui est hardieur de toy, ô gentilime beste,
 Quand à hurtebelier tu equises ta corne:
 Tout le troupeau frizé de tes femmes s'arreste,
 Ton Berger ententif la couronne t'appreste,
 Et d'un chaperon verd pour recompense t'orne.

A MONSIEVR RAOVL
 MOREAV THRESORIER
 DE L'ESPARGNE.

Monsieur vous promettez
 D'un parler tant humain,
 Et tousiours remettez
 De demain en demain.

Par cela j'apperçoy
 Que travaillons en vain:
 D'oreille ie reçoÿ,
 Pas maille de la main.
 Mais pour chasser l'ennuy,
 Dont vous & moy ie plain,
 Que reçoÿue aujourdhuy,
 Non demain, mais de main.

A V R O Y.

SI les vœus & souhaits, & les prieres belles
 De tes loyaux sugets esperans vn Daufin,
 N'ont eu pour cette fois leur souhaitable fin:
 Ne laisse d'honorer les Parques immortelles.
 CHARLE, reçoÿ joyeux le present qui vient d'elles:
 Vien ta Fille cherir. C'est du vouloir diuin,
 Si, plus passioné que bien certain deuin,
 Acomplir ie ne voy mes promesses fidelles.
 Graces à Dieu tu vis, & viue se retreuve
 Ton Epouse, Tous deux ayans fait bonne preuve
 Que Dieu vous a benits de sa fertilité.
 Viue DIEU & mon Roy: Mon chant d'auant naissance
 Peut seruir dedans l'an pour vn Daufin de France,
 Qui naissant me fera chantre de verité.

A M A D A M E.

PVcelette Royale, ô noble fille nee
 Desous le ciel riant à la faueur des Dieux:
 Nette fleur, ô l'honneur des beaux Lis precieux:

I. LIVRE

*Commence heureusement ta bonne destinée,
 Crois : & de ta beauté de cent graces ornee,
 Et d'un œil & d'un ris diuin & gracieux,
 Reconoy tes Parents : Qui te riront joyeux,
 Et l'heure beniront que tu leur fus donnee.
 Si tost que sortiras de ton enfance tendre,
 Pallas & les neuf Sœurs te viendront toutes prendre
 Pour t'enseigner leur art que favoriseras.
 Puis grande & meure d'ans, Belle sçauante & sage,
 Requise d'un grand Prince en heureux mariage,
 La ferme Paix en France établir tu feras.*

DE CHALANT.

Chalant est un maistre galant,
 Cet un allant que mon chalant,
 Et vrayment j'auroy fort affaire
 De t'escrire ce qu'il sçait faire.
 Chalant est friant cuisinier,
 Chalant est aussi jardinier,
 Chalant fait vendre les offices
 Et fait achepter benefices:
 Chalant est un bon macquereau,
 Chalant est un bon pipereau:
 Chalant fait assez bonne mine,
 Mais il aime autant sa voisine
 Que sa femme, & si ie sçay bien
 Qu'un bon nombre de gens de bien
 (Tant la mignonne est belle & gente)
 Sans courir ailleurs s'en contente,
 S'en contente, mais nonobstant
 Ce chalant n'en est pas content.

Car s'il besongne sa commere,
 Et s'il fait coqu son compere,
 Cependant qu'il va chez autruy
 On dit que lon hante chez luy.
 Mais cela qui plus me soucie
 Il fait le jaloux de m'amie,
 Et l'aime ainsi que lon me dit,
 Et qui pis est, ha bon credit:
 Car il la mene où bon luy semble,
 Pour prendre leur deduct ensemble,
 Dont ie serois bien plus fâché
 Si ne m'en voyoy reuanché.

SVR LE CORS DE GASPARD
 DE COLIGNI GISANT
 SVR LE PAVE.

Gaspar, tu dors icy qui soulois en ta vie
 Veiller pour endormir de tes ruses mon ROY:
 Mais luy non endormy t'a pris en desarroy,
 Preuenant ton dessein & ta maudite enuie.
 Ton ame miserable au depourueu rauie
 Paye les interès de ta parjure foy.
 De tes supots, fausscurs de toute sainte loy,
 La mort apres ta mort est soudain ensuiuie.
 Mais quel digne tourment aux enfers Rhadamante
 Pourroit bien ordonner pour ton âme mechante,
 Et pour les fous esprits de tes malins supots?
 Ennemis de repos, c'est peine trop humaine
 Vous oster le repos. Donques pour griue peine
 Puisiez vous reposer en eternel repos.

I. LIVRE
A SARDRON.

TV sçais qu'aux halles l'autre jour
Je rencontray dans vn carfour,
Qui est pres de la Friperie,
Vne fillette assez jolie,
Amy Sadron. car tu la vis,
Et ce jugement tu en fis.
La belle estoit clere brunette,
Sa face bien polie & nette:
Ses cheueux noirs, son œil aussi
Brillant deffous vn noir sourci.
De sa taille elle estoit greslette,
Et toutefois assez refaute,
Entre grasse & maigre, en bon point,
Quant au reste assez bien empoint,
D'une robe noire accoustree,
Le cors joint, la chausse tiree,
L'escarpin juste sur le pié,
Le chaperon approprié
Bien mistement en sa carrure
De sur la polie vulture
De son petit affeté front,
Qui s'esleuoit en demy-rond.
Pour abreger, ceste mignarde
Auoit nom Françoisse Benarde.
Luy portant grande affection
Le prin d'elle assignation
Vn jour avec vn dé pour gage,
Pour me l'assurer d'auantage.
Mais au lieu dict elle ne vint,

ou soit

Ou soit qu'il ne luy en souuint,
 Ou soit que quelque maquerelle
 Pour lors me destourna la belle.
 Tant y a que depuis cé jour
 Je luy portoy bien grande amour,
 Cherchant l'auoir en ma puissance
 Pour en prendre la jouissance.
 Deuant toy lors ie l'assignay
 En vn lieu là où ie menay
 Narquet pour luy monstrier m'amie.
 Il la vit. nous faisons partie
 D'aller à Vanves y passer
 Quelques jours à nous soulasser.
 Nous l'y menons, avecques elle
 Perrette passablement belle:
 Mais dedans son ventre elle auoit
 Je ne scay quoy qui luy leuoit
 Vn petit trop haut la ceinture.
 Au reste Sardron ie te jure
 Qu'elle auoit assez beaux les traits,
 Les cheueux blonds, & le teinct frais,
 Tetins durs, la cuisse charnuë.
 De ceste courtaude fessuë
 Ma Benarde s'accompagnoit.
 Mais Benarde me dedaignoit
 Voyant Narquet de qui la face
 La fraischcur des roses efface,
 Lès le vres le teinct des œillets
 Fraischement cueillis vermeillets:
 La cheuelure crepelee
 La dorure d'argent meslee:

I. LIVRE

Son parler n'est rien que desir,
 Son regard n'est rien que plaisir:
 L'un d'amourettes emmielle,
 Et l'autre d'amours estincelle.
 S'elle a de luy quelque soucy
 Son Narquet l'aime bien aussi,
 Et tant de son amour s'enflâme
 Que voulant auoir seul la dame,
 Il vint à part m'assërmenter,
 De rien sur elle n'attenter.
 Fabi, me dit-il, ie te prie,
 Pour l'amitié bien accomplie
 Qu'à jamais ie te veu jurer,
 De ne vouloir la desirer.
 Moy que jamais l'amour trop forte
 Hors de la raison ne transporte,
 Ie n'y preten, dy-ie, plus rien
 Elle est à toy, garde la bien:
 Car Fabi n'aura jamais chose
 Que Narquet d'elle ne dispose.
 Quand j'en dict, graces il m'en rend,
 Et par la main il me la prend,
 Et fait d'elle ce qu'il desire,
 Sans que plus en rien j'y aspire.

E S T R E N E S.

I'Esperoy, mes Damoyelles
 Et vertueuses & belles,
 Vous recueillir à disner
 Ce premier jour de l'annee,

A fin que bien fortunee
Elle se peust terminer.

Car volontiers on espere
Tout le cours aussi prospere
Comme le commencement:
Mais les nopces honorees
De vos beautez bien parees
Y mettent empeschement.

Or allez en bonne estreine
(Ma priere ne soit vaine)
Là soit la Paix & l'Amour.
La feste du mariage,
Soit vn bien heureux presage

→ Pour vous deux dans l'an & jour.

A VNE DAMOYSELLE.

Pour temoigner l'entiere affection
Que ie vous porte, ô rare damoysselle,
En qui le ciel liberal amoncelle
Comme à l'envy toute perfection,
Je voudroy bien vous offrir quelque don
Cet an nouveau d'une estreine nouvelle
Qu'eussiez à gré: mais en volonté telle
Je crain de nuire à ma deuotion:

A mon desir ie crain ne satisfaire,
Vous presentant don peu digne de vous,
Et pour le bien ie doute de mal faire.

Pour ne faillir que faut-il que choisisse?
Ce que les Dieux ne refusent de nous:
Donc ie vous offre & louange & seruice.

I. LIVRE
DE CHAUSSEBRAYE.

CHaussebraye jeune espousa
Vne vieille brehegne fame:
La perdant, luy vicil abusa
Vne jeune & gentille Dame;
Ny deuant n'après n'ayant joinct
Iamais ses amours bien à point.
Car jeune il cultiuoit en vain
Le champ d'une terre sterile:
Et vicil il n'auoit plus de grain
Pour ensemencer la fertile.

E P I T A P H E D E
D A N D E L I N O T.

CY deffous dort Dandelinot le fat,
Qui à tous fous eust peu donner le mat:
En son viuant il ne fut guere net,
Faisant tousiours ou le rot ou le pet.
Iamais le fat l'un ou l'autre ne fit
Que tout premier de sa home il ne rit:
Mais en riant eschapoit à ce sot
Aussi puant que sa merde le rot.
Mort il sçait plus que viuant il ne sçut:
Bouche & vos nez, mesme sous terre il put.

A C O T E L E Y.

A ssez de piquecœurs, peu de bons laboureurs,
Qui sçachent dextrement manier la charnè:
A tort & a trauers bon & mauuais seruè.

à p. 106

L'ignorant fait tousiours vertu de ses erreurs.
 Non pas toy (Coteley) qui entre les meilleurs
 Exerces le doux art d'une musique esluë,
 Sçachant par tes accords acoyser l'âme esmeuë,
 L'exciter assoupie, exprimer ses douleurs.
 Jadis Musiciens, & Poëtes, & sages
 Eurent mesmes autheurs: mais la suite des âges
 Par le tems qui tout change a separé les trois.
 Puissons nous d'entrepris: heureusement hardie,
 Du bon siecle amenant la coustume abolie,
 Ioindre les trois en vn sous la faueur des Rois.

LE CHUCAS.

AV tems jadis les oyseaux demanderent
 D'auoir vn Roy: puis entr'eux accorderent
 Pour commander d'eslire cet oyseau
 Que Iupiter jugeroit le plus beau.
 Ains que venir au lieu de l'assemblee
 Tous les oyseaux vont à l'eau non troublee
 Des ruisselets se mirer & baigner,
 Et leur pennage agenser & pigner.
 Le noir Chucas, qui n'a point d'esperance
 Sans quelque dol d'auoir la preference,
 Va cauteleux loing à val des ruisseaux,
 Sur qui stotoyent les penes des oyseaux,
 Qui audeessus s'éplumoyent: Par malice
 Va s'embellir d'un nouuel artifice.
 En lieu secret en vn vallon ombreux,
 Dans le courant qui n'estoit guiere creux,
 Sur vn caillou s'assict, & au passage

I. LIVRE

Guette & retient le plus beau du pennage
 De tous oyseaux, qui plus haut se lauoyent
 Pres des surgeons dou les eaux deriuoyent:
 Prend le plus beau, plume à plume le trie,
 Avec le bec ouurier s'en approprie:
 Le joint, l'ordonne, & l'accoustre si bien
 Que d'arriuce il semble du tout sien.

Ainsi vestu de plumes empruntces
 S'orgueillissant aux penncs rejectees
 D'autres oyseaux, se trouue impudemment
 Où s'attendoit le sacré jugement.
 Là Iupiter avec la compagnie
 Des autres Dieux sa presence ne nie
 A si haut faict les animaux ete
 De toutes parts y estoyent auole
 Le Chucas vient: & toute l'assemblee,
 De grand merueille est rauie & troublee,
 Voyant briller son pennage éclairant
 De cent couleurs: & luy vont deferant
 Dedans leur cœur de rencontre premiere
 La Royauté: Iupiter n'eust plus guiere
 Tenu sa voix: & l'alloit declarer
 Roy des oyseaux, sans pouuoir reparer
 Ce qu'il cust dict. Son arrest ferme & stable,
 A tout jamais demeure irrenocable.
 Donc le Chucas pour jamais s'en alloit
 Roy des oyseaux, Iupiter y branstoit:
 Sans la Cheueche: elle qui ne se fic
 En ses bons yeux, & ne se glorifie
 En sa beauté, s'approche du Chucas,
 L'épluche bien: O le merueilleux cas!

Elle apperçoit la plume qui est sienne,
 Crie & la prend: Chacun de vous s'en vienne
 A ce larron, Chacun recognoïstra
 Ce qui est sien, le beau Roy deuestra
 De sa beauté: la Cheueche escoutee
 A grand risée à ce peuple aprestee.
 Chacun y vient, sa plume reconoest,
 Du bec la tire, & le Chucas deuest.
 Le fin larron despouillé du panage
 Qu'il ha d'autruy, par la Cheueche sage,
 De tout honneur demeura dénué,
 Et son orgueil en mépris fut mué.

EPITAPHE DE^z
 IAN GARNIER.

ICY repose Ian Garnier
 En son viuant Gagne-denier,
 Qui est degré plus honorable
 Du crocheteur plus venerable.
 Et bien qu'il ne fust Empereur,
 Ny quelque grand Chef conquereur,
 Le surnom de Grand il merite,
 Qui ne fut pas gloire petite.
 Et si ne fut pas glorieux
 Aussi peu que victorieux.
 Mais aussi bien qu'un Alexandre
 Et qu'un Charlemagne il sçut prendre
 Le nom de Grand, Grand Ian nommé,
 Tout ainsi qu'un plus renommé
 Qui eust porté sceptre & couronne.

I. LIVRE

Mais ce Grand surnom on luy donne,
 Pour auoir portant les crochets
 Crié gros bois & cottrets secs,
 Fagots bourrees & falourdes,
 N'estant jamais doneur de bourdes.

Et pource des crochets exent,
 Viuoit de l'honeste present
 Qu'on luy donnoit par courtoisie,
 Pour debit de la marchandie,
 Laquelle entre mains il métoit
 A celuy qui en achetoit:
 Mais falloit qu'il ust cognoissance
 De sa demeure & sa puissance.

Loyal estoit & diligent,
 Tenant bon conte de l'argent
 Que tresbien à tems sçauoit prendre,
 Et tresbien à tems sçauoit rendre.

Ainsin ayant bien tracasé,
 son âge sain il a passé
 Iusque à sa derniere vieillesse:
 Quand sur la fin vne foiblesse
 Par vn catarre descendu,
 Perclus de ses bras l'a rendu.
 Pour cela de rien n'ut soufréte
 Iusqu'à la derniere retréte
 Qu'il fit lors qu'il ferma les yeux,
 Passant d'un soupir gracieux
 Entre les mains de Caterine
 son épouse chicre & benine,
 Qui le soigna tant qu'il vesquit.

Nul ne sçait le tems qu'il nasquit:

Aussi n'est-il homme de l'âge
 Pour en porter bon témoignage:
 Quand il mourut, pour vray c'étoit
 Quand soixante & douze on contoit,
 Sur la quinze centième année,
 La vingt & vnième journée
 D'Auril, au milieu du printems,
 Qu'il finit l'auer de ses ans.

Catherine sa femme ut cure
 De son honeste sepulture,
 Et le fit coucher en ce lieu.
 Dy, Passant, qu'il repose en Dieu.

ACROSTICHE.

EPI T A P H E.

I'AY vescu: vous viés vostre vie mortelle.
 Esperant je vesqui pour la vie eternelle.
 Hors tout espoir je vi en pleine jouissance
 Avecque les élus: où pleins d'éjouissance
 Nostre Dieu nous voyons en sa sainte hauteesse.
 Benissons & chantons son empire sans cesse.
 O mortels ce n'est rien vostre mortel passage.
 Vous n'auéz que par prest d'un pauvre bien l'usage.
 Rendre comte il faudra pardauant le grand iuge.
 Le loier vous attend. Repensez au deluge:
 Il punit les méchans. Le feu se doit répandre,
 Et le monde peruers reduire tout en cendre.
 Regardez à vos faits. Gardez vous de méprendre.

I. LIVRE
A MONSIEVR DE FITES
TRESORIER DE L'ESPARGNE.

FITES, vous n'estes feint aux amis de la Muse,
(Ce vous chante Ronsard honorant vostre nom)
Soit que disiez Ouy, soit que vous disiez Non,
Vostre douce parolle vn qui vous oyt n'abuse:
Mais, ô FITES, non feint sans defaute & sans ruse,
Vostre vray delayer n'apporte rien de bon:
C'est le malheur du tems, non vostre affection,
Qui le don de mon ROY contre son gré refuse.
Par vostre bon vouloir de ce tems la malice
Amendez ie vous prie, & benin dauancez
La remise du bien qu'ingrat il ne perisse.
Du don qui traine trop la grace est méprisée:
S'il ne vous poise point le bien-fait auancez,
Vn bien-fait soudain fait en vaut deux en prisee.

CONTRE MASTINE.

VIEILLE carcasse saupoudree,
Dauant & derriere effondree,
Tu veus me sentir furieux
Pour ton caquet injurieux,
Que faisant de la preudefame
Tu viens bauer, ô bonne Dame,
Contre qui onc ne t'a mesfait,
Ny de parolle ny de fait.
Mais si fusses bien auisée,
Autant qu'à mal tu es rusée,
Tu ne m'eusses pas irrité,

Moy qui ne l'auoy merité.
 Car, vieille haridelle etique,
 Je sçay repiquer qui me pique,
 Je sçay remordre qui me mord,
 Je sçay punir qui me fait tort.
 Tu en sçauras bien tost que dire,
 S'il se faut prendre pour médire
 A moy qui te tór vn licou
 De ma main à ton maigre cou.
 Cordier je seray de ta corde:
 Mais toy bourrelle sale & orde
 De ta main ta gorge étrenndras
 Aucc la corde, & te pendras,
 Et ta gorge en étant sanglée
 Tu t'étouferas étranglée,
 Perdant celle méchante voix,
 Qui s'éclate de faux aboys.
 Onc ne sortit si ord diffame
 De la bouche de preudéfame:
 Mais rien n'en peut sortir plus beau,
 Que ce qui est dans le vaisseau.
 Tu as donques osé, méchante,
 Ataqver ma Muse innocante?
 Muse retire ta faueur,
 Et me debonde ta fureur.
 Comme vn Mastin en mon jeune âge
 Méchant m'ensflamma le courage,
 Yne mastine sans propos
 Vient partroubler mon doux repos.
 Vien Mastine remastinee,
 L'en jure tu seras bernee,

I. LIVRE

Mastine à long poil : tu as nom
 Mastine pour ton bon renom.
 Mastine, vilaine éhontee,
 Baucuse, écumeuse, efrontee:
 Mastine je te nommeray
 Lors qu'en ta faucur rimeray.
 Mastine fille de mastine:
 Contre toy mon courroux s'obstine:
 En vain ne m'auras dépité:
 Au courroux est la verité.

Premièrement dés ta naissance,
 (Car j'en ay bonne conoissance:)
 Nenny non bastarde tu n'es:
 Auoitre d'auoitre tu nais.

A témoin ton surnom j'appelle,
 Dont tu fais tant la damoiselle,
 Te vantant (et digne t'en rens)
 De sortir de nobles parens.
 Si les pointes de ma colere
 Te fâchent tu deuois te tere:
 Ou si veux n'en ouïr plus rien,
 Va te pendre et tu feras bien.
 Quand tu fus vn peu grandelete,
 Tu n'apris comme lon culete:
 Car de nature le scauois,
 Si gentile naissance auois.
 Toy qui fus fille de maitresse,
 Ayant si naturelle adressé,
 Que mesme dés tes premiers ans
 En tins école à toutes gens.
 Mais comme tu t'en es vantce,

Tu fis ta premiere portee
 D'un jeune Aleman écolier,
 Que tu fis tirer au colier.
 Depuis tout t'a esté de guerre,
 Tu as reçu (sans trop enquerre)
 Et crocheteurs, & cuisiniers,
 Et bateliers, & palsfreniers,
 Secouant l'une & l'autre hanche
 Sous tous, cherchant le meilleur manche
 Pour ta grande coignasse, mais
 Vn propre n'y trouuas jamais.

AV SIEVR MARCEL.

MARCEL, quittons la Court & la tourbe confuse
 De ce peuple importun, qui empresse les Grans:
 Relâchons nos esprits de travaux differens,
 Toy chés toys, moy courant au giron de ma Muse.
 Gardons que la splendeur en vain ne nous amuse:
 Ce ne sont les vrais biens que les plus aparens.
 Souuent tout luit dehors, que les soings deuorans
 S'acharnent dans le cœur qui se consume & s'vse.
 Doncques allons gouster du repos le plaisir,
 Plaisir bien conuenant à la fleur de ton âge,
 Que la Court fera croistre en croissant le desir.
 Moy je me sen déjà bouillonner le courage
 De bastir pour jamais, grauant à mon loisir
 Le beau nom de ma Royne, au front de mon ouurage.

AINSI que le nocher battu de la tourmente
 Quand la mer a lâché sa fureur vehemente,
 Voit de joye rauy le port tant souhcté,

I. LIVRE

Lors qu'il nage embrassant quelque bois secourable
 Emprunté de sa nef, que Neptune effroyable
 En pieces contre vn roc sous les vens a jetté.
 Peu, trampez de la vague, en nageant se retirent,
 Qui jettans piés & mains droit à la terre tirent,
 Et sauuez du peril viennent gagner le bord.
 Moy qu'une grand' tempeste est venue surprendre,
 Tout ainsi ie m'en vien entre vos bras me rendre,
 Plein d'aïse en vous voyant mon salutaire port.
 Moy desirant payer le vœu de mon naufrage,
 Ie me consacre à vous d'un treshumble courage,
 Offrant tout ce qu'ay peu de mon peril sauuer.
 O D V C, noble fleuron de genereuse race,
 Et clement & vaillant, faites moy tant de grace,
 Que daigniez d'œil serein me vouloir approuuer.

DE SON AMOVR.

IE n'aime ny la pucelle
 (Elle est trop verte) ny celle
 Qui est par trop vieille aussi.
 Celle qui est mon soucy
 C'est la femme desia meure.
 La meure est tousiours meilleure:
 Le raisin que ie choisi
 Ne soit ny verd ny moisi.

V O E V.

AVERTVMNE & Pomone,
 Marquet le jardinier
 Ce plein plat de fruits donne,

Et ne veut pas nier
 Que tout ce beau fruitage
 De vrais fruits contrefaits
 Ne soit la feinte image,
 Qu'à plaisir on a faits.
 Marquet vous le confesse,
 O Deesse, ô toy Dieu,
 Ils sont feints : mais si est-ce
 Qu'il vous a fait ce vœu,
 Esperant davantage:
 De vrais fruits grand planté,
 Pour tout ce faux fruitage,
 Qu'on vous a présenté.

AV SEIGNEUR IAQVES
 GOHORRY.

NE verrons-nous jamais que des Romans frivoles,
 Témoignage certain d'un siècle d'ignorance,
 Ouvrages décomposés, sans art, sans ordonnance,
 Pleins de vaines erreurs & pleins de fables folles?
 Que seruent aujourd'hui tant de doctes écoles
 De Grec & de Latin où se lit la science?
 Que te sert de tant d'arts avoir l'expérience,
 Puis que sur Amadis, GOHORRY, tu rafolles?
 Quoy ? sur ton âge meur, quand desia tu grisonnes,
 Lors qu'attendons de toy quelque gentil ouvrage,
 En lieu d'un fruit exquis vne fleur tu nous donnes.
 L'arc n'est toujours tendu. Qui ne l'troit détendre
 Lon verroit sur le lut se rompre le cordage:
 L'esprit se laisseroit s'il falloit toujours tendre.

. L. LIVRE
A DES DAMOYSELLES.

IE vous suply mes Damoyelles,
Trop bonnes pour estre si belles,
Tant priuément ne caresser
Ce Bagoas qui vous enchante.
Quel danger a-t'il qu'il nous hante?
Le pis qu'il fait c'est d'arresser.

Mais pour vostre honneur je vous prie
Desistez de sa compagnie,
Qui vous donne tout mauuais bruit.
Les gens disent déjà tout outre,
Que vostre champ aime le coutre,
Et ne se veut charger de fruit.

A MONSIEVR DV GAST.

ET bien que sont-ils deuenus
Ces vers à la façon nouvelle?
Baif, Nous n'en voyons plus nuls.
Tu reuiens rymmer de plus belle.
Gast, je sçay bien ce que j'en pense,
I'enten que la mesure en vaut:
Mais ie sçay que viuons en France,
Où fait soudain froid & puis chaud.
Sçaches que du tems ne me chaut,
Pourueu que bien mon jeu ie jouë.
Par entre les singes il faut
Estre singe & faire la mouë.

A CLAV-

TOY, qui as vn nés en ta face,
Ou plustost du nés vne place,
Nés (le diray-je nés ou non?)
Ouy, nés, mais nés d'un guenon.
Nés montant si peu sur ta bouche,
Que tu pourrois gober la mouche
Encontre le mur le plus droit,
Sans le fouler en nul endroit:
Nés de morueaux vne fonteinc,
Nés, doù sort si puante aleine,
Que de l'aneau d'un vicil retrét
Ne sort pas un vent plus infét.
Ayant ce nés si beau, Claudine,
Ayant ce gentil nés, poupine,
A tous propos tu ne te feins
De me jurer Dieu & ses saints,
Que tu es chaste & preudefame,
Sans nulle tache de diffame.
Que tu ne sois femme de bien,
Le diable emport qui t'en dit rien.
Mais plus je te confesse telle,
Que tu te dirois bien pucelle,
Comme je croy, voire à bon droit,
Ne fust que honte te seroit.
Pucelle te dirois, si celle
Se peut nommer au vray pucelle,
Qui se contient femme de bien
Quand nul ne la presse de rien.

I. LIVRE
E P I T A P H E D E M A R -
G V E R I T E P O U P A R D .

M Arguerite Poupard dans terre icy repose,
Du foye à tous commun ayant la vuë clofée.
Le Mans a son tumbreau, Paris ut sa neffance:
Toutes les deux cités ont d'elle conoiffance,
Et departant le tems de fa jeunefse entiere,
Son Paris ut la fleur de fon âge premiere:
Le Mans le premier fruit tout verdelet encore,
Que la mort indiscrete en fon até deuore.
Deux ans & trois fois dix c'est le cours de fon âge:
Par dix ans reuolus elle fut en ménage,
Pour fés rares vertus enuers tous amirable,
Vers René Pahoueau d'amour inécomparable,
Qui durant ce bon tems par cinq fois la fit mere.
Elle morte vn seul fils le foulas de son pere,
Auec trop de regrets à fon mary demeure:
Les quatre l'atendoyent en l'heureufe demeure.
Or fon trescher mary, croyant en assurance
La refurrección, gardant la fouuenance
De l'amour conjugale & concorde fans blâme,
Qui les vnit viuans, Non ingrat à fa fame,
A graué cét écrit, témoignant que la terre
L'affection des bons entierement n'enferre:
Et dit que les esprits maugré la mort cruelle
Les vns des autres ont étude mutuelle.

A N A R K E T . .

S I c'est bien chanter, chanter haut,
Narket, tu chantes comm' vn ange.
Si chanter de façon étrange,
Ne gardant rien de ce qu'il faut,

Hors de ton, hors toute harmonie,
 Forçant toute ancienne loy,
 C'est tresmal chanter : ie te nie,
 Qu'il soit pire chantre que toy.

A MALOINT.

LE beau fils, Maloint, ie te prie,
 Ne dy ne bien ne mal de moy:
 Et ie n'écriray de ma vie
 Ny en bien ny en mal de toy:
 Si ne cesses de m'attaquer,
 Si mal dire te peut tant plaire,
 Je n'écriray: mais sans mocquer
 Je criray comme on te fait taire.

A MONSIEVR ROVL MO-
 REAV LORS TRESORIER
 DE L'ESPARGNE.

O Des Muses aimé, de qui la main loyale,
 Et reçoit les tributs du François opulant,
 Qui rendus tous les ans vont & viennent coulant,
 Et de part loin & pres la finance Royale:
 Il plut à mon bon Roy de grace liberale
 M'ordonner quelque don, que par trop ie fus lent
 De retirer alors: mais vn mal violent
 Me presse le poursuiure en ma perte fatale.
 Car trois ans sont coulez, que banny de mon bien,
 Je mange du passé quelque peu de reserve:
 Tandis le Huguenot fait son propre du mien.
 Auoir recours ailleurs qu'à mon Roy ie ne puis,
 Puis que j'ay perdu tout. Car Dieu le Roy conserue,
 Et moy comme Poëte en sa tutelc suis.

I. LIVRE
 AMOUR DERO-
 BANT LE MIEL.

LE larron Amour
 Deroboit vn jour
 Le miel aux ruchettes
 Des blondes auettes,
 Qui leurs piquans drois
 En ses tendres doigts
 Aigrement fichèrent.
 Ses doigts s'en enflerent,
 A ses mains l'enfant
 Grande douleur sent,
 Dépit s'en courrouce:
 Là terre repouce,
 Et d'un léger saut
 Il s'élançe en haut,
 Et vole à sa mere,
 L'orine Cytcre,
 Avec triste pleur
 Montrer sa douleur,
 Et faire sa plainte.
 Voy (dit-il) l'ateinte
 Qu'une mouche fait:
 Voy combien meffait
 Vne bestelette,
 Qui si mingrelette
 Fait vn mal si grand.
 De mesme il s'en prend,
 (Venus luy vint dire
 Se prenant à rire)

Bien qu'ensefantelet
 Tu sois mingrelet,
 Tu ne vaux pas mieux:
 Voy quelle blessure
 Tu fais qu'on endure
 En terre & aux cieux.

DE GILLES BOVRDIN

PROCVREVR GENERAL.

DONQVES, ô Toy qui fus amy de verité,
 Compagnon de vertu, ministre d'equité,
 Et loyal & seueré,
 Dés le soir te couchant adieu tu dis au jour,
 Pour deuant le matin estre à l'autre séjour
 Où tousiours il éclaire?

Ainsi du monde vain le siecle vicieux
 Ne peut rien endure de bon & precieux:
 Mais la vertu rejette.
 Le forfait se pannade: & l'indiscrete mort
 Epargnât les méchâs, sur les bons son effort
 Enuiusement jette.

France il te faut plorer! Paris sois plein de cris.
 Qu'on oye tous lamans. Qu'on ne voye qu'écris
 Par les tristes murailles:
 Qui narrant ses vertus tirent soupirs & pleurs
 Des passans attristez: & de justes douleurs
 Ornent ses funeraillies.

Bourdin fut des vertus l'amiable suport:
 Des pauvres affligez le benin reconfort,
 Le rempart de droiture,

I. LIVRE

Qui pour rien ne branloit: Courtois, officieux
Aux siens, aux étrangers humain & gracieux,
Liberal de nature.

Luy des Muses aimé, qui de rare sçavoir
Ornerent son esprit, & qui luy firent voir
Dés sa ieunesse rendre
Leur non-profane dance, & ouïr leur chanson:
Qui soigneuses deslors à ce cher enfançon
Leurs segrets font entendre.

Mais cessons nos regrets: car Bourdin bien-heureux,
(Ie croy) ne prend plaisir à ce cry douloureux,
Qui les larmes conuie.
Heureux il a vescu: bien-heureux il est mort,
Qui s'est à son reueil trouué dans l'autre port
De l'éternelle vie.

A PHILIPPE DES PORTES.

PORTES, vn neu autre que le vulgaire
A pu coupler nos esprits alliez:
Non pour vn jeu nos cœurs furent liez,
Non pour vn or qui palist le vulgaire:
Ce qui nous fait l'vn à l'autre tant plaire,
Furent les dons aux Muses dédiéz:
Dons, qui sacréz des sots non enuiez,
Ne souffriront nostre amitié se taire.
Or sçachent donc les âges nous suiuanz,
Quelle amitié nous estreignit viuans
Pour embrasser vne douce concorde.
Moy ie louay ton style gracieux:
Toy le mien rude. En cœurs non vicieux,
Mesme candeur plus que tout nous acorde.

IE n'enten selon le vulgaire
 simplement les fables d'Homere,
 Comme quand il conte l'effait
 Des charmes qu'une Circe fait,
 Assenant, quiconque elle happe,
 Sans qu'un seul de sa verge échappe:
 Les transformans de puissans coups,
 D'aucuns en porcs, d'autres en loups.

Circe est vne putain méchante,
 Qui par ses tours si bien enchante
 Les apprentis de son métier,
 Qu'elle les rend sur vn fumier,
 Les dépouillant par ses finesesses,
 Et s'engressant de leurs richesses.
 Elle, si tost qu'ils n'ont plus rien,
 Chés soy les nourrit de leur bien
 Brutallement en ses étables,
 Comme bestes non raisonnables.

Vlysse est celuy qui rassis
 Echappe ses attraits lasifs,
 Ayant pour promte medecine
 De sa flateresse housine,
 Non point vn Moly vigoureux
 Contre les apas amoureux:
 Mais bien vne caute sagesse,
 Qui jamais tromper ne se laisse,
 S'emparant pour contrepoison
 D'une ferme & sage raison.

I. LIVRE
PRIAPE.

Pourquoy, jeune sotelette,
Ainsi te ris-tu seulette?
Praxitele ny Scopas,
Ny Phidie ne m'ont pas
Fait tel que tu me vois ores.
Sotte, tu t'en ris encores?
Un vieil paisant radoté
M'a tout ainsi raboté,
Avec vne serpe crouche
D'une nouailleuse souche,
Et puis il m'a mis icy
Où je suis, disant ainsi:
Soy soy, Priape, & me garde
De main larronne & pillarde:
Tu me guignes toute fois,
Et me ris quand tu me vois
D'une mine assez folette.
Tu n'es pas trop sotelette:
C'est ce gros pilon massif,
Qui te meut ce ris lascif,
Ce pilon d'entre mes aignes,
Qu'en riant tu ne dédaignes.

E P I T A P H E.

Toujours, injuste mort, les meilleurs tu ravis,
Et laisses les méchans impunis sur la terre:
Trois freres en trois ans, trois foudres de la guerre,
Trois bons Princes, tu mets hors du comte des vifs:
Vivans mieux que jamais, de tous biens assouvis,

Ils sont montez là haut: & le tombeau n'enferre
 Rien d'eux que le mortel, sous l'oubly de la pierre:
 Au ciel son vray sourageon l'immortel est remis.
 Le sort vous a tranché le filet de vos jours:
 Ainsi precipitez dedans la fosse noire
 Patrocle, Achille, Hector n'acheuerent leur cours,
 Mais sont recompensez d'immortelle memoire.
 Princes, pour-reparer vos ans qui furent cours,
 Vostre BELLE AV vous donne vne eternelle gloire.

A M A R I E.

N Y de parole ny de fait,
 Quoy que ie face ou que ie die,
 Tu ne me promés nul effect
 De cela que tant ie te crie:
 Ny par faits, ny par dit, Marie.
 Ne veux-tu faire ou dire rien?
 Fay moy, ou dy moy ie te prie:
 Et quoy? ta mere le fait bien.

A V X E N V I E V X.

P Vis que sur l'eur de la vie,
 De soy la bourrelle enuie
 Se tormente j'aime mieux
 Estre en vié qu'en vieux.

I. LIVRE
AMOUR LIE.

Felon tu as beau plover
Estreint de ces cordes dures:
Il faut bien que tu endures
Ce que tu fais endurer.

A MONSIEUR DE
L'AVBESPINE SECRE-
TAIRE D'ESTAT.

Avbepin florissant de fleurs blanches & nettes
D'honneur & de vertu, si des Muses l'oiseau
Le mignon Rosignol, au mois du renouveau
Sur ta branche assuré, redit ses chansonnettes:
Me soit permis à moy le moindre des Poètes,
Que les neuf doctes sœurs abbreuent de leur eau,
Or que l'an recommence un voyage nouveau,
Me courir ombroyé de tes saintes branchettes.
Là du ciel la faueur sa manne pleuuerà,
Là soufflera Zephir qui doucement vent,
Là tout chantr'oyillon tes honneurs chantera,
De ton tige sacré loing tout orage soit,
Le serpent venimeux pres ton arbre ne hante,
Qui la Muse & les siens amiable reçoit.

E P I T A P H E.

ICY gist d'un enfant la despouille mortelle.
Au ciel pour n'en bouger vola son ame belle,
Qui parmy les esprits bien heureux jouissant

D'un plaisir immortel, louë Dieu tout puissant:
 Et s'ébatant la sus d'une certaine vie
 Au viure d'icy bas ne porte pas enuie,
 Au viure que viuons douteux du lendemain,
 Sous les iniques loix où naist le genre humain.
 O belle ame tu es en ce tems de misère
 Gayement reuolce au sein de Dieu ton Pere,
 Laisant ton pere icy. Là tu plains son malheur
 Qui de regret de toy porte griefue douleur,
 Qu'il temoigne de pleurs arrosant l'escriture
 Dont il a faict grauer ta triste sepulture.
 Repose ô doux enfant: & ce qui t'est ousté
 De tes ans, soit aux ans de ton pere adjousté.

V O E V.

Ceste broche & ceste lardoire
 Et ceste lichefrite noire,
 Ces cousteaux & ceste culier,
 Cet euantoir, ce creux mortier,
 Ce pilon à double caboche,
 Ce coquemar, ce hauet croche,
 Ces tenailles & ce trepié,
 Et ces landiers à double pié,
 Ces hatiers, ces pale & tourtiere,
 Ces deux poiles, dont l'une entiere
 L'autre est trouée, & ce friquet,
 Ce fourgon, ce jumeau chesnet,
 Ceste gratuse, & ces boursèttes
 Aux espices, & ces pincettes,
 Ceste grille & ce chauderon,

I. LIVRE

O Vulcain des Dieux forgeron,
 Gillet cuisinier te dedie,
 Pour plus meiner ce train de vie
 Ne se sentant assez dispos,
 Mais voulant passer à repos
 Ce qui luy reste à viure encore:
 Et pource de ce ven t'honore,
 Te merciant du peu de bien
 Qu'il s'est acquis par ton moyen:
 Et te supplie qu'il te plaise
 L'en faire jouir à son aise,
 Comme en travail par ton moyen
 Il s'est acquis ce peu de bien.

A VNE VIEILLE.

Vieille que le vieil âge a minee & pourrie,
 Demandes tu qui fait que ie n'ay point d'enuie
 De jouir de ton cors? Toy qui as en la bouche
 La dent noire, & puante au nez qui s'en approuche
 Toy qui as ton beau front de rides s'étandantes
 Tout du long sillonné? & les jouës pendantes?
 A qui vn vilain trou (qui plus que tout me fâche)
 Entre deux gigoteaux, comme vn cul d'une vache,
 Bâisle tousiours ouuert? Mais ses tettes molasses
 Sur vn sec estomac, telles que les tetasses
 D'une vieille jument, font que ie la desire,
 Et son ventre peaussu à son amour m'atire.
 Et les cuisses qu'elle a seiches mégres étiques,
 Qui traitent au dessous deux greues hydropiques.
 Tu pourrois t'auouer d'une tresnoble race,

Et tu pourrois porter alentour de ta face
 Des riches Indiens la plus rare richesse,
 Si ne feras tu pas pour cela que j'arreste.
 Quoy ? cent li'vres dorez en avant tu viens mettre
 Pourneant : car mes nerfs qui n'entendent la lettre
 Ne veulent point dresser. Ta luxure demande
 Le rebours de cela que ta face commande.

CHANSON.

CHanton l'Helene Françoise
 Digne de plus grand renom,
 Que celle Helene Gregeoise
 Dont elle porte le nom.
 Celle la nourrit la guerre
 Semant discords & debats,
 Dont Grecs & Troyens par terre
 Morts tomberent aux combats.
 Mais nostre gentille Helene,
 Quand elle pousse dehors
 Sa voix plaisante & sereine,
 Feroit reuivre les morts.
 Mais nostre Helene benine,
 Quand elle bouge ses yeux,
 De son œillade diuine
 Chasse les nuës des cieux.
 De là s'enfuit la discorde,
 O douce Helene, où tu es:
 Là se trouue la concorde,
 La courtoisie & la paix.

I. LIVRE
ÉPITAPHE DV SEIGNEVR
D'ALVY SECRETAI-
RE D'ESTAT.

TV vis, tu vis au ciel, ô ame bien-heureuse,
Et nous te regrettons en ce mortel passage:
Et la mort accusons de t'auoir fait outrage,
Qui tranche de tes ans la course vigoureuse.
Tu vis: & nous outre d'atteincte douloureuse
D'auoir trop peu desu te pleignons dauantage:
Toy ne nous laissant rien au milieu de ton âge
Qu'vn dueil, dont honorons ta vertu valcurcuse.
Mais nous faillons, mortels, quand estimons la vie
Au conte de nos jours, qui deust estre prisee
Au nombre des vertus, dont l'aurions anoblie.
Robertet en cent ans que pouuois tu plus faire?
Ta vie fut du ciel assez fauorisee,
Qui au peuple & aux Rous, bien faisant a sçu plaire.

A MADAMOYSELLE DE
CHATEAUNEUF:

PAR le sort de la feue, & la faueur entiere
De la Court, aux honneurs d'vne Royne esleuee
Aujourdhuy tu te vois: & personne priuee
Demain tu reuerras ta fortune premiere.
Fortune assez heureuse, où tu es coustumiere
D'embrasser la vertu, qui, ô belle Rence,
T'orne de majesté si bien enuironnee,
Qu'elle ne craint l'assaut de fortune legiere.
Car tu sçais d'vn traiçt d'œil gaigner les escriuans,

Qui à mille ans d'icy laisseront suruinans
Les traic̃ts de tes beautez, par les beaux traic̃ts qu'ils
tirent.

On sçaura le pouuoir de ta rare beauté,
Qui jointe à ta vertu vaut vne Royauté,
Quand les cœurs des plus grands à te seruir attirent.

DIALOGUE.

VIOLIN. LIZE.

VIOLIN.

- O** Lize objet de mon amour fidelle,
Lize mon cœur, mon espoir, mon desir,
D'un qui te suit l'amour veux-tu choisir,
Pour te monstrer à qui te suit rebelle?
- L I.** Beau Violin, d'amour, qui soit non pire,
Mais bien meilleur, tu es digne vrayment:
Mais ie n'ay plus sur moy commandement:
A Saugin seul j'en ay donné l'Empire.
- V I.** Heureux Saugin s'il auoit cognoissance
De son bon heur ! il te tient à mépris:
Si j'estoy luy Rosete qui l'a pris
Ie n'aimeroiy d'une ingrante esperance.
- L I.** Rosete hait mon ingrat, & se peine
Pour ton amour : pour moy tu as soucy:
Moy pour Saugin. Amour se vange ainsi:
Consôle toy : seul tu ne vis en peine.
- V I.** Le mal d'autruy n'allege pas, ô Lize,
Nostre douleur : ic me sen consumer:
I'aime & ne veu ce que j'aime n'aimer.
Car nul tourment ma bonne amour ne brise.

- LI. Tu es constant, aussi suis-je constante
 Contre l'effort de l'amoureux tourment:
 Qui voudra cherche vn doux allegement:
 Sans vouloir mieux ma langueur me contante.
- VI. Mais si la mort pour t'auoir trop aimée
 M'ôstoit la vie, ô quelle cruauté!
 Moy qui mourroy ne vcrroy ta beauté:
 Toy de ma mort tu viurois diffamée.
- LI. Beau Violin, voudrois-tu pitoyable,
 Rosete oster de mal & de soucy?
 Lors te monstrant enuers elle adoucy,
 Digne serois d'une faueur semblable.
- VI. Si ie n'aten à ma douleur cruelle
 Autre secours, condamné suis à mort:
 Car j'aime mieux pour toy Liŕe estre mort,
 Qu'estre viuant pour autre tant soit belle.
- LI. O Violin, d'une fin si cruelle
 Digne tu n'es. Liŕe se donne à toy.
 Prenne Saugin de Rosete la foy:
 Soit nostre amour à jamais mutuelle.

FIN DV PREMIER LIVRE
 DES PASSETEMPS.



SECON D LIVRE
DES PASSETEMS DE
IAN ANTOINE DE BAIF.

A MONSIEVR ET MADAME
DE LENONCOVRT.



*Pair d'un heureux mariage,
Si j'auois autre temoignage
Pour declarer la verité,
Qui d'une plus longue duree
Laiſſast en memoire assuree,
Comme auez de moy merité.*

*Ie le mettrois en aparance
Pour faire ouuerte demontrance
De mon cœur à vous dedié:
Ce que puis au front de ce livre
Vos renoms puissent long tems viure,
Et vostre bien fait publié.*

A V R O Y.

MArcheꝯ sous bon augure, ô mon PRINCE ô
mon ROY,

*Conduit de juste droit, soutenu de vaillance:
Pouſſé d'un saint desir, non de prendre vangeance,*

II. LIVRE

Mais de faire florir la Justice & la foy:
 Qui au ciel deuant DIEV des faux hommes sans loy
 Font en piteux exil leur triste doléance.
 DIEV vous met aujourdhuy entre mains leur deffiance.
 Menez à la bonne heure vn belliqueux arroy.
 Marchez pour deliurer vos bons sugets d'outrage:
 MarcheZ pour refrener, & du matin la rage,
 Et du Barbare ingrat, coupables en leur cœur.
 Si DIEV voit (mais il voit) ils mangeront la terre.
 Vous fonderez la paix par vne bonne guerre,
 Et de vos ennemis triomphereZ veincueur.

ESTRENES.
 A LA ROYNE.

N'ayant que vous donner, TRESAVGVSTE
 PRINCESSE,
 Sinon que des chansons, le bien dont riche suis,
 Despouillé d'autre bien, vous donne ce que puis,
 Vous chantant des souhets, ma totale richesse.
 Donc à cet an nouveau, moy ravi d'alegresse,
 Je veu le premier jour oublier tous ennuis:
 Qu'à vous & vostre sang, de l'heur du ciel conduits,
 Cet an puisse amener vne pleine liesse!
 Ceux qui résisteront contre vos majestez
 Tous trebuschent veincus contre bas dejettez!
 Qui tient vostre parti, victorieux prospere!
 Vers vous de vos ENFANS croysse l'affection:
 Les royaux FRERES soyent entr'eux en vnion
 Puisé-j'auoir de tous la grace que j'espere.

BAIF, si tu veux sçavoir
Quel auoir
Pourroit bien heureux te rendre
En ce douteux viure cy,
Oy cecy,
Et tu le pourras apprendre.
Ochetif, cet heur hélas,
Tu n'as pas !
Hé, ta fortune est trop dure !
Mais ce qu'on ne peut changer,
Est leger,
Si constamment on l'endure.
Vn bien tout acquis trouuer,
N'esprouuer
Pour l'auoir aucune peine:
Vn champ ne trompant ton veu:
D'vn bon feu,
Ta maison tousiours sercine.
N'auoir que faire au Palais,
Ny aux plaids:
Loin de cour : l'esprit tranquille:
Les membres gaillards & forts,
En vn cors
Bien sain, disposé & agile.
Caute simplessé entre gens
Se rangeans
Sous vne amitié sortable:
Vn viure passable & coy
A requoy:

I I. LIVRE

Sans desguifure la table.
 Passer gayement les nuits
 Hors d'ennuis,
 Toutefois n'estre pas yure:
 Vn lit qui ne te deçoit:
 Mais qui soit
 Chaste, de noifés delivre.
 Estre content de ton bien,
 Et plus rien
 Ne desirer ny pretendre:
 Sans souhait, sans crainte auſſi,
 Hors soucy
 Ton heure derniere attendre.

A MONSEIGNEVR LE
 DVC DE NEVERS.

LOVIS, ſang de GONZAGVE, allié de la France,
 Proche couſin des ROYS, mon ſupport, verras-tu
 Aux vers que ie public, ou que ton nom ſoit tu,
 Ou que de tes bienfaits ie n'aye ſouvenance?
 Non: car l'honneur te ſuit: toy qui ſortant d'enſance
 De ton cœur genereux découuris la vertu:
 Que rigueur ny douccur n'ont jamais abatu,
 Non meſme en la priſon, preuve de ta conſtance.
 Ainſi touſiours mon ROY d'œil ſerén te regarde:
 Ainſi l'oreille prompte à t'ouïr il retarde,
 Non moins content qu'amy de ta fidelité:
 Pren par ébat ce livre: & ſi tant ie merite,
 Me voyant non-ingrat, de ma Muſe petite
 Tu voudras meriter ainſi qu'as merité.

DES PASSETEM S.
A V P E V P L E
FRANCOYS.

27

PEuple, ie ne téray l'aise que ie conçoÿ
De voir leur MajesteZ en leur maison Royale,
Dans la grande Cité, premiere & capitale
Des païs commandeZ de CHARLE ton grand ROY.
Ianuier ramene l'an, qui amene avec soy
Tout bien & tout plaisir, & de main liberale
Sur les Gaules répand la bieneurte fatale,
Que par vn vray presage aujourdhuy j'aperçoÿ.
Quand les Planetes sont en leur propre demeure
De leur plus grand hauteur mirans ce bas sejour,
Lors d'vn heureux destin le Chaldé nous asseure:
Aussi le bon Soleil & les astres de France,
Dans le Louure à Paris celebrans ce beau jour,
Iettent aux cœurs François toute bonne esperance.

AMOVR ECHA VDE' DV
GREC DE DORAT.

AMour vn jour suiuoit sa mere
Dans les forges de son beau pere,
Et s'apperçut d'vn lingot d'or
Beau-luisant, mais tout chaud encor,
Bien qu'il n'en donnast apparance.
Le petit follement s'auance
Epris de la belle blondeur
De l'or qui jettoit sa splendeur,
Et sa main soudain en approuche,
Et de ses doigts tendrets le touche,

D ij

I I. L I V R E

Qu'echaudeZ il en retira,
 Et s'écriant se colera,
 Tapant la terre de grand' rage
 Qu'il enduroit en son courage,
 Et comme forcené s'en prit
 Au Dieu Vulcan, qui s'en sourit,
 Et tout enragé l'injurie:

Malheureux plein de tromperie,
 Contre le fevre s'écriant,
 Qui le reflate en souriant.

Mignon, à cet or tu ressembles,
 Par dehors ainsi beau tu sembles,
 Comme cet or qui luit & cuit:
 Ainsi ton feu caché reluit,
 De ce feu sécret tu enflâmes
 Des amoureux trompez les âmes.
 Sçachant donc comme tu méfais
 Souffre ce que souffrir tu fais.

PEuples n'en douteZ pas le Grand Dieu favorise
 Ce mariage saint bien heureux à la France.
 Le ciel beau, clair & net approuve l'aliance:
 Le Soleil rit sercin à si bonne entreprise.
 Eteignez la fureur, dont la raison surprise
 A rancueur s'enflammout par trop grand' oubliance:
 Vous partizans vnis perdez la deffiance:
 Paix, foy, vraye amitié se recherche & se prise.
DIEU, le grand Dieu commun de la race des hommes,
 Deteste toute haine, aborre la discorde.

Nô par luy mais par nous en mille maux nous sômes.
 Soit par ce bon lien heureuse vostre vie,
 O Noble Sang Royal : Et que vostre concorde
 Les courages François à concorde conuie.

DE TELIER.

Telier, tu es jeune & dispos,
 Sain & beau, mais à tout propos
 Tu nous parles de ta Fleurie,
 Et veux qu'à elle on te marie.
 Vrayment il ne tient pas à toy:
 Car soir & matin ie te voy
 Aller & venir apres elle
 Autant que s'elle étoit plus belle:
 Et si elle est vieille morueuse,
 Punaise, crassuse, baveuse:
 Toutefois tu ne veux lesser
 Pour cela de la pourchasser.
 Dy Telier : qu'a telle de bon?
 C'est qu'elle crache son poumon.

EPIGRAMME D'VN PETIT CHIEN.

VN chien gist sous ce tumbeau
 Qui ne fut ny bon ny beau,
 Le peu de tems qu'il véquit:
 Mais en bon heur il veinquit
 Les chiens de plus longue vie,
 Qui luy porteroient enuie,
 Et qui voudroyent, pour le bien
 Qu'auoit ce laid petit chien,
 Viure moins qu'il n'a vécu:

Combien qu'ils l'eussent veincu
 En fidelle loyauté
 En toute grace & beauté.
 A sa mort & à sa vie
 Des chiens portcrent enuie:
 Et non des chiens seulement,
 Mais il cut tel tretement,
 Qu'un homme que ie sçay bien
 Eust voulu estre ce chien.
 Et ce n'est rien de merueille:
 Car, combien qu'il eust l'oreille
 Et le museau d'un renard,
 Et l'allure d'un canard,
 D'une cheueche les yeux
 Petits, vilains, chassieux,
 Et le poil aussi rebours
 Comme la peau d'un vieil ours:
 Toutefois il eut tant d'heur
 Que de sentir la faueur
 D'une belle damoyelle,
 Qui le portoit avec elle,
 L'embrassoit & le baisoit,
 Et bien souuent luy faisoit
 Part de son lit desiré,
 Où maint auoit aspiré
 En vain, car sa chasteté
 Leur amour a rejetté.

Or ce petit chien est mort,
 Et a fait marrir bien fort
 Celle qui l'a tant aimé,
 Qu'el ne l'a point desaimé

Ny vif ny mort : mais voulant
 Témoigner son cœur dolant
 Et son amitié parfète,
 A ce chien qu'elle regrète,
 Qui ne fut ny bon ny beau
 Elle donne ce tumbeau,
 Et recompense sa vie
 Au bout de trois mois rauie,
 Faisant que ceux qui viendront
 Son peu de vie entandront.
 Et vraiment pour le bon zèle
 Que j'ay à la Damoiselle
 J'en voudroy beaucoup écrire:
 Mais ie ne sçay plus que dire
 De son petit chien, sinon
 Qu'il est mort sans auoir nom.

E P I T A P H E.

PAUURES Cors où logeoyent ces esprits turbulans,
 Naguieres la terreur des Princes de la terre,
 Mesmes contre le ciel osans faire la guerre,
 Deloiaux, obstinez, peruers & violans.
 Aujourdhuy le repas des animaux volans
 Et rampans charogniers, & de ces vers qu'enferre
 La puante voirie, & du peuple qui erre
 Sous les fleuves profonds en la mer se coulans.
 PAUURES Cors reposez, si vos malheureux os,
 Nerfs & veines & chair, sont dignes de repos,
 Qui ne purent souffrir le repos en la France.
 Esprits dans les carfours toutes les nuits criez:
 O Mortels auertis & voiez & croiez,
 Que le forfait retarde & ne fut la vengeance.

II. LIVRE
MASCARADE EN LA
MAISON DE VILLE A PARIS.

LES NYMPHES.

Bien-heureux le bon vent qui souffloit dessus l'eau,
Heureux le gouvernail, la voile & le cordage,
Heureux l'embarquement, heureux le nauigage,
Et bien-heureux le port, dou' partit ce vaisseau.
Heureux le jour & l'heure, où d'un butin si beau
Cette nef se chargea, qui d'un ardent pillage
Captiues nous tira d'une terre sauvage,
Pour jouir du bon heur de ce pais nouveau.
Bien-heureuse est vraiment nostre captiuité,
Puis qu'en si bonnes mains nous deuions estre mises
Des sages gouverneurs de si noble Cité:
Où, puis que leur conseil maintient l'égalité,
La Paix & l'abondance en leur honneur remises,
Ma prison je prefere à toute liberté.

A N A G R A M M E S.

QUI voudra m'offrir son seruice,
Qu'il ait le cœur net & entier
De toute ordure & de tout vice,
DV MAL IE N'Y DONNE LOYER.
Mais il faut bien pour récompense,
Estant tel, qu'il soit assuré
De me trouuer en ma constance,
DIGNE DE MON LOYAL IURE'.
A L'AMI DVRE LOY IE DONNE,

IE M'Y DONNE LA RVDE LOY
 De n'aimer aucune personne,
 S'il ne me fait preuve de foy:
 CAR LE DVR MAL Y DONNE IOYE,
 Qu'en bien lon voit souuent tourner,
 Deuant que le fiel il essaye
 MON MIEL ANVL IE DOY DONNER.
 Donc, si l'amant se veut soumettre
 Pour me seruir en cette loy,
 A la fin ie ven luy promettre,
 Que l'ame donner ie luy doy.

EPITAPHE DE THOMAS HOBBI.

Thomas Hobbi, riche des biens d'esprit,
 Et de nature, & des dons de fortune,
 A pris en gré la mort à tous commune,
 Rendant heureux son ame en IESV CHRIST.
 Paris le veit Ambassadeur venir,
 Et tost apres sortir de cette vie:
 EliZabeth sa chere compagnie
 Par ses sanglots ne le put retenir.
 Il part d'icy son cors ayant quitté
 Hors son país en estrangere terre,
 EliZabeth redonne à l'Angleterre,
 Le nourrisson qu'elle auoit alatté:
 Donne à ce cors ces pleurs & ce tombeau,
 En témoignant l'amour incomparable
 Vers son mary, & le dueil perdurable,
 Qui luy sera tousiours frais & nouveau.
 Ces deux époux ont bien vescu d'accord

II. LIVRE

*Jusqu'au depart, que Hobby las de vivre
Veut seul mourir, sa femme le veut suivre,
Et n'urent onc entre eux que ce discord.*

A R O B I N E.

TV me dis, bon jour, si ie passe
Deuant toy, ores que ta grace,
Robine, que ton œil riant,
Que ton ris mignard & friant,
Qui mes sens auoyent éperdus,
Tous leurs ameçons ont perdus.

Tu me ris maintenant, Robine,
Quand celle cheuelure orine,
Qui paroît ta teste crepuë
Est toute acourcie & rompuë:
Quand celle luisante blondeur
Se déteint en grise laidetur.

Ie te suply, Robine, laisse
Toute cette vaine caresse,
Et trop tardive courtoisie:
La par moy ne sera choisie
Pour la fleur la ronce : l'étrain
Ne me paye point sans le grain.

D E M I S S I R M A C É.

Quelcun voyant missir Macé,
Bien que par son âge passé
Il eust eu de grans infortunes
A suivre les amours communes,

Ne desister d'aller en queste,
 Ne desister de faire feste
 Aux filles pour les aculer,
 En amy vint à luy parler.

Comment n'estes-vous pas content,
 Messir Macé, d'auoir u tant
 Et tant de mauuaises fortunes
 A suiure les amours communes?
 D'auoir si roide la verole,
 Que vous n'auetz dent qui n'en grole?
 D'auoir la verole si bien,
 Que du nés ne vous reste rien?
 D'auoir tout le palais mangé,
 Et d'auoir de chancre rongé
 Vostre membre plus qu'à demy?

Mais ne voulez-vous, mon amy,
 Ne voulez-vous laisser de suiure
 Toujours le mesme train de viure?
 Mais laissez le messir Macé,
 Contentez-vous du tems passé:
 Pensez au moins pour l'auenir
 Vn petit de vous contenir,
 Et vous retirez de formais:
 Il vaut bien mieux tard que jamais.

Messir Macé, qui ne s'en chaut,
 Luy répondit en son renaud:
 Vertu hieu faites vostre affaire,
 Et me laissez la mienne faire.
 Et bien, quoy? voulez-vous, beau sire,
 Qu'à ma perte ie me retire?

II. LIVRE
DV CONTE DE BRISSAC,

BRissac le vaillant fils d'un sage vaillant pere,
Pouuoit bien, caſanant, du labour paternel,
Cueillir l'aise & le fruit : mais n'aimant rien de tel
Haït le mol repos comme dure miſere.
Et tenant de vertu la ſente non vulgaire,
Braue ſe couronna d'un lorier eternal,
Qui ſe vend pour la mort : Quand ieune Coronel
Ouuroit aux vieils ſoldats le chemin de bien faire.
Quand deuant Muſſidan (Muſſidan l'excreé)
Après mille haſars encourus de ſon gré,
Gaigna ſi beau loyer en perdant ſa ieuneſſe.
Plorons noſtre dommage : & louons ſon bon heur :
Car ieune en bien mourant ſeul il a plus d'honneur,
Que mille bien vaillans qui ſont morts en vieilleſſe.

E P I T A P H E D E S I L L A C .

O Malheureux diſcord ruïneur de la France,
Tu as tué Sillac : & ne l'a garenty,
Ny de Dieu, ny du Roy le fidele party,
Ny ſon loyal amour, ny ſa ieune vaillance.
Le ſoulas gracieux de la belle eſperance,
Que tous les ſiens prenoyent, en dueil eſt conuerty :
Vous Dieux qu'il aimoit tant, que n'avez diuerty
De ſi hatieue mort la verde violence ?
O Mars, il t'a proué combien il t'honoroit,
Ne fuyant nul haſard. Renuoyant à ſa Dame
Le gage de ſa foy alheure qu'il mourroit,
Tien il eſtoit, Amour. Ah, Dieux vous auez tort !
Ta mort eſt en viable, ô Sillac, qui rens l'ame
D'un ſoupir de l'Amour, & non pas de la mort.

DV Turc ny de l'Empire
Le soin ne me martire:
Des grans biens le soucy
Ne me rauit aussi:
Enuie en nulle sorte
Aux grandeurs ie ne porte,
Ny aux pompeux arrois
Des plus superbes Rois.

Tant seulement j'ay cure
D'oindre ma cheuelure
D'vn parfum odorant,
Ou d'vne eau dou-flerant,
De senteurs composee
Voir ma barbe arrosée.

J'ay cure de chapeaux
Flcuris flerans & beaux
Me couronner la tiste,
De chapeaux que m'apreste
La delicate main
D'vne de qui soudain
Bras & mains ie retienne,
Luy disant: Toute mienne,
Ma mignarde, mon cœur,
Qui fus toute rigueur,
Ma barbotante bouche
Le vres sur le vres bouche:
Ca dardille au dedans
De mes lasiues dents,
Le bout de ta languette

II. LIVRE

Moite, douce, mollette,
 Permé-moy par amour
 Te la rendre à mon tour.
 C'est-là tout mon ennuy,
 J'ay soucy du jourdhuy:
 Bien fol est qui prend cure
 Pour la chose future:
 Qui sçait le lendemain?
 Sus, d'une ouvrierie main,
 Fay moy Vulcain, sus l'heure,
 Non vne dure armecure
 D'un éclattant acier,
 Non un large bouclier,
 Non pas un simeterre.
 Qu'ay-je affaire à la guerre?
 Plustost creuse forgeant
 Vne tasse d'argent,
 Et me fais autour d'elle,
 Non la guerre cruelle
 Des meurdres outrageux,
 Non les vens orageux,
 Ny sur la mer chenuë
 Vne effroiabile nuë,
 Ny les mats éclattez
 Par les flots écartez:
 Mais des vignes rampantes,
 Mais des grappes riantes,
 Mais Bacchus couronné
 De pampre, environné
 De maint cornu Satyre,
 Qui le lourd asne tire,

*Sur qui Silen monté
 Se panchotte à costé.
 M'amour y soit grauee
 En argent éleuee,
 Et la belle Venus,
 Et ses mignons tous nus.*

PRIERE A DIEV POVR
 LA SANTE DV ROY.

ETernel Tout-puissant, sous qui branle ce monde,
 O Dieu, qui de clemence & de douceur abonde,
 S'il est vray que tu as quelque soin des mortels,
 Si les vœus qu'ils te font deuant tes saints autels,
 Et de bouche & de cœur jusques à toy paruiennent,
 Si tu en as pitié, quand humbles ils se viennent
 Prosterner deuant toy, repandans larmes d'yeux,
 Et faisans piteux cris, qui montent jusqu'aux cieux,
 Aye pitié de nous, entan nostre priere,
 Et ton œil de faueur ne tourne point arriere
 De nous, qui te prions pour la santé du R O Y,
 Du R O Y, que nous aimons comme donné de toy
 Et créé de ta main. Tu ne fis jamais naistre
 Pour commander aux siens vn plus graci.ux maistre:
 Comme vn bon pere & doux son peuple regissant,
 Il a comme vn bon fils vn peuple obeissant.
 Aujourdhuy que les tiens ont u l'heur que la guerre,
 Ce vieil monstre cruel, est chassé de leur terre,
 Et qu'elle est abymee au plus profond d'enfer,
 Où elle est enferree à cent chaines de fer,
 Et que la bonne Paix montrant son doux visage,

II. LIVRE

Joint nos Roys alliez d'un tressaint mariage,
 Au milieu des festins, au milieu du plaisir.
 La Megere (ô douleur!) vient nostre Roy choisir,
 Et par un seruiteur lors au Roy plus fidelle
 L'a fait naurer à mort O lance trop cruelle!
 O que le foudre eust mis en poudre le sapin
 Dont fut dressé ton fust à si méchante fin!
 Dieu juste l'a voulu, qui sus nostre bon Prince,
 Châtie les pechez de toute sa prouince.
 O Seigneur, montre-toy rigoureux contre nous,
 Mais qu'enuers nostre Roy tu te monstres plus doux.
 Il n'y a plus espoir que l'humaine science
 Nous le puisse garder: si auons-nous fiance,
 Seigneur, en ton secours. Souuent ta sainte main
 A donné bon remede au desespoir humain.

ESTRENE POVR

VNE DAME.

VOUS estant seigneur & maistre
 De tout ce qui mien peut estre,
 Rien ne me reste à donner
 Dont ie vous puisse étrener:
 Mais de toute ma puissance
 Témoignant l'obeissance
 Que vous porte & porteray,
 Tout bien vous souhaiteray.
 Pour étrener vous souhaite
 La double santé parfaite:
 Le cors sans mal ennuyeux,
 L'esprit serein & joyeux.

Du Roy, de Monsieur son frere,
 Et de la Royne sa mere,
 De toutes Dames d'honneur,
 Et des plus grans la faueur:
 Des vos pareils sans querelle
 L'amitié ferme & fidelle:
 Des moindres sans fiction
 La loyale affection.
 Bref, que tout heur fauorise
 Chacune vostre entreprise
 En prospere auancement,
 Et parfait contentement.
 C'est dequoy ie vous étreine.
 Ma priere ne soit vaine:
 Mais si étiez en é moy
 Quelle étreine veu pour moy:
 C'est, Monsieur, que ie desire,
 Qu'un bon ange vous inspire
 De haster vostre retour
 Pour faire icy long sejour,
 Et qui dure dauantage,
 Que ne fait ce long voyage,
 Que la Court fait maintenant
 Si tresloin vous promenant.

A MONSIEUR

D'EVREUX.

Vous pourriez me blâmer avec bonne raison,
 Si ie n'auoy le cœur de vous faire aparaitre
 De quelle affection ie voudroy reconoitre

II. LIVRE

L'honneur que ie reçois d'estre en vostre maison.
 Mais, Monsieur, quand ie cuide inuoyer Apollon,
 Pour me fournir de quoy vous donner à conoistre,
 Que ie ne suis ingrat, ny ie ne voudroy l'estre,
 Il ne daigne laisser pour moy son Helicon.
 Les Muses n'en font moins : car j'ay beau les semondre
 Me presteur leur faueur, des sourdes elles font,
 Et d'un seul petit vers ne me daignent répondre.
 Monsieur, pardonnez moy, leur sainteté ie jure,
 S'un jour à ma faueur enclines elles sont,
 De mon répit trop long ie vous payay l'vsure.

EPITAPHE DV CŒVR DV ROY HENRY II.

DV Roy Henry second icy fut mis le cœur,
 Lequel tant qu'il batit dans son cors plein de vie
 Iamais ne fut veincu ny de peur ny d'enuie,
 Ny troublé de courroux ny brullé de rancueur.
 Mais il fut le séjour de bonté, de douceur,
 D'honeste affection, d'humaine courtoisie,
 Outre d'une vertu sur les vertus choisie,
 Par laquelle il estoit de tous cœurs ravisseur.
 I'en appelle à témoin les soupirs & les larmes
 Qu'en jettent aujourd'huy non les siens seulement,
 Mais ceux qui ont senty la force de ses armes.
 Et si l'or ou les pleurs pouuoient faire plus tendre
 Le dur cœur de la mort, tous feroient tellement,
 Que la mort n'oseroit refuser de le rendre.

EPITAPHE DE FRANCOIS
OLIVIER CHANCELIER DE FRANCE.

ICy gist Olivier honneur de la justice,
De qui le grave front ceint de severité,
Fut l'apuy de vertu, de droit, de verité,
La ruine du faux, de l'injure & du vice.
Que nul viuant n'a veu corrompu d'auarice,
Que faueur n'a iamais ébranlé d'équité,
Ny crainte d'un plus grand n'a fait qu'il ait quitté,
Pour luy complaire en rien le deu de son office.
Son cors qui fut icy, tant qu'il vit ce beau jour,
D'une ame tresdiuine honorable séjour
Est demeuré dans terre, au ciel l'ame est alee.
Dites, ô nobles cœurs, qui sa mort soupirez,
Qu' Olivier se mourant (& vous ne mentirez)
Justice avec son ame au ciel est reuolée.

DE PYTHAGORE.

BIen, Pythagore a defendu,
Que chose animee on ne mange,
Mais qui l'aura bien entendu
Ne le trouuera pas étrange.
Et vraiment comme luy se blâme,
Qui mange d'une beste en vie:
Mais si elle est bouillie ou rottie,
C'est tout un, il n'y a plus d'âme.

II. LIVRE
ETRENE,

POUR vous de qui ie reçoÿ
Tant d'honeste courtoisie,
A point, si ne me deçoÿ,
Vne étreine i'ay choisie:
Ce n'est ny medaille antique,
Ny vase d'or ou d'argent:
C'est vn present de Musique,
Ouurage de mon art gent.
Prenés-le donc amiable:
Car nul joyau precieux
Ne vous est tant agreable,
Qu'est vn chant delicieux.

D'ANNE,

ANNE vn énigme vous ameine
Digne de la sfinge Thebeine:
Sans ribaud ellë est aduultere,
Deuine χ comme il se peut faire.

DE CLAUDINE,

SI Claudine est toute sculette,
Son mary ne pleurera point:
Si quelcun vient voir la saffrete
ses larmes luy saillent a point.
Claudine, il ne fait pas vray deul,
Qui brigue vn honneur de sa plainte:
Mais qui se lamente etant seul,
En son deul n'y a point de feinte.

A MONSIEVR DE LANSAC.

Vous de qui les vertus, LANSAC, ont merité
 Que soiez apellé pres du Roy pour escorte
 De son cœur genereux en sa jeunesse, acorte
 Par vous, l'exemple vis de toute integrité.
 Nostre siecle vous doit de vostre probité
 L'ineestimable fruit qu'en public il raporte.
 D'Achille & son Fenix la gloire n'est pas morte;
 Charle & Lansac viuront à la posterité.
 Bien digne fustes-vous (par vostre experience
 Et sagesse & bonté qui par le monde luit)
 Du lieu que vous tenez aupres du Roy de France.
 Quelque fort tems qu'il face vn seul espoir nous guide,
 Le port attend la nef qu'un bon Tiphus conduit.
 Il ne peut mal guider qui prend le ciel pour guide.

L'Assurance en papier, LANSAC, m'est demeuree,
 Et l'espoir languissant d'un louable suport
 Par un refus ingrat honteusement est mort,
 Grand' vergongne à la France : ô siison de ploreé !
 Les fous entretenus ont leur vie assuree,
 Le docte meurt de faim : l'homme de bien, à tort
 Delaisé, pauvre, nu, voit le méchant plus fort :
 Le vice est adoré, vertu deshonorée :
 L'humanité fait joug sous la cruauté fiere,
 Ignorance regist, sçauoir gist alcnucrs :
 L'indigne est en auant, le digne est en arriere.
 Je maudy la fortune, ie maudy la nature,
 Qui marastre me donne, en siecl si peruers,
 Et pais si brutal, naissance & nourriture.

II. LIVRE
A MESSIEURS LES PRE-
VOST ET ECHEVINS DE PARIS.

Messieurs, Baif qui n'a ny rente ny office
En vostre Preuosté, ne pas vn benefice
En vostre Diocèse, & qui n'est point lié:
Mais, s'il veut, vagabond, ny mort ny marié,
Ny prestre, seulement cleric à simple tonsure,
Qu'il a pris à Paris avec sa nourriture,
Pour laquelle il s'y aime, & y tient sa maison,
En faisant son païs, non pour autre raison,
Que pour libre jouir d'un honeste repos.
Ce Baif fait sa plainte, & dit que sans propos,
Et sans auoir egard à son peu de cheuance,
A sa profession, & à sa remontrance,
Son voisinage veut le contreindre d'aller
A la garde & au guet, le voulant égaller
De tous points par cela au simple populaire,
Et contre son dessein l'attacher au vulgaire,
Duquel tant qu'il a pu, il n'a u plus grand soin
En toutes actions, que s'en tirer bien loin:
Et pource il a choisi aux fauxbourgs sa retraite,
Loin du bruit de la ville en demeure segrette.
Ainsi dans vos maisons loge Paix & planté,
Baif comme d'emprunt, soit du guet exempté.

A MARMOT.

NON, ie ne t'aime point, Marmot,
Pourquoy c'est, ie n'en diray mot.
Mais ie te diray bien vn point:
Non, Marmot, ie ne t'aime point.

DES PASSETEM S. 37
AV SEIGNEVR SIMON
NICOLAS SECRETAIRE DV ROY.

Nicolas, si tu veuX sçauoir,
Quelle amie ie veuX auoir:
Ie ne veu qu'elle soit trop promte,
Ne qu'elle ait aussi trop de honte.
Ny trop enfant ie ne la veuX,
Ny trop femme : mais entre deux.
Simon, entre deux mers ie nage:
Sur tout me plaist le moyen âge.
Ie ne cherche où ie veuX aimer,
Ny me souler ny m'afamer.

AMOVR SE SOLEILLANT,
DV GREC DE IAN DORAT.

VOY comme Amour qui tout donte,
Cruel des pleurs ne fait conte
De nous chetifs amoureux
Qui viuotons langoureux,
Comme Dorat, de la Muse,
Qui ses dons ne luy refuse,
Premierement enchanté,
En vers Gregeois l'a chanté.

S VR la tendrette verdure
Au fort de la grand' froidure
Cupidon se soleillant
Contre le midy grillant,
Ainsi qu'une blonde auette
Deploya sa double alette.

II. LIVRE

Soudain à foison il plut,
 si bien que Cupidon ut
 De ceste pluye tombee
 L'une & l'autre æle trempee,
 Si bien que deçà delà
 Comme deuant ne vola
 Par les fleurs : mais ainsi comme
 Quelque pauvre chetif homme
 De tous ses membres perclus,
 D'un estat ne bougeoit plus.

Or comme il se desespere
 Voicy arriuer sa mere,
 Qui cendres chaudes épand
 Dessur luy, comme vn enfant
 Qui vne mouche empanee,
 Apres qu'il l'a bien plongee
 En l'eau dedans vn bassin,
 La voyant noyee, en fin
 D'un chaud cendrier la poudroye:
 Et soudain elle (grand joye
 Et merueille à qui là est)
 Reuole ensemble & reneft.
 Amour en la mesme sorte,
 Que reuit la mouche morte,
 Vn ælé comme vn ælé,
 En vie fut rapelé.

De là vient qu'Amour encore
 Loing des amoureux s'effore,
 Comme ayant encore peur
 D'être mouillé de leur pleur.
 Comme estant encor en doute

Que desur luy ne degoute,
Des amans il se tient loing
Et de nos larmes n'a soing.

A MONSIEVR DE LOVYE.

LON dit que c'est plaisir, quand la nuë orageuse
Couure l'air obscurcy, quand les vents furieux
Brassent la mer grondante, ores touchant les cieux,
Ores ouurant l'enfer d'une grand fosse creuse:
A couuert d'un rocher voir la troupe poureuse
Des estrangers courir la fortune à nos yeux:
Non que du mal d'autruy lors nous soyons joyeux,
Ains d'estre à sauueté de la mer dangereuse.
Mais quand tout nostre bien flote dans le nauire,
Lequel allant perir nous laisse vn viure pire
Que n'est mesme la Mort, ô la grieue douleur!
L'estranger recognoist nostre perte à son aise,
Nous, Dangennes, hélas! à qui tant elle poise,
Bien que loin, nous auons trop de part au malheur.

Desia le doux Printems nous rit & nous redonne
Après le rude yuer, vne gaye saison:
Le Soleil chaleureux émeut la fleurison
Des fruitiers promettans vn plantureux Autonne,
Naïde fait de fleurs mainte belle Couronne,
Procne estant de retour maçonne sa maison:
Laiſson, G R I F I N, laiſson le Concile, & faiſon
Vn voyage à Mantouë, à Vincence & Veronne.
Je fretille d'aller, ie desire de voir

II. LIVRE

Les villes d'Italie, & veu ramenteuoir
 Les marques des Romains, jadis Rois de la terre.
 A Dieu Trente pierreuse, à Dieu les mons chenus,
 Qui environ cinq mois nous auez retenus,
 Quand la France bouilloit d'une felonnie guerre.

LE grand Pythagoras en sa lettre fourchee
 Voulut représenter au vray la vie humaine,
 Qui s'ouvre en deux sentiers: Le gauche au vice mené,
 Le dextre à la vertu, comme l'ame est touchée.
 La voye de vertu haute, roide, empeschée
 D'espines & cailloux, se passe à toute peine:
 Celle du vice emporte en descente soudaine
 Sans travail, la grand' tourbe à ses plaisirs laschée:
 Mais les mal-conseilleez atravers les delices
 Sans qu'ils s'en donnent garde, en profonds precipices
 Se trouvent confinez au val de repentance.
 Les autres courageux à la vertu pretendent,
 Qui par grande sueur sur la cime se rendent,
 Pour cueillir des travaux l'heureuse recompense.

VLYSSE tresloué, grand honneur des Gregeois,
 Sus en ce bord icy vien ancrer ton navire,
 Pour ouïr la chanson que nous te voulons dire,
 Et les diuins accens de nostre belle voix.
 Jamais nul étranger en vaisseau noir de poix,
 Passant par ce país ne peut nous écondire
 D'aprendre quel doux miel de nos bouches se tire,

Mais s'en va plus joyeux & sçauant à la fois.
 Nous sçauons les beaux faits des Heros anciens,
 Comme Argon raporta la dépouille doree,
 Ce qu'Helene a valu aux Grecs & Phrygiens.
 Nous sçauons ce qu'on fait aujourd'huy sur la terre:
 A nous premieres vient la nouvelle asseuree,
 Et de tout fait de Paix, & de tout fait de guerre.

DE FRANCOIS RABELAIS.

I' Ay, moy nouveau Democrit,
 Ry de tout par maint écrit,
 Que sans rire on ne peut lire:
 En fin la mort qui tout rit
 Se riant de moy m'aprit
 A rire d'vn ris sans rire.

P R I A P E.

SImple passant t'enquiers-tu,
 Pourquoi ie ne suis vestu
 En ma honteuse partie?
 Veux-tu que ie te le die?
 Je le diray : mais dy moy
 Tout premierement pourquoi,
 Nul Dieu le baston qu'il porte
 Ne cache en aucune sorte?
 L'Empereur de l'vniuers
 Ses foudres ne tient couuers,
 Neptune son salu ne cache,
 Pallas ne couure sa hache,

II. LIVRE

Ny sa coutelasse Mars:
 Diane monstre ses arcs:
 Apollon ne tient secrettes
 Sa trouffe ny ses sagettes:
 Ny le petit Cupidon
 Ne cele point son brandon.
 Bacche son thirse ne couure,
 Hercul sa masse decouure:
 Le heraut aussi des Dieux
 Monstre sa verge à vos yeux.

Or que nul non plus estime
 Qu'en cecy ie face crime,
 si mon baston decouuert
 Ie ten à tous à l'ouuert:
 Ostez ce baston, au reste
 Denué d'armes ie reste.
 Ne me soyent doncques vos yeux
 De mon baston enuieux.

AMOUR OYSEAV.

VN enfant oyselcur jadis en vn bocage
 Giboyant aux oyseaux, veit dessus le branchage
 D'un houx, Amour assis : & l'ayant apperçu
 Il a dedans son cœur vn grand plaisir conçu.
 Car l'oiseau sembloit grand: ses gluaux il apreste,
 L'attend & le cheuale, & guetant à sa queste
 Tasche de l'asseurer ainsi qu'il sautoit:
 En fin il s'ennuya de quoy si mal alloit
 Toute sa chasse vaine : & ses gluaux il ruë,
 Et va vers vn vieillard estant à la charruë,

Qui luy auoit appris le mestier d'oyselcur:
 Se plaint, & parle à luy : luy comte son malheur,
 Luy monstre Amour branché. Le vieillard luy va dire
 Hochant son chef grison & se ridant de rire:

Laisse, laisse garçon, cesse de pourchasser
 La chasse que tu fais, garde toy de chasser
 Apres vn tel oyseau: telle proye est mauuaise,
 Tant que tu la lairras, tu seras à ton aise,
 Mais si à l'âge d'homme vne fois tu atteins,
 Cet oyseau qui te fuit & de qui tu te plains
 Comme trop sautelant, de son motif s'apreste,
 Venant à l'impourueu se planter sur ta teste.

D'ELISABET DE FRANCE,
 ROYNE D'ESPAGNE.

DES ROYS fille, sœur, femme, ELISABET de
 FRANCE,

Des ROYNES l'ornement, la fleur de pieté,
 Le baume de douceur & de bonnairété,
 Le seur gage de paix & de sainte alliance,
 Par toy, maudite Mort, a fraudé l'esperance
 De son trescher Espoux, qui ne l'a merité:
 Mais se promettoit d'elle vne posterité
 Qui dcust regir l'Espagne en paisible assurance.
 O Mort, tu la rauis au printems de son âge,
 Comme vne belle fleur, qui son tendre feillage
 Espanist, embaumant l'air de soueue odeur.
 Sa fleur Royale morte est des Rois lamentee:
 L'odeur, que ses vertus Royales ont getee,
 Tousiours viue remplit du monde la grandeur.

I I. L I V R E

Que nous vaut, Hennequin, par des rymes pleintives
 Ne nostre cher país les malheurs lamenter,
 Sinon pour de plus fort nos douleurs augmenter,
 Et les faire apres nous miserablement viues?
 Le triste souuenir des fortunes chetiues
 Par condolence ira nos enfans tourmenter.
 Nos maux qui ne deuoyent hors de nous s'éuenter
 Se deuoyent estoufer dans nos fosses oysiués.
 Par nous qui nous pleignons en écrits lamentables,
 Nos faits, nostre âge, & nous, demourrons detestables,
 Execrables, maudits à la posterité.
 Ie voy ce que ie dy, ie le scay, ie le pense,
 Et ne puis n'encourir la mesme doléance:
 Car les pleurs, Hennequin, sont pleurs d'aduersité.

D V N E Z D E G E R M A I N .

IL n'est possible que Germain
 Son nez avec sa main touche,
 Pource que sa trop courte main
 De son nez la longueur n'approuche,
 Mesme il ne s'oit éternuer,
 Et si, Dieu vous aid, on luy crie,
 Ne daigneroit s'en remuer,
 Pensant que ce soit moquerie.

D E G I L O N .

Tu demandes si ie soupçonne,
 Gilon, que Bastien te ramonne:
 Ma foy non, te respon-ie. Et puis

Tu me demandes si ie suis
 De ceux qui en ont deffiance:
 Ma foy non : apres si ie pense
 Qu'il en soit rien : non par ma foy
 Ie ne le pense, ie le croy.

A V X C A T O N S.

S'IL vous desplaist de me lire,
 Si vous m'avez regetté
 Pour peu de lasciueté,
 Dequoy vous feray-ie rire?

A V B A D E D E M A Y.

M^Ere d'Amour Venus la belle
 Que n'as-tu mis en ta tutelle
 Du beau May le mois vigoureux?
 Si l'Auril a pris ton cœur tendre,
 Au moins ton fils Amour dût prendre
 Du doux May le tems amoureux.

May, qui non seulement deuance
 A vril en douceur & plaisance,
 Mais qui seul encore vaut mieux
 Que tout le reste que l'an dure,
 Gâté de chaud ou de froidure,
 Tant tu es doux & gracieux.

May le plus beau mois de l'annee,
 Montre la teste couronnee
 D'un printems d'odorantes fleurs:
 Méne ta bande d'alegresse,

I I. L I V R E

Le ris les jeux & la jeunesse:
 Chasse le soin & les douleurs.
 Bien qu'Avril de Venus se louë,
 Qui le celebre & qui l'anouë,
 Si le surpasses-tu d'autant,
 Que le bouton clos de la Rose
 Est moindre que la rose éclosë,
 Qui sa fleur au Soleil étand:
 D'autant que la frêlle esperance
 Est moindre que la jouissance
 Entre deux Amans bien apris:
 D'autant que madame surpasse,
 Parfète en toute bonne grace,
 Les beautés de plus rare pris.

A M O N S E I G N E V R
 D E L A N S A C.

DEbonnaire LANSAC, des Musés le support,
 En qui toutes vertus, par ce tems de malice
 Pour eüter l'aguet & l'outrage du vice,
 Trouuent leur sauueté comme dedans leur port.
 Je sen du mauuais tems le violent effort,
 Et l'epargne du Roy nous estre mal propice:
 Mais mon malheur plus fort empesche que ie puisse
 Esperer d'autre part secourable confort.
 Autant que ie l'ay peu, j'ay celé ma souffrance:
 Nul ne m'a veu courir importun à la court,
 Bien que d'un don de Roy j'eusse bonne assurance.
 Assurance en papier: Vous, ô mon esperance,
 Pouuez faire assigner ce don Royal si court,
 Qu'il n'importe de rien aux affaires de France.

AV SIEVR CHO-

MEDEY.

NVL ne doit attenter maniments d'importance,
 Qui pour choisir le bien & rejeter le mal,
 N'a le bon naturel au sens acquis egal,
 Fait sage & bien instruit par longue experience.

Mais le cours de nos ans precipité s'avance,
 Comme l'eau des torrens roulante contre val:
 Et tronqué plus souuent du dernier jour fatal,
 Fait des hommes mortels auorter la prudence.

CHOMEDEY, tu cognus nostre foiblesse humaine,
 Et que l'histoire en est la guerison certaine,
 Quand tu fis pour les tiens ceste belle entreprise.

C'est au peuple François de t'en rendre l'honneur,
 Qui va cueillir le fruit de peine si bien prise,
 Qu'il n'appartient qu'au Roy d'en estre guerdonneur.

L A R O S E.

DVrant cette saison belle
 Du renouveau gracieux,
 Lors que tout se renouuelle
 Plein d'amour delicieux,
 Ny par la peinte prerie,
 Ny sus la haye fleurie,
 Ny dans le plus beau jardin,
 Ie ne voy fleur si esquisé
 Que plus qu'elle ie ne prise
 La Rose au parfun diuin.
 Mais la blanche ne m'agree

II. LIVRE

Blême de morte paleur,
 Ny la rouge coloree
 D'une sanglante couleur.
 L'une de blêmeur malade,
 Et l'autre de senteur fade,
 Ne plét au nés ny à l'œil:
 Toutes les autres surpasse,
 Celle qui viue compasse
 De ces deux vn teint vermeil.

La Rose incarnate est celle
 Où ie pren plus de plaisir:
 Mais combien qu'elle soit telle
 Si la veu-ie bien choisir.
 Car l'une prise en vne heure,
 Et l'autre en l'autre est meilleure
 Au chois de nostre raison.
 Toute chose naist, define,
 Tantôt croît & puis decline
 Selon sa propre saison.

Ie ne forceray la Rose
 Qui cache dans le giron
 D'un bouton étroit enclose
 La beauté de son fleuron.
 Quelque impatient la cucille
 Deuant que la fleur vermeille
 Montre son tresor ouuert.
 Mon desir ne me transporte
 Si fort que celle j'emporte
 Qui ne sent rien que le verd.

DES PASSETEMES. 43
A QUELQUE POETASTRE

TOY qui les tiennes ne decueuvres,
Tu viens blâmer tousiours mes œuvres.
Ou ne vien plus blamer les miennes,
Ou bien decouure nous les tiennes.

DE MICHEL LE
ROUX.

Michel le Roux aime Pernelle,
Son doux soulas & beau desir.
Couche quand il veut avec elle:
En peut faire tout son plaisir:
Et se plaint que depuis vn mois
Il n'a mis vn seul coup dedans.
On luy demandoit vne fois,
La raison? elle a mal aux dents.

A MADAMOYSELLE
DV LVDE.

IE ne croirdy jamais, tressage Damoyelle,
Que l'auengle Fortune eust puissance sur vous,
Et croy (pardonnez moy) qu'à tort de son courroux
Vous plaignez sãs auoir de quoy vous plaindre d'elle.
Puis entre les grands biens que nature amoncelle
Liberale en vous seule, à qui le ciel tant doux
Donna de si beaux dons, vous choysites sur tous
L'inuincible Vertu pour compagne fidelle.
C'est l'appuy de quoy Dieu munit vostre courage

II. LIVRE

Contre les flots diuers, & le venteux orage,
 Qui courent par la mer de ceste humaine vie.
 Fortune sur l'auoir exerce son Empire,
 La vaillante vertu ne la crainct ne desire,
 Mais contente & constante en son roc la desfe.

EPITAPHE DE CLAUDE NEUEU.

CLAUDE Neueu qui gist deffous la terre icy,
 Fut de son pere cher l'esperoir & le soucy:
 Son pere l'aima tant qu'estant tousiours en craincte
 Qu'il ne l'abandonnast, pour de douce contraincte
 Le pouuoir retenir bien aise en la maison,
 Deuant qu'il fust en âge en la riche prison
 Il le met d'une femme & belle & bien apprise,
 Jeune, luy jeune, & doux & riche: mais il prise
 L'honneur plus que son heur. car le desir trop grand
 Qu'il a d'auoir honneur, fait tant qu'il entreprend
 De rompre ces prisons: bien que sa femme belle
 Le deuoit retenir d'une douce cordelle:
 Bien que la reuerence & l'honneur qu'il deuoit
 A son pere ancien, arrester le deuoit.
 Toutefois ne pouuant dementir sa noblesse,
 Son gentil cœur s'émeut d'une noble allegresse
 Pour se trouuer aux lieux, en seruant à son Roy,
 De faire vaillamment braue prouue de foy:
 Mais deuant que remplir sa genereuse enuie
 Vne fievre, ô malheur, romt le cours de sa vie:
 La fievre en son voyage à Compiègne le prit,
 Et le ramene icy où la mort le surprit.

Or combien qu'en sa mort il regrette son pere,
 Qu'il n'eut moyen de voir, & sa femme treschere,
 Et bien qu'il ait raison de se plaindre du sort
 Qui en son plus jeune âge ainsi l'a mis à mort,
 Sçachant que tost ou tard nostre race est mortelle,
 Il a dueil seulement de quoy sa mort fut telle,
 Et voudroit qu'en mourant il eust en ce bon heur
 D'estre mort au combat dedans le lit d'honneur.

V O E V.

MOY Perrin, & ma Lucette,
 Lucette & moy son Perrin,
 Prins d'amoureuse sâgette
 Dessous vn pareil destin.
 Nous deux qu'vn amour assemble,
 O Deesse des amours,
 Te vouons ce lis ensemble
 Et ce vif passevelours.
 Comme la fleur immortelle
 De ce vif passevelours,
 Nostre amour perpetuelle
 Vue fleurisse tousiours.
 Ainsi que l'autre fleur blanche
 Luit en sa nette couleur,
 Nostre amitié pure & franche
 Blanchisse dans nostre cœur.
 Ainsi que ces deux fleurettes
 Iointes d'vn estroit lien,
 Venus de ses amourettes
 Ioine mon cœur & le sien.

II. LIVRE
A LA IEVNESSE SCAVANTE.

Iusques à quand ce serpent mille-teste
De son venin nous viendra repaisant,
Coiuant hideux d'un long repli pressant,
Nostre vulgaire enfançon de la beste?
Sifflera point du ciel vne tempeste
Qui son orgueil à coup vienne froissant,
Si qu'entre nous jamais n'apparoissant
D'un autre peuple il face la conqueste?
Viendra jamais l'Apollon Chassemal,
Qui luy tramant son dernier jour fatal,
De mille traits bouleuerse sa gloire?
Qui poussera dans ce Pithon ses traits,
Et qui fera huer le peuple apres,
Io Pean, Io Pean, Victoire?

DE BACCHE POSE'
PRES DE PALLAS.

DY, qu'as-tu de commun Bacchus avec Pallas?
A toy sont les banquets, à elle les combas?
Estranger qui t'enquiers du fait des Dieux si fort,
Appren en quoy ie suis avec elle d'accord.
Car j'aime aussi la guerre: vn chacun cognoist bien
Comme j'ay conquscé le pais Indien.
Les hommes de nous deux ont eu presens diuins:
D'elle l'oliue huileuse, & de moy les bons vins:
Oltre nous sommes nez sans trauail de la mere:
Elle du chef, & moy de la cuisse d'un pere.

A IS tant de nés que tu voudras,
Voire si grand nés, qu'vn Atlas
N'en püst porter vn tel qu'à peine,
S'il ne vouloit sortir d'alcine:
Et sois si gaudissant piqueur,
Que Mome mesme Dieu moqueur,
Quitast à tout sa moquerie
A ta piquante raillerie.
Voire si gaudissant piqueur,
Que Mome mesme Dieu moqueur
Piquasses de ta raillerie,
Moquant sa vaine moquerie,
Plus que moy si ne peux-tu pas
Médire de mes fots ébas.

Mais dy moy, sot, que te profite
Ronger la dent de dent depite?
Trouue où mordre, si tu n'es fou,
Et si tu cherches d'estre fou.
Tu dis que ie pér ma jeunesse,
Ie le sçay bien, & bien qu'en est-ce?
Et que ie pourroy faire mieux,
Si ie voulois, ie ne le veux:
Et que tout ne vaut vne maille
Ce que j'écry : vaille que vaille.
Ce n'est qu'ancres & papier perdu:
Long tems-a que l'ay entendu.

Mais à fin, naçu, que ta peine
A me remonter ne soit vaine,
Martelant ainsi d'vn marteau

II. LIVRE

Vn marteau, va-t'en brauoufseau,
 Chercher celuy qui se martelle,
 Pource qui part de sa ceruelle:
 Quant est de moy, ie ſçay fort bien
 Que tout ce que ie ſay n'eſt rien:
 Mais ce rien, rien de façon telle,
 Gentil gaudiſſeur, ie n'apelle,
 Que, ſi de bon œil t'en ébas,
 Et qu'à cœur jun ce ne ſoit pas,
 Tu ne trouues bien à le lire,
 Dequoy aprendre & dequoy rire.

V O E V.

MArtine la ribandiere
 Voue à Pallas ſon métier,
 Lequel d'une main ouuriere
 Elle ſouloit manier,
 Paiſſant au jour la journée,
 Par le travail de ſa main,
 Sur le riban dcmenee,
 Sa trop miſerable ſaim.
 Et de ſuiure delibere,
 Quittant le jeu de Pallas,
 Le jeu mignard de Cythere,
 Vuant des Cyprins ébas.
 Et quelle grand' merueille eſt-ce,
 Si pour la belle Cypris,
 Elle te quitte, Deeſſe,
 Te jugeant comme Paris?

ENVIE.

LE venim deséchant de l'enuie maline
 Des os émoëllez la force ronge & mine,
 Et tarit tout le sang des membres languoureux.
 Celuy qui porte enuie à l'heur d'un bien-heureux,
 A bon droit enragé se bourrelle soy-mesme,
 Par sa plainte est témoin de sa douleur extreme,
 Et sanglotte & fremit des machoires grinçant,
 Et voyant ce qu'il hait suinte froidissant.
 Un noir venim noircit sa langue dépiteuse,
 Son visage blemist d'une paleur hideuse:
 Ses os percent la peau : il est maigre & deffait:
 Ne peut souffrir le jour : pain & viande il hait:
 La bacchique liqueur ne luy est douce, voire
 Que par Iupiter mesme il fust prié de boire,
 Quand Hebé le seruant la coupe porteroit,
 Où le bel échançon la luy présenteroit.
 Le sommeil ne le prend, tant il est en martyre:
 Un bourreau sans pitié ses entrailles desfire:
 La furie Aleçon au dedans de son cœur
 Redouble coup sur coup la rage & la rancœur.
 Un autour Tityen sans relâche s'en paist:
 Dans l'estomac dolent un tel vlcere croest,
 Que la main de Chiron ne rendroit pas fermé,
 Febus ny de Febus le fils tant renommé.

V O E V.

MOy, Line, qui soulois suivre
 Le doux mettier de Cypris,
 Qui de mon gain soulois viure,

II. LIVRE

M'abandonnant à tout pris.
 Cypris j'ay abandonnee,
 Tondant mes vouez cheueux:
 Ore à Pallas adonnee,
 Son metier suiure ie veux.
 M'employant au chaste ouurage
 De son art que j'ay appris:
 En fin ayant l'auantage,
 Pallas a vaincu Cypris.

LA ROSE.

LA rose est vne belle fleur,
 Si on la cueille en sa vigueur.
 La voiez-vous fresche & fleurie?
 Ce soir elle sera fletrie.

PEAN DITHYRAM-
 BIQUE A LA SANTE.

O Santé la plus venerable
 De tous les Dieux,
 Puisé-je avec toy favorable
 Faire vn séjour gracieux
 Tout le reste de ma vie:
 Et qu'il ne te vint enuie
 En nulle saison
 D'abandonner ma petite maison.
 Car s'il y a quelque grace
 En nostre mortelle race
 De la richesse prisee,

Ou de la chere lignee,
 Voire de la bien-heureuse
 Royale Principauté,
 Ou de la joye amoureuse
 Pour vne emable beauté,
 Apres qui nous faisons la chasse
 De Venus veneurs secrets
 A l'emblee avec les rets,
 Qu'amour mesme ourdit & lasse.
 Ou si quelque autre ébatement
 Vient des diuines mains
 Aux calamiteux humains:
 Ou quelque relachement
 Pour respirer des trauaux
 Et des maux
 Dont nostre vie
 Est suiuiue,
 C'est avec toy bien-heureuse santé
 Que tout florit en gaieté:
 Et que des Graces le printems
 En tout tems
 Est vigoureux:
 Sans tes dons
 Beaux & bons,
 Rien ne peut estre hien-heureux.

AVANTURES A QUEL-
QUES DAMES NOTABLES.

Vous faites d'un pesant dédain,
 La preudefame resoluë:

II. LIVRE

Montrez le creux de vostre main,
 Vous l'estes, si elle est veluë.

Quoy que des femelles on die,
 Vous me semblés de gräd courage
 Et pour attendre assez hardie
 Deux voire trois en vn passage.

Maudit soit donques qui vous flate,
 Voire qui flater vous voudroit:
 Vous seriez tresbonne auocate,
 Vous n'aimez rien tant que le droit.

Ceux qui vous disent Huguenote
 Ils sont tous excommuniés:
 Trop volontiers femme deuote
 Vn aspergés vous maniez.

Quelque douceur qu'ayent vos yeux
 Je vous jugeroy, ma petite,
 D'estre courageuse & depite,
 Et pour vn coup d'en donner deux.

Vous auez noirs, gente brunete,
 Le teint, le poil, l'œil, le sourcy:
 On prend la noire violete,
 On laisse le jaune soucy.

Je le confesse que vous estes
 Vne catholique tresbonne,
 On le conoist par ce que faites
 Pour les gens qui portent couronne.

Tant elle est en tout merueilleuse,
 Belle, sçauante, jeune d'ans:
 Qui la gaste ? elle est orgueilleuse,
 Et ne fait conte que des grans.

Vous estes chés vous mal traitee,
 Si mon opinion n'est fausse,
 Ou bien vous estes degoustee,
 Et n'en voulez point sans la fausse.

Mere il ne s'en faut courroucer,
 Elle est foible non pas peruerse:
 On ne la peut si peu pousser,
 Qu'elle ne tombe à la renuerse.

Sa femme est vn peu langagere,
 Sans fin elle tance, elle hongne:
 Mais elle est bonne menagere,
 Elle met chacun en besongne.

Le degouté laisse la brune,
 Sans parry seule de la troupe.
 Mais le friand qui s'en de jûne,
 Dit, Poyure noir fait bonne soupe.

Si ie ne suis bien aucuglé
 Nos jeux auront peu de duree:
 Car je vous semble dereglé,
 Vous me semblez demesuree.

C'est la caualle la plus belle
 Que de deux yeux lon puisse voir:

II. LIVRE

Je ne sçache qu'un si en elle,
Elle refuse le montoir.

Plus que ne porte son jeune âge
Elle est sage ie vous assure:
Et n'est-ce pas estre bien sage,
Prendre les choses de mesure?

Vous estes trop inexorable,
Ma faute ne vaut le courroux:
Vous feray-je amende honorable,
La torche au poing à deux genoux?

Du tems du jeune Roy François
Tous vos contes nous veneZ faire:
Nous les sçavons : mais quelque fois
ConteZ-nous-en de son grand pere.

Anne est humene & charitable,
Et ne peut voir languir personne,
A qui benine & pitoyable,
Vn prompt secours elle ne donne.

Tant vous auez la mine douce:
Vous me sembleZ simple bien fort.
Si quelcun seule à seul vous pouffe,
Qui fera le plus grand effort?

Ie vous trouue bien auisée
De ne vouloir pour vostre honneur,
Estre longuement courtisée
De nul qui vous soit seruiteur.

solicitez-le

Solicitez-le, il vous payra
 La gajure qui vous est due:
 Je le conois : il s'ennuira
 De vous sentir tant à sa queue.

Vous estes dame debonaire,
 Et vous offrez à tout venant:
 Ceux qui ont avec vous affaire
 Ont tous leur cas incontinant.

Ce prescheur de contentement
 Nous dit que rien ne luy defaut:
 Si son poil cler-semé ne ment,
 Il n'a pas tout ce qui luy faut.

C'est vn juge des plus soudains:
 De l'auoir ne soiez fachee,
 Mettez vos pieces en ses mains
 Il vous aura tost depeschee.

Ne tirons point au doigt mouillé
 Pour jouer à clignemuffete:
 Mais jouons au Roy depouillé,
 Puis nous jourons à la fossete.

Vostre langue sans fin claquete
 Comme vn claquet, on le sçait bien:
 Si c'est parler ne dire rien,
 Il a tort qui vous dit muette.

Le trait, la taille, l'embonpoint,
 La couleur en vous tant excelle,

II. LIVRE

Que Momus n'en mediroit point:
Comment donc n'ettes-vous point belle?

On vous dit volage en amours,
Pource qu'un seul ne vous contante:
C'est constance d'aimer tousjours,
Et pource ie vous dy constante.

DE FLEURIE.

TAnseulement pour avoir dit,
Que Fleurie est gentile & belle,
Chacun se fait serviteur d'elle,
Et tâche m'oster de credit.
Et pourquoy montres-tu aussi
Le lievre aux chiens ? à ce jeu-cy
Tu perdis naguere Marie:
Maintenant tu perdras Fleurie.

DE ROSE.

Ce n'est point la paquerete,
La marguerite, le lis,
L'aillet, ny la violete,
La fleur où mon cœur j'ay mis.
I'aime entre les fleurs la rose,
Car elle porte le nom
D'une qui mon ame a close
A toute autre affection.
La Rose entre les fleurètes
Gagne l'honneur & le pris:

Parfète entre les parfètes
 Est la Rose qui m'a pris.
 L'autre Rose lon voit nestre,
 Comme fille du printems,
 Mais vn printems prend son estre
 De cette Rose en tout tems.
 La mienc, où qu'elle se place
 Cent mille fleurs fêt leuer,
 Et fust-ce dessus la glace,
 Fêt vn até de l'yuer.
 Cette Rose tant émee,
 Comme l'autre ne sera,
 Qui de matin estimee
 Au soir se destimera.
 Car l'autre Rose fanie
 Pourra perdre sa vigueur:
 Tousiours la miene épanie
 Florira dedans mon cœur.
 Amour de douce rosee
 Cette Rose arousera,
 Quand ma compagne épousée
 De maitresse il la fera.

D' VNE IEVNE FVIARDE.

P Etite pouliche farouche,
 Mais pourquoy de tes yeux peruers
 M'aguignant ainsi de trauers,
 Ne souffres-tu que ie te touche?
 Comme vne genisse qui mouche
 Tu sauteles par les prés vers:

I I. LIVRE

Tu te pers ensemble & me pers,
 Ne voulant point que je t'aprouche.
 Ne m'estimes-tu qu'une souche?
 Crois-tu que ie ne sçache rien?
 Si fay si fay : ie m'entan bien
 A mettre le mors en la bouche.
 Je sçay comme c'est que lon dresse
 La cauale qu'il faut choier,
 La domtant sans la rudoier:
 I'en sçay la façon & l'adresse.
 Je sçay manier à passades,
 A saut, à courbetes, à bond,
 A toutes mains, en long, en rond:
 Et ne creindray point tes ruades.
 Arreste Pouliche farouche:
 Modere ta course & ton cœur:
 Apran si ie suis bon piqueur,
 Et pran le mors dedans la bouche.

E P I T A P H E D E I A N E D E
 D A I L L O N D A M O I S E L L E D U L V D E .

I Ane, si de la mort tu as senty l'ateinte,
 (Lors qu'en son beau printems ton âge verdissant
 Tout fraîchement aloit sa fleur épanissant)
 Ne nous laissant de toy que l'écorse & la pleinte,
 Sans que celle beauté qui honoroit ta face,
 Les états ny les biens que ta maison auoit,
 Ny toutes les vertus que ton esprit sçauoit,
 Ny le noble renom de ton illustre race,
 Ny les faueurs des Roys t'en ayent pu sauuer,

N'en apelé pourtant marâtre la nature,
 Qui t'orna de ses biens sur toute creature.
 Car deuant tous humains elle a voulu prouuer
 Par toy, que ce n'est rien ny beauté ny noblesse,
 Ny sçauoir, ny honneur, ny faueur, ny richesse.

E P I T A P H E.

Icy dorment les cors des ames valeureuses,
 Qui cherchant se sauuer entre les bien-heureuses,
 Ont changé la mortelle à l'immortelle vie,
 Se perdant pour leur Dieu, leur Prince & leur Patrie.

E P I T A P H E.

PAssant, d'un front joyeux beny ma sepulture,
 Puis que ma belle mort n'a rien que lon larmoie.
 J'ay vécu docte & bon : du prochain j'ay pris cure,
 Bien-aimant bien aimé. J'ay u vuant la joye
 De voir bien prosperer mes enfans, & leur race
 Loin de la pauureté : Dieu m'a fait cete grace.
 A la fin j'ay ataint vne meure vieillesse
 En France jouissant de l'heur d'un meilleur âge,
 Duquel content & soul cette vie je lesse,
 Voyant déjà regner l'injustice & la rage.
 Je vous pleure viuans, & ne vous porte enuie,
 Plus heureux en la mort, plus heureux en la vie.

A P H E L I P E S . L E B R V N .

Mais à qui, Muse mignonne,
 Faut-il que plustost ie donne
 Ce luirelet mignonnet,

II. LIVRE

Que j'ay dans mon cabinet:
 Mais mignonnette Deesse,
 O muse chere, qui est-ce
 Qui mon ame vient toucher
 L'outrant d'un soucy plus cher?
 Muse, qui est-ce que j'aime
 Autant ou plus que moy-mesme?
 Dy-moy, qui à meilleur droit
 Que mon Brun te pretendroit?
 Mon Brun & le tien encore,
 Qui te cherit, qui t'honore,
 Que tu tiens, que tu cheris
 Entre tes mieux fauoris,
 Qui me cherit & qui m'aime
 Autant ou plus que soy-mesme,
 Qui cherit ce qui est mien
 Autant ou plus que le sien?
 C'est donc, Brun, à qui mignonne
 Ce mignot liure ie donne,
 Qu'ores apportant ie vien
 Du bocage Aonien:
 Où tandis que franc de peine
 A l'ombre ie me pourmeine
 Sans nulle offence larron,
 Ie l'ay fait sur le patron
 Tost de Rome, tost de Grece:
 Tantost de libre allegresse,
 Osant bien apart choisir
 Autre sente à mon plaisir.
 A Brun donques, chere Muse,
 Ce liurelet ne refuse:

Fay-le autant sien comme mien:
 Et par vn mesme moyen
 Fay que dans ce petit liure
 Nos noms long tems puissent viure,
 Pour montrer qu'vne amitié
 Baïf & Brun a lié:
 A fin qu'apres vn long âge
 On ait certain témoignage
 Par nos noms ensemble mis
 Qu'auons esté bons amis.

A L V C.

CHacun estime pour ton bien
 Que tu es riche à l'auantage:
 Mais tu es pauvre, & le soustien:
 Qu'ainsi soit, de ton bien l'vsage
 M'en est suffisant témoignage:
 Qui a des biens en sa puissance,
 S'il s'en donne la jouissance,
 Vraiment, Luc, les biens sont à luy:
 Mais à toy n'est pas la cheuance
 Que tu épargnes pour autruy.

A MONSEIGNEVR .

LE COMTE DE REEZ.

Comte, qui conduisez avec heureuse adresse
 Le bon-heur qui vous suit, des plus Grans fauory,
 Recherché des petis : je seroy bien marry
 Que n'usiez à plaisir les vers que vous adresse.

*Car ie crein m'oubliant faire peu de sagesse,
 Si j'ose vous troubler par vn don peu chery,
 Don, ny digne de vous entre les Roys nourry,
 Ny de moy, que benin vous obligerz sans cesse.
 Mais à tant de bienfaits que de sa magesté
 Me moyennez courtois, soit encore ajousté
 Ce bienfait, que petit à grand bien je veu prendre.
 C'est que lisiez ces vers, tant que ie soy connu
 N'auoir le cœur ingrat : Et par vous maintenu
 Ie puisse mieux vn jour les graces vous en rendre.*

A MADAME LA COM-
 TESSE DE REEZ.

IE seroy bien ingrat, Comtesse mon suport,
 De passer plus auant en la nouvelle entree,
 Sans que de quelque don ie vous usse étrenée,
 Témoins que la vertu trouue en vous reconfort.
 Ie sçay que m'en taisant ie me feroy grand tort:
 Mais les Musés à vous de leurs graces ornee,
 C'est de l'eau dans la mer doù toute l'onde est nee:
 C'est porter en até des fueilles dans le fort.
 Et que puis-je donner, qui pour tout heritage
 Ne possede, pauuret, que la Muse en partage?
 Vn témoignage seul, que non ingrat ie suis.
 Ou me contenteray, si premier ie demande
 Chose petite à vous, mais à moy bien fort grande:
 C'est que preniez en gré ce que donner ie puis.

DES PASSETEM.S.
EPITAPHE DE GI-
RARD DV VAL.

53

ICY Girard du Val maintenant repos a,
Luy qui de son viuant onques ne reposa
Tant il se trauailloit de ruiner le vice,
Et garder la vertu par seuerè justice,
En faisant vray deuoir d'un Aduocat du Roy
Ministre d'equité, bon loyal & de foy
Pour le bien de son maistre, entier & de droicture
Pour le bien des subyers. Passant qui dauanture
T'adresses en ce lieu, si tu es de Satan,
Ne trouble son repos, ne dy mot & va t'en:
Mais si tu es de Dieu, ne tien la bouche closé,
Mais en le benissant, dy, qu'en paix il repose.

A LVC FRANCOIS LE
DVCHAT, DV NEZ DE DOYEN.

IE te pry, Duchat, escoute,
Et me mets hors d'une doute,
En laquelle tu sçais bien
Qu'hier me mit ce Doyen.
Je veu en gaye sornette
Iouer ceste chansonnette
Sur le nez de ce Doyen:
Mais Duchat ie ne sçay bien,
Quoy plustost ie dois élire
De ces deux, ou bien de dire
Qu'au Doyen son nez, ou bien
Qu'à son nez soit le Doyen.

Car si lon dit la partie
 De la chose departie,
 A raison du tout plus grand,
 Qui la part en soy comprend,
 Vrayment ie feray mon conte
 Puis que ce Doyen ne monte
 Contre son nez presque rien,
 Qu'il est du nez le Doyen.

Mais dans les Analytiques
 Des argumens sofistiques,
 Vis tu jamais argument
 Conclu mieux resolument?
 Adieu belles fantasies
 Adieu belles poësies,
 Je suis fait maistre douteur
 Je suis fait maistre ergoteur.
 Mais avec qui parleray ie,
 Mais avec qui me jouray-ie,
 Avecque le nez, ou bien
 Avecque nostre Doyen?

Duchat, en ma sotte Muse
 Trop sottement ie m'abuse,
 Le Doyen, le nez, chacun
 Tous deux, Duchat, ce n'est qu'un.
 Soit donc que le nez ie die,
 Ou le Doyen, ie te prie
 De penser que ie dy bien:
 Car & le nez est Doyen,
 Et le Doyen est nez, comme
 Si tu disois que cet homme
 Fust Ian, & que Ian aussi

De qui greué non plus ne se trouua
 Que d'un mouton : ains le porte & s'en va
 Par l'assemblée (ô miracle bien grand!)
 Mais un bien autre encor il entreprend:
 Deuant l'autel où Iupiter s'adore,
 Prest & tout cuit par pieces le tirant,
 Au mesme jour sans aide il le deuore.

VOEV D'VN MIROER
 A V E N V S.

MOY qui pour mon folastre ris
 En mon œilladante jeunesse
 Auois à ma porte vne presse
 De jeunes amoureux épris,
 A la Princesse de Pafie
 Ce Miroer voué ie dedie:
 Car telle qu'aujourd'huy ie suis
 Me mirer ie ne voudrois onques,
 Et telle que j'estois adonques
 Aujourd'huy me veoir ie ne puis.

HERCVLE.

I'AY deffait le Lyon degasteur de Nemeé:
 J'ay l'Hydre regermant de ma mace assomeé:
 Desous mes bras nerueux le toreau s'aterra:
 Mon épieu le sanglier d'Erymant enferra:
 J'ay deceint le baudrier d'Hippolyte guerriere:
 J'ay des sanglans cheuaux la machoïre meurdriere
 Souillee en leur seigneur : J'en l'or Hesperien:
 Geryon aux trois cors subjugué ie fy mien:

Et voy Pelion combler
 Pardessus Osse tout l'air.

Mais, Doyen, di (ie te prie,)
 Nez, di moy sans moquerie
 Quand aplat sous toy pressant
 Tu vas t'amie embrassant,
 Dy, que fait sous toy la belle?
 Dy moy, Doyen, ne geint elle,
 Ne geint elle autant ou plus
 Que le Geant qui perclus
 Sur son estomac assise
 Soustient la montagne éprise
 D'un feu ne mourant jamais,
 Quand sur elle tu te mets?

Nez, bien plus elle doit geindre
 Quand tu viens sous toy l'estreindre,
 Sous toy, Nez, l'acrauantant
 D'un fèz de trois fois autant,
 Que le fèz qu'on dit que porte
 Dessur sa poitrine forte
 Le Geant qui dans les cieux
 Pour donner l'assaut aux Dieux
 Mena des freres la guerre
 Qui naquirent de la terre.

S V R L' I M A G E D E
 M I L O N A T H L E T E .

T E L fut Milon quand à l'antique feste
 De Iupiter hors de terre il leua
 Vn puissant bœuf de quatre ans sur sa teste,

Aux champs loïn des honneurs acompagneꝫ d'enuie.

*En Touraine il naquit au vilage Epagné:
Fait homme, à Courtemanche il s'est acompagné
De Denise Marteau en paisible alliance,
Où faisant avec elle heureuse demourance
Dés son âge premier eut d'elle deux enfans
Nommez Jacques & Ian, qui encore viuans,
Pieteux non ingrats, freres vnis, ont cure
Leurs parents honorer de cette sepulture.
Leur Mere mourut jeune : & leur Pere lontans
Après remarié sur vesquit plusieurs ans.
La maison de Loudon fut la mere nourrice
Du pere & des enfans : & luy faisant seruice
Ont si bien desserui que bien recompenseꝫ
Au seruice des Rois se voyent auanceꝫ,
Ou parmy les grandeurs se sauuent de l'enuie.*

*Ainsi passant tu as double exemple de vie,
Au pere icy gisant du bon repos des champs,
Et de modesteté en tous les dcux enfans,
Aux pompes de la Court. Si tu donnes louange
Au pere qui de peu se contentant se range,
Tu ne dois oublier les fils qui dans l'honneur,
Sans gloire & vanité, gouuernent leur bon heur.
Soient les defunts heureux en la joye eternelle,
Soient heureux les viuans en la vie mortelle.*

AV ROY SVR LE RO-
MAN DE LA ROSE.

*Sire, sous le discours d'un songe imaginé,
Dedans ce vieil Roman, vous trouuereꝫ deduite,
D'un Amant desirieux la penible poursuite,*

II. LIVRE DES PASSET.

Contre mille travaux en sa flamme obstiné.
Parauant que venir à son bien destiné
Faussemblant l'abuseur tâche le mettre en fuite,
A la fin bel-Acueil en prenant la conduite
Le loge apres auoir longuement cheminé.
L'amant dans le vergier pour loyer des trauerfes
Qu'il passe constamment souffrant peines diuerses,
Cueille du rosier fleuri le bouton precieux.
Sire, c'est le sujet du Roman de la Rose
Ou d'Amour épineus la poursuite est enclose,
La Rose c'est d'amour le guerdon gracieux.

A DES MEDISANTES.

Doncques vous compissez en vostre cagatoire,
Vn Poète, & prononcés de luy vostre sentence,
Iugeant sa suffisance & son insuffisance?
Doncq vous le deffiez en vostre cacquetoire?
Il reçoit le deffy. Puis qu'on le force à croire
Que l'aués condamné sans ouyr sa deffense,
Qu'il ne faiçt du tout rien, du tout rien! quelle offence?
Picquer vn nourrisson des filles de Memoire?
Picquer vn qui vous peut repoussant telle injure,
Vous donner justement des pies la figure?
Ha traistres scorpions. Ha bestes serpentines:
Vous estes on le veoit, de la race de celles
Neuf indiscrettes Sœurs, qui par les neuf pucelles
Receurent le payment de leur langues malignes.

FIN DV SECOND LIVRE
DES PASSETEMS.



TROISIEME LIVRE

DES PASSETEMS DE
IAN ANTOINE DE BAIE.

A MONSIEVR
DE BELOT.



*A, Muse, & vole où Garonne
Lave le mur, qui couronne
Bordeaux: & cherche par tout
Trauersant de bout en bout,
Mon BELOT, qui la partie,*

*De mon ame mi-partie,
La meilleure osta de moy,
L'emportant avecque soy.
Va, vole & le cherche, Muse:
Non : à chercher ne t'amuse
L'aimé chef qui chacun jour
Fait avecque toy séjour:
Mais d'un prinçant le rencontre,
Et ces passetems luy monstre:
Quoy qu'il face où qu'il sera
Il ne les repoussera.
Où qu'il sera, quoy qu'il face*

I I I. L I V R E

Il faudra bien qu'il t'embrasse,
 Tu le verras tout laisser
 Pour te venir caresser.
 Je le voy là, ce me semble,
 Comme en vn rond il assemble
 Ses amis qu'il en ébat.
 Je voy qu'vn chacun debat
 Pour toy, petite Thalie:
 Si quelque sot te decrie,
 Que ceux qui de toy ont soing
 Confus renuoyent au loing.
 Sus, il est tems ma Thalie,
 Qu'aux premieres on t'alie,
 Quand tu as de tes douceurs
 De si vaillans defenseurs.
 Sus, de la bande sçauante
 Dans le ciel le renom plante,
 Sans que leur nom ennobly
 Soit mouillé de l'eau d'oubly:
 Mais si quelque ignorant brave
 Ecumant sur toy sa bave,
 Soit noyé de l'enuieux
 Le nom au lac oublieux.

A V R O Y.

O R O Y, d'autant plus Gräd que Dieu vous favorise
 Sur les Rois les plus grands: Car il a conserué
 D'orages perilleux vostre empire sauué,
 La tempeste apaisant que la rage auoit mise.
 Vostre jeunesse tendre ouuerte à la surprise

*Fut en la main de Dieu, qui vous a preserué.
 CHARLE n'en douttez pas. Vous estes reserué
 Pour acheuer vn jour quelque grande entreprise.
 Pour la religion la discorde abolie*

*La Paix en vos sujets vous verrez establee,
 Confirnee à jamais pour la derniere fois.
 Puisse vne Paix vnir les peuples de la France,
 Les vieilles assurant par nouvelle aliance.
 Sente qui l'enfreindra la rigueur de vos loix,*

A MONSIEVR DE SAV-
 VE SECRETAIRE
 D'ESTAT.

FIZES, en qui l'honneur a pris si demourance,
 La vertu sa retraite, O que ie vouldroy bien
 Voir les bons, honorez par ce nouveau moyen,
 Recueillir le doux fruit de si belle ordonnance!
 Naguieres tous les biens sans nulle pourvoyance
 On souloit élargir. Souuent les gents de bien,
 Et qui plus meritoient, dez astrez n'auoyent rien:
 Et qui moins le valoit en auoit abondance.
 La Mere de mon Roy, qui en tout se propose,
 D'éleuer le vray bien sur le vice abatu,
 A fait qu'avecques choix des bienfaits on dispose.
 O sagesse admirable & mode non commune!
 Qui ruine le mal, establisset la vertu,
 Et fait que la raison commande à la Fortune.

III. LIVRE
E P I T A P H E D E
N I C O L A S E Z E L I N.

Mortels, guettez à vous : Nul hōme ne sçait l'heur
Qu'il luy conuient sortir hors de ceste demeure.

Bien heureux qui bien vit pour faire belle fin:

Bien heureux qui bien meurt. Nicolas Ezelin

Agé de soysfante ans auoit franchi son âge,

Auecque le beau los de vertueux & sage,

Des vices ennemi, des vertus amateur,

Doux à ses compagnons, des Grands obseruateur,

Honoré des petits. Des veuves la retraite,

L'apuy des orfelins : de qui auoit soufrete,

L'amiable secours : Auecque ce beau los

Passé de ce trauail en l'éternel repos.

La veille de Noel ayant fait tout l'office

Que le bon Chrestien doit au diuin seruice:

Pu du celeste pain s'aprestoit au repas:

Sain le mal il reçoit qui le meine au trepas,

Ains au diuin repas. Son cors gist en la biere:

Son esprit vit aux cieux. Vne fille heritiere

Vnique de son nom, & de son renom beau,

Auec son cher époux luy donne ce tombeau.

M A S C A R A D E D'VNE
S I B Y L L E.

SI Apollon jadis enamouré
De ma beauté, pour guerdon honorable,
Comme vn sablon mon âge venerable
D'ans en grand nombre a jadis honoré.

*Si le deuin en Delphes adoré
 M'a faict vn don d'une voix veritable,
 Ores ma voix plus que jamais valable
 Chante vn destin en ta gloire aueré.
 Je te voy ja bien loing du populaire,
 Aux plus puissans de la terre complaire,
 Voire complaire au plus puissant des Dieux.
 Je voy desia la flambante escarlate,
 Qui sur ton chef son bel honneur éclatte,
 Heureux Prelat, attendre encore mieux.*

DV PORTEMENT
 ENVERS L'AMY.

*SI tu te cognois bien, tu te donneras garde
 D'vser enuers celuy d'une façon raillarde,
 De qui tu fais l'amy. car comme il est certain
 Que la femme d'honneur n'a rien de la putain:
 Aussi le bon amy est du tout dissemblable
 D'avecques le flateur & Plaisant variable.
 Il est vn autre vice encores differant
 De ce vice mauvais, vice encore plus grand:
 Vne apresse sauvage & rude & mal tretienable,
 Qui d'un menton razé se fét recommandable
 Avec des noires dents : tenant pour arresté,
 Que c'est la vertu vraye & pure liberté.
 Mais la vraye vertu entre les deux moyenne,
 Il faut que tout le bon des deux pars elle tienne,
 Et lèsse le mauvais : le mal jamais ne faut
 De venir par l'éccez, ou bien par le defaut.*

I I I. L I V R E
V V L C A N, P A L L A S,
E R E C T E E.

LA nature ne peut faire
Ce que l'art assembler ose:
Vn enfant sans mere,
Vn mary sans vne épouse.

A M O V R Æ L E'.

AMour ælé tu vis le foudre ælé,
Et de ton feu son feu tu as bruslé:
Prouuant, Amour, que de ton feu tu peux
Fort sur tous feux brusler tous autres feux.

D E C O T I N.

TU as l'ame autant contrefaïcte,
Cotin, comme tu as le cors:
Car en la forme du dehors
Du dedans l'image est pourtraïcte.

D E L'AMITIE' D'AMOVR
E T D E S M V S E S.

LES Muses sœurs Amour ne craignant pas
Bien que cruel, le suiuent pas à pas,
Et de cœur franc le cherissent: mais feignent
D'endoctriner, & mesme le dedaignent,
Qui veut chanter exempt de son flambeau.
Ou, qui se met à quelque chant nouveau,
D'amour ayant sa chere ame agitee,
Elles vers luy toutes d'une boutedee

Prennent leur course. & temoing ie seray,
 Aux yeux de tous que ce propos est vray.
 Car si quelque homme ou quelque Dieu j'essaye
 D'aller chanter, & ma langue begaye
 Et ie ne puis chanter comme dauant.
 Mais si d'Amour ie veu mettre en auant
 Quelque ditier, vne chanson gentile
 Incontinem de ma bouche distile.

A V R O Y,

SIRE celuy qui le premier conçut
 L'art de marquer la voix par l'écriture,
 Ou fut vn Dieu luy-mesme de nature,
 Ou bien d'vn Dieu ce present il reçut.
 Par ce bel art des humains la façon
 Iadis brutale, est aujourdhuy polie,
 Par ce bel art vne loy nous ralie
 Desous vn Roy d'vne religion.
 Par ce bel art les actes valeureux
 Des plus grands Chefs jamais ne s'enuieillissent:
 Par ce bel art mille arts ne s'abolissent,
 Qui les humains font vivre bien heureux.

 AV SIEVR SABATIER
 COMMIS A L'ESPARGNE.

Sabatier, adieu liberté:
 L'an reuient, reuien à ta charge.
 Il faut resider arresté
 Sans courir au loin ny au large.
 Tu t'es assez repatrié,

I I I. LIVRE

Vien le coul sous le joug remettre,
 Pour tout vn an estre lié
 A conter payer & promettre.
 Quiconque l'epargne nomas,
 Tu ne sçauois nommer les choses:
 Car sous tel nom caché tu as
 Tout le rebours que ne proposes.
 En l'Epargne on n'epargne rien:
 Toute somme auant qu'on l'apporte,
 A desia tout prest le moyen,
 Par où vient qui soudain l'emporte.
 Qu'est-ce de l'or & de l'argent?
 Qui les thesorise en est pale.
 Du Prince à donner diligent
 Viue la grace liberale.
 Viue mon Roy, qui liberal
 Ses beaux presents ne me refuse:
 Viuez ô noble sang Royal,
 Qui daignez honorer ma Muse.
 Vos noms louez on benira
 Mille & mille ans dedans mon liure.
 Vostre siecle heureux on dira,
 Quand viuoient qui vous faisoient viure.
 Tu n'y mourras, Ô S A B A T I E R,
 Pour l'amitié particuliere,
 Dont tu gagnas le cœur entier
 De ma Muse à toy familiere.
 Pour auoir de nous merité
 Ce qui des noms prolonge l'âge,
 F I T E S & son integrité
 Reuivront en plus d'vne page.

DES PASSETEMES. 61
SVR LE PORTAIL DV
CHASTEAV DE SEDAN.

MInerve, qui a pris les chasteaux en sa garde,
De sa douce faueur cette fortreffe garde:
Aux bons Roys de la France hors de fausse traison,
La place conseruant, le maitre, & la maison.
O, Passant, si tu hais le noble nom de France,
Pour toy dans cette place il n'est point d'assurance.
Si tu tiens son party en toute fermeté,
Entre : tu y seras en paix & seureté.

A MADAMOISELLE
ESPERANCE DE LA CROIX.

Bien que la mort à ton bien trop contraire
T'ait en vn an donné plus d'vn malheur,
T'otant celuy duquel tu estois seur:
Ta chere mere, vne fille, & son frere:
Retien tes pleurs, tes chauds soupirs fay taire:
Donne relâche, ô Mere, à ta douleur.
Tes yeux essuyé, allége ton doux cœur:
Mé quelque fin à ta plainte ordinaire.
Les pleures-tu pource qu'ils sont là haut,
Loin des malheurs de la vie mortelle,
A qui des pleurs des viuans il ne chaut?
Les penses-tu par larmes secourir?
Ne pleure plus : la loy de Dieu est telle.
Soit tost, soit tard, nous viuons pour mourir.

III. LIVRE
A MONSIEUR LE
CARDINAL DE BOURBON.

DE quel present plus tost te pourroy-je étrener,
Prelat noble vraiment d'ancienne noblesse:
Mais bien plus noble encor pour celle gentillesse,
Dont ta noble vertu vient ton chef couronner.
Qui fait les étrangers, & les tiens s'étonner.
Car à l'envy dans toy l'une & l'autre se dresse
Ta race & ta vertu, à qui sera maitresse,
A qui des deux pourra plus d'honneur te donner.
Qu'ay-je bien pour t'offrir ? sans en prédre grand' peine,
Si je vouloy m'aider de la loy de l'étrene,
De demande j'iroy t'assaillir le premier.
Mais allant rondement de mon gré ie m'avance,
Aujourdhuy que l'an neuf son retour recommence,
Pour à toy me donnant du tout me dedier.

M A S C A R A D E.

MAitresses, nous sommes en peines,
Vous voyez nostre acoustrement,
Si vous n'étiez tant inhumaines
Nous serions vestus autrement.
Ostés-nous donques du tourment
Où nous tient vostre rigueur ficre,
Et nous prendrons habillement
De plus convenante maniere.

P O U R L A M E S M E.

SI nous estions, mes Damoiselles,
Autant cruels que vous cruelles,

Nous vous souheterions nos peines,
 Sans vous desirer les auoir
 Nous voulons vous les faire voir,
 Esperans que serent humaines.

POUR LA MESME.

SI pour voir nos peines cruelles
 Vous en deueniez moins rebelles,
 Amour vous les face éprouuer:
 S'il le faisoit, quelque allegeance,
 (Ou bien vaine est nostre esperance)
 Lors nous pourrions en vous trouver.

A IAN BRINON.

NE me demande plus, mon Brinon, nulle étreine,
 Que ma Muse souloit te donner tous les ans,
 De vers Grecs & Latins: Tous ces ébas plaisans
 On requerroit de moy d'une demande vecine.
 La Muse tire à soy l'esperit franc de peine:
 Au mien elle refuse aujourd'huy ses presens,
 Pour mille tristes soins aux chansons mal-duisans,
 Que l'âge plus songeard apres la barbe ameine.
 Il est tems de pourvoir (me dit la pauureté,
 La palle pauureté me tirant par l'oreille)
 Pour se nourrir l'hyuer tandis qu'on a l'été.
 Quitte moy pour vn tems & la Muse & l'Amour,
 Ton peu de bien ordonne & tu feras merueille
 De reprendre la Muse & l'Amour quelque jour.

III. LIVRE

LA ROYNE AV ROY HENRY.

Si j'eusse u le pouoir ainsi que le courage
 De laisser icy bas ce terrestre fardeau,
 Et faire avecques vous ou pour vous le voyage,
 Qu'un chacun trouue laid, qui me semble si beau,
 Que mon heur seroit grãd! mais puis que Dieu tout sage
 Refrenant mon desir, me defend le tombeau:
 Autant qu'il m'est permis, soit que ie viue ou meure,
 Je vous honoreray des larmes que ie pleure.

EPITAPHE DE BRELANDE.

Doù vient que la terre est couuerte
 En cet endroit d'herbes méchantes,
 Veü que tout-autour elle est verte
 De bonnes herbes y naissantes?
 De Brelande icy enterree
 L'unique peste de nostre âge,
 Cette peste s'est engendree
 En ce seul endroit de l'herbage.
 Et selon que ie puis entendre,
 L'ellebore de la ceruelle,
 Du cœur la ceguë s'engendre,
 Et de la langue la morelle.

EPITAPHE D'ANNE DE
 MOMMORENCY CONNESTABLE.

Celuy qui a vécu huit dizaines d'annees,
 Qui a de son viuant huit batailles donnees,

En la huitième est mort de huit playes mortelles.
 N'en trouués-vous que sept, faisant le conte d'elles,
 Et non pas huit du tout ? Il reçut en son cors
 De l'ennemy cruel, sept playes par dehors:
 La huitième au dedans de regret il se fit,
 Quand sans vanger son Roy, mis à mort il se vit.

A N A G R A M M E D E
 M A D E L E I N E D E B A I F.

Vostre non est feant A D A M E B I E N F I D E L E,
 D' A M E F I D E L E A B I E N, qui haute-
 ment publie:

B A N D E F I D E L E M' A, M A B A N D E L E
 D E F I E

L'ennemy qui nous fait guerre perpetuelle.
 C'est l'ennemy de Dieu, que l'ennemy j'appelle,
 Pour l'abatre & le veindre en Dieu ie me confie,
 Qui maugré ses efforts, en l'eternelle vie
 Me doit faire jouir de la gloire eternelle.

Là, j'auray le guerdon D I N E D' A M E F E A B L E,
 Icy ie combattray tant que seray viuante,
 D' A M E à Dieu B I E N F E A L E, inuincible,
 immuable.

La bande qui me suit, est des vertus la bande:
 L'ennemy qui me hait, est la troupe méchante
 Des vices & pecheꝝ: mais sur eux ie commande.

C O N T R E V N M E D I S A N T.

C H A C U N qui voit ta sotte medifance,
 Petit punais, me dit: Comment, Baif?

Te sens-tu point comme il te pique au vif?
 Ne veux-tu pas en faire la vengeance?
 Mais j'en reçoys si peu si peu d'offence,
 Que j'ay pitié de toy, pauvre chetif;
 Qui à ta honte as esté si hatif
 De m'attaquer par ton outreuidance.
 Cent tels que toy me voudroyent terrasser,
 Pendus à moy, lesquels sans me lasser,
 Comme Guenons, ie porterois à l'aise.
 Mais s'ils estoyent punais comme tu l'es,
 Comme Lichas fut traité d'Hercules,
 Ie traitteroy cette bande punaisé.

Ronsard, qui es autant amy de la Vertu,
 Comme vray ennemy de la mechanceté
 Tu dis que ie devois punir la fausseté
 D'un qui cuide fouler mon honneur abbatu.
 Mon amy de cœur franc, que me conseilles-tu?
 Si quand il dit mon nom, il a tousiours chanté
 En apert mon honneur: s'il en a detraicté,
 En ne me nommant point, ie n'en donne vn festu.
 De si traitres médits aussi me ressenir,
 D'un qui dit bien deuant, en derriere médit,
 Ce seroit l'empescher d'un jour s'en repentir.
 Quand il reconoitra que j'en fay peu de cas:
 Quand tous scauröt que tout ce qu'un si méchät dit,
 Du moindre homme de bien, le courroux ne vaut pas.

Alis, ie te conoy vray amy sans feintise,
 Qui sçais avec l'amy aimer parfaitement,
 Qui sçais où l'amy hait, haïr mortellement,

Ayant de mon honneur la vengeance entreprise.
 Ta bonne volonté, comme ic doy, ie prise:
 Mais ie te veu prier ne penser seulement
 A me vouloir vanger, d'un qui si traitement
 M'outrageant, de soy-mesme a la vengeance prise:
 Alis, il ne vaut pas qu'un si homme de bien
 Pense qu'un si méchant (qui du tout ne vaut rien
 Qu'à brasser trahisons, nourrisson de l'enuie)
 Qu'un si méchant soit né ! Tu luy fais plus d'honneur
 En tes vers le blâmant, que ce faux blasonneur,
 Par les siens n'en pourroit aquerir de sa vie.

EPI T A P H E.

DE pensemens fautifs, ô foy mal-assurée !
 Cette Roïne, bon Dieu, qui la paix embrassoit,
 Rien que toute allegresse en son cœur ne pensoit
 Pour orner de son fils l'alliance jurée.
 Qui s'apretant joyeuse à la feste esperee
 Vn spectacle nouveau pour le peuple dressoit,
 Desirant sa faueur: surprise elle reçoit
 La playe de la mort, quand moins est desirée.
 O mort ! que ne l'as-tu des ennuis deliurée,
 Lors que de toutes pars tant de troubles couroyent,
 La France forsenant de fureur enyurée.
 C'est le sècret de Dieu, qui prouua sa constance
 Au combat des travaux, qui son âme entouroyent,
 Dont ailleurs qu'en la terre estoit la recompense.

III. LIVRE
DES CŒURS DES SEI-
GNEURS DE L'AVBEPINE,
PERE ET FILS, SECRETAI-
RES D'ESTAT.

O Cœurs qui reposez en cette sépulture,
Que vous estes heureux de n'auoir sentiment
Du siecle où nous viuons en travail & tourment,
Engloutis & plongez en vice & forfaiture!
Je vous beny d'auoir en vostre maison pure,
Logé deux beaux esprits : douez d'entendement,
Pour sçauoir traueser le monde saintement,
Non tachez, non souillez ny de mal ny d'ordure.
Aujourdhuy, beaux Esprits, au ciel vous recueuz
Le pris qu'en bien viuant merité vous auez :
Nous viuons où quasi c'est honte de bien viure.
Que le bon DIEU touché de nos cris douloureux,
Ou nous donne soudain vn âge plus heureux,
Ou nous face plustost où vous estes vous suivre.

A MON SEIGNEUR LE
DVC DANIOV FILS ET
FRERE DE ROY.

ESTRE né fils de ROY, GRAND DVC
victorieux,
D'une si vertueuse & tant prudante MERE,
Et d'un grand ROY de France estre le premier frere,
C'est vn rare present de la faueur des cieux.
Puis embrassant l'honneur & la foy des Aieuz,
Et maintenant les loix de sa Patrie chère,
Pour son Frere treschér les rebelles deffère,

VOUS

Vous donne entre les DVCS vn ranc tresglorieux.
 Au printems de vostre âge vne telle victoire,
 Contre l'ennemy fort & d'hommes & de cœur,
 Orne tant de vertus d'vne excellente gloire.
 Mais de tant de milliers ayant jonché la terre,
 Vainqueur de l'Ennemy de vous estre vainqueur,
 Vous élue en honneur sur tous les Chefs de guerre.

A MONSEIGNEVR LE
 CARDINAL DE LORRAINE.

Grand Prelat, quand ie suis prest de me presenter
 Deuant vostre hauteesse, & qu'à part moy ie pense,
 Des Musés quel present ie pourrois inuenter,
 Que j'oserois offrir deuant vostre excellence.
 J'ay peur, & non à tort, de vous mécontenter,
 Soit que ie pense en moy ma petite puissance,
 Soit qu'indiscretement venant à rechanter
 Ce qu'on vous a chanté vos oreilles j'offense.
 Quel homme de renom écriuant en langage
 Grec, Romain, ou François, ne vous a fait hommage
 Du mieux qu'il sçache dire, honorant vos vertus ?
 Cecy fait que ie crain vous donner des redites,
 Mais ie pren cœur voyant vos infinis merites:
 Car de la plus grand' part encore ils se sont tus.

A MONSEIGNEVR LE
 DVC D'ALENCON.

FRANCOIS, noble sang, qui viuant raporteꝝ
 Vostre ayeul, pere aimé de tout art & science,

III. LIVRE

Vostre beau nom connu nous porte vne assurance,
 Que prompt & liberal les lettres supportez.
 Mais la preuue & l'effét dont benin enhortez
 De vostre ayde & faueur nostre viue esperance,
 Enjoint que vos honneurs mettions en aparance,
 Vos honneurs jusqu'au ciel par les Muses portez.
 Ce sont elles par qui les siecles à venir
 Sçauront le beau lien qui trois Freres acorde,
 Pour veincueurs non-veincus par tout les maintenir.
 Princes, viuez amis : rejettez la discorde:
 Entre vous la rancueur ne puisse entreuenir.
 Comme vos ans croitront, croisse vostre concorde.

A L'ENVIEUX.

MAis, Enuieux, quel plaisir
 Prens-tu d'ainsi me choisir,
 Qui suis trop petit Poëte,
 Sur qui l'Enuie se jette,
 Pour éclater de ta voix
 Les miserables abboys
 Encontre ma renommec,
 Qui s'en vient d'estre semee?
 Va t'adresser à celuy
 Qui se donne de l'ennuy,
 A fin qu'un chapeau d'ierre
 Sa fiere teste luy serre,
 A celuy dauant qui luit
 La chandelle toute nuit,
 Qui dès la prime rencontre
 De quelque docte a la montre,

A celuy qui studieux
 A meurdris ses sçauans yeux,
 Et qui en sa couleur palle
 Quelque grand sçauoir étalle.

Quant à moy, ny chassieux
 De veiller ie n'ay les yeux,
 Que, ie jure, de ma vie,
 Quand ils en ont u l'enuie,
 Ie n'ay fraudeꝝ du sommeil:
 Ny mon visage vermeil,
 Pour trop grande étude encore
 Deffét ne se decolore.

Laisse moy, ie ne fay rien,
 Petit sôt, qui vaille bien
 Pour sa façon, qu'en la sorte
 Vn toy enuie luy porte.
 Di Sottelet, qui r'emeut,
 Qu'est-ce qui faire te peut
 Enuieux sur quelque chose
 Que par plaisir ie compose?
 Mais cela qui contre moy
 Te fait enuieux, ie croy,
 C'est le peu de renommee
 Qui est ja de moy semee.
 Or si tu veux faire bien,
 Ou ne fay semblant de rien,
 Ou bien à la renommee
 Pren toy, qui déjà semee
 Parle en bonne part de moy,
 Et ne sonne mot de toy.

III. LIVRE
EPITAPHE D'ANDRE' NAVGER.

NON tous, Navger, non tous nous ne mourons,
Non non la mort n'emploie sa puissance
Sur nous, Navger, qui auons l'assurance
Des vers par qui viuans nous demourons.
Tu vis encor quand nous rememorons
Tes chans bien-faits : & toy, qui de la France
Eus le tombeau, de Vnize naissance,
Mort micux que vis viuans nous t'honorons.
Ronsard, & moy Baif, qui ta memoire
Solennisons, ce lorier, ce lierre,
Ces fleurs, ce miel, ce lait, ce vin nouveau,
Ronsard soigneux de ta viuante gloire,
Moy ton Baif né de ta mesme terre,
Avec nos pleurs donnons à ton tombeau.

BRINON A SA SIDERE,
DV GREC DE DORAT.

SIdere, quand, face à face,
En tes beautez, en ta grace,
Amirable ie te vois,
Adonc ma langue sans voix
Demeure comme liee.
Le vre sur le vre pressée,
Adonques ie me tien coy
Debout sans dire pourquoy,
Gelé comme de la glace,
Sans qu'autre chose ie face,
Que ficher en toy pensans

Mes yeux, mon ame & mes sens.
 Mais ce n'est rien de merueille,
 Si pâmé ie m'émouelle,
 Arrestant sur toy mes yeux,
 Comme d'une sœur des Dieux,
 Non d'une femme mortelle,
 M'étonnant de façon telle,
 Que ie ne puis dire rien,
 Ny mesme ie ne puis bien
 Tant soit peu demy-declosés
 Entrouvrir mes le vres closés.
 Mais bien que muët sans voix,
 Bien que sans parler ie sois,
 Pour cela moins, ô Sidere,
 Deuot ie ne te reuere,
 Que si à toy ie parlois.
 Pour les hommes sert la voix
 Enuers les hommes : mais l'ame
 Enuers les Dieux qu'on reclame.

A GVILLAVME DE GENNES.

Gennes, ois-tu pas la rage
 Des vens par l'air forcenans,
 Ne sens-tu pas que nostre âge,
 Les ans legers amenans
 Aucc eux, pour la jeunesse
 Laisent l'oïsue vieillese?
 La neige nous amonneste,
 Blanchissante par les chams,
 Des Grisons, qui nostre teste
 Blanchiront en peu de tems:

III. LIVRE

Voy dans la triste froidure
 La mort de nostre verdure.
 Ne prenons soin de la guerre,
 Ny de ce que le Turc fait:
 Soit qu'au ciel monte la terre,
 soit que pour nostre forfait
 Le ciel devalant acable
 Nostre race miserable,
 Vivons delivres de peine:
 O Gennes, ne nous gennons
 Trompez d'esperance vaine:
 Mais ce viure demenons
 Sans soin au jour la journee,
 Peu soigneux de l'autre annee.
 Heureux celuy qui peut dire,
 Gennes, ie véquis hier,
 Et qui le passé martyrre
 Peut gaiement oublier,
 Eteignant des soins la troupe
 Au vin qui flote en la coupe.
 Que le souper on apreste
 Sur tout riant d'un bon vin,
 Et pour ceindre nostre teste
 Qu'on ait le lorier divin.
 Tahureau seul ie demande
 En nostre petite bande:
 Qui de sa guiterre douce
 Tous nos soucis charmera,
 Quand des fredons de son pouffe
 Les cordes il touchera,
 Dessous sa gaie cadance

Reglant nostre libre dance.

Mais puis que selon Mimnerme ,
Les hommes n'ont nul plaisir
Sans l'amour, comme l'affirme
Horace, il te faut choisir
La jeune garce égaree,
Donc ta table soit paree.

Mais mon Tahureau j'auise,
Qui sa guiterre detand,
Et fondant en mignardise
Tout à sa Marie entand,
Qui nous l'oste, & se l'assure
Etreint d'une foy parjure.

Je le voy comme il la baise,
Je voy leurs langues luitter,
Je les voy se pâmer d'aise,
Je les voy s'entrirriter,
A qui de plus grand' delice
Fera que l'autre perisse.

Mais donne à Panjas Charlota,
Qui par sus toutes luy rit:
Tout frissonneux il tremblote,
Luy donnant tout son esprit.
Pour moy la premiere donne,
Car toute garce m'est bonne.

Soit qu'elle ait blanche la face,
Ou soit qu'elle ait brun le teint,
S'elle a tant soit peu de grace
D'un trait d'œil elle m'ateint,
Ou soit qu'elle soit grassète,
Ou soit qu'elle soit grailete.

Fai seulement qu'on apreste
 Le lit flairant de semeurs,
 Et tu verras quelle feste
 Nous ferons à ces douceurs,
 Dont la mignarde Deesse
 Flatte la tendre jeunesse.

V O E V.

TAndis que Boyuin ut à soy
 Le vaillant d'un liard d'alloy,
 Pour avoir du vin dequoy boire,
 Il a tousiours gagné la gloire
 Sur tous les meilleurs biberons:
 Et n'y épargnoit éperons,
 Comme harencs, jambons, saucisses,
 Ceruelas, fromages, épices,
 Bresil, & porc, & beuf fumé,
 Pour s'alterer au vin aimé:
 Auquel il a fait telle guerre,
 Que rien, sinon ce fresle verre
 Aujourdhuy rester ne se veoit
 De tous les grans biens qu'il avoit.
 Boyuin, ce verre te dedie,
 O Dieu Bacchus, & si te prie
 Le recevoir autant à gré,
 Qu'il t'est de bon cœur consacré.
 Si rien dedans il ne te donne,
 O Dieu Bacchus, ne t'en étonne:
 Il ne te donne que cela,
 Et te donne tout ce qu'il a.

TV veux, Gressin, que ie t'admire
 Pour ton grand cœur & braue dire,
 De quoy tu meprises la mort
 Et dedaignes tout son effort:
 Toy Gressin qui n'as jamais braize
 Au foyer, toy que la punaize
 Et l'iregne peut dedaigner,
 Qu'un rat ne veut accompagner:
 Toy qui n'as ne plat, n'escuelle,
 Ny terrine, ny pot, ny selle:
 Toy qui n'as vn demy landier,
 Non pas vne seule culier.
 Mais toy Gressin, qui as vn pere
 Auecques vne belle mere,
 De qui les dents longues de faim
 Macheroyent vn caillou de pain.

Vrayment ce t'est vne grand joye
 De mener ceste vie coye
 Auec ton pere, & le soulas
 De ton pere, deux eschalias
 Reuestus de vieilles pieçailles
 Des beaux haillons que tu leurs bailles,
 Qui semblent estre faits si beaux
 Pour espouuenter les oyseaux.

Vrayment, Gressin, ie ne m'estonne
 De quoy vostre concorde bonne
 Vous fait estimer bien heurcux.
 Vous estes sains & vigoureux:
 Vostre estomach tresbien digere

I I I. L I V R E

*Ce que mangez en bonne chere,
 Qui plus est vous ne craignez rien,
 Ny la perte de vostre bien,
 Ny le feu, ny l'eau, ny l'orage,
 Ny quelque perilleux naufrage,
 Ny vous ne craignez, beaux amis,
 Le sac que font les ennemis.
 Vous ne craignez ny pilleries,
 Ny meurdres, ny briganderies,
 Ny vous ne craignez la poison,
 Ny nulle pire trahison:
 Mais & de faim & de froidure,
 Mais & de soif & de hallure,
 Vous avez vos trois cors vous trois
 Bien plus secs que le plus sec bois,
 Et que corne, & si quelque chose
 Plus seche que corne on propose.*

*Pourquoy ne serois-tu heureux,
 Si sain vioge vigoureux?
 Nette de crachat est ta bouche,
 Et jamais ton nez ne se mouche.
 De sueur tu n'es tourmenté.
 Mais outre ceste netteté
 Il faut encore que ie mette,
 Vne netteté bien plus nette.
 C'est que ton cul, mon Gressinet,
 Est plus qu'une saliere net:
 Car, Gressinet, tant qu'un an dure
 Tu n'en fais pas dix fois ordure.
 Car, Gressinet, en douze mois
 Tu n'en fais ordure dix fois.*

Encore ce sont crotelettes
 Bien plus dures que sevelettes,
 Et tes dois tu n'en fallirois
 Si dans tes mains tu les virois.

Doncques vn tel heur ne mesprise:
 Mais rom, Gressin, ton entreprise
 De mourir: & vy vigoureux.
 Car Gressin tu es trop heureux.

LES LYCAMBIDES.

OR nous jurons par les mains grandes
 Du Roy des infernales bandes:
 Nous jurons par la sainteté
 De leur Royme, qu'en chasteté
 Jusqu'aujourd'hui vrayment pucelles
 Dessous terre nous sommes telles.
 Mais qu'Archiloc trop enflammé
 A vilainement difamé
 Nostre honneur, en ses chansons pleines
 Contre nous d'injures vileines,
 Honnissant nostre chasteté
 D'un vers par vengeance jetté:
 Employant ses chansons malines
 Non à louer les choses dines:
 Mais à noircir, faux blasonneur,
 Des filles le pudic honneur.

O vous pucelles de Parnasse,
 Comme meistes vous tant de grace
 Aux iambes injurieux
 D'un Poëte à tort furieux

III. LIVRE

Contre nous comme vous pucelles?
 Mais s'il nous cognoissoit bien telles
 Qu'il nous crue estre en ses écrits,
 Pourquoy de nostre amour épris,
 (Si nous étions comme il raconte
 Vilaines paillardes sans honte)
 Vouloit-il dauant son courroux,
 Se marier avecque nous?

D'ARCHILOC.

Cerber ton triple chef moins que dauant sommeil,
 Nul de tes yeux ne cligne, apres ta porte veille:
 Aujourdhuy qu' Archiloc ayant quité le jour,
 Est habitant nouueau de vostre noir sejour.
 S'il a bien peu forcer les filles de Lycambe
 D'abandonner le jour par son meurdrier iambe,
 Il fera bien quitter le tenebreux sejour
 Aux ames delà bas pour remonter au jour.

A LA ROYNE

MERE DV ROY.

O ROYNE de vertu, si depuis dix annees,
 Des le tems que l'espoir de venir à bon port,
 Desous vostre faueur, flate le deconfort
 De mes Musés, helas, tousiours mal guerdonnees:
 Si vous estes l'appuy de ces Musés mal nees
 Sous vn mauuais destin, par vn destin plus fort
 Renuersez leur malheur desous vostre suppart,
 Faisant filer pour moy meilleures destinees.

*Ainsi le clair soleil recourant sa carrière,
 En ce monde abité de sa grande lumière
 Ne voye rien plus beau ny meilleur que la France:
 Vous voye prospérer & vous & vostre race:
 Voye entre vos enfans vnion paix & grace:
 Enuers vous de leur part amour & reuerence.*

A LA ROYNE DE NAVARRE DAVANT QUELLE
 LE FVST MARIEE.

Rare fleur de beauté, riche perle d'honneur,
 De Rois & de grands Ducs Fille & sœur honorée,
 Qui de Princes & Rois alenuy desirée,
 D'un seul Roy bien choisi dois estre le bon heur.
 Et bon heur des François par celeste faueur,
 Qui plame dans vos cœurs la concorde assurée:
 Mais la France tousiours lon a vu decorée
 D'une de ce beau nom d'honneur & de valeur.
 Marguerite à vescu sœur de François, la Tante
 De Henri, nos bons Roys: Des Musés le suport.
 La sœur du bon HENRI MARGVERITE
 est viuante.

Què le Piémont retient & la France desiré:
 Mais vous du mesme nom luy donnez reconfort,
 Luy faisant voir en vous mesmes vertus reluire.

A V R O Y.

Sire, Auguste jadis grand monarque & puissant,
 A qui vous ne cede de grandeur de courage,

III. LIVRE

Souloit tendre la main avec vn doux visage
 Aux dons que luy offroit son peuple obeissant:
 Et prenant du petit le plus petit presant,
 Aussi bien que de ceux qui donnoyent dauantage,
 Du bon cœur du sujet aimoit le temoignage,
 Non pas en la valeur de son don se plaisant.
 Ainsi fauorisez de vostre humble Poète,
 Qui vous donne ses vers, & tout bien vous souhète,
 Sinon l'éterné, au moins le souhet de son cœur.
 Vous auez prou de biens. Dieu doit longue durée,
 Et pour en bien jouir longue paix assurée:
 Le Rebelle veincu vous sente le vainqueur.

A MONSIEUR LE
 DUC D'ANJOU.

A Vous Grand Duc d'Anjou pais de mes ayeux,
 Fils & Frere de Roy, En qui tout bien abonde,
 Quel don puis-ie donner qui n'ay rien en ce monde,
 Qui vaille rencontrer grace dauant vos yeux?
A vous heureux Guerrier sage & victorieux,
 De qui le beau renom remplist la terre & l'onde,
 Le don le micux seant, si mon pouuoir ie fonde,
 Sont mes vers, qui bruiront vos beaux faits glorieux.
 Mais, ô Bon Duc, ie crein que par mon humble stile
 I'amoindrissè l'honneur de vos hautes vertus.
 A chanter hautement toute voix n'est abile.
 Si vostre ayde vne fois me console & resforce,
 Les micux chantans seront de mon chant combatus,
 Vostre faueur doublant & mon cœur & ma force.

A MONSIEVR DE SAVVE
SECRETAIRE D'ESTAT.

FISES, en qui l'honneur choisit sa demeureance,
La vertu sa retraite, O que ie voudroy bien
Voir les bons, honorez par ce nouveau moyen,
Recueillir quelque fruit de si belle ordonnance ?
Naguere tous les biens sans nulle pouruoiance
Souloyent estre élargis. Souuent les gens de bien,
Qui mieux en meritoyēt, moins heureux n'auoyēt riē;
Et qui moins le valoit en auoit abondance.
La Mere de mon Roy, qui en tout se propose
D'éleuer le vray bien sur le vice abatu,
Poursuit qu'auuecque choix de tous biens on dispose.
O sagesse admirable, & mode non commune
Qui ruine le mal, établist la vertu,
Faisant que la raison commande à la fortune.

SVR LA DEUISE
DES HVGVENOTS.

Victoire entiere.
Paix assuree.
Mort honneste.

PAuures hommes perdus, pleins de vaines fallaces,
Qui portiez à vos couls vostre dicton de mort:
Quitrop outreuidez contre Dieu le plus fort,
Et le Roy & les siens vomistiez vos menaces.
Vos cares que hausiez, aujourdhuy portez basses.
En vos desseins rompus ressentiez vostre tort.
Dieu viuant & vaincueur au Roy donne confort:
Le preserue & les siens de vos foles audaces.

III. LIVRE

Vos souhaits & desirs de poussiere & de verre,
Sont épanchus au vent, sont cassés contre terre,
Sous le foudre élançé d'un tourbillon divin.
Vivans vous n'eustes onc, ny l'entiere victoire
Ny la paix assurée : & perdans vostre gloire
N'avez honeste mort : mais trop honteuse fin.

PRESAGE HIEROGLIFE.

VN pacifique Roy sous la faueur des cieus,
Ayant d'Auguste l'heur gouvernera la terre,
Par les arts & moyens & de paix & de guerre,
D'un foudroyant courroux creuant les vicieux.
Il chasse la fureur des superstitieux:
Ramene le bon tems qui les chastre & reserre:
De vraye pieté la Barbarie aterre
Par justice qui suit l'augure gracieux.
Et demuré vainqueur d'une victoire heureuse
En libre seureté de la paix plantureuse
Commerces & chemins aux peuples ouvrira.
Aux siens élargira par sage pourvoyance
En repos assuré de tous biens abondance.
DIEU fin & chef de tout par vœu remercira.

DE BAVIN.

BAVIN qui ne veoit guiere cler
N'a point de la clarté de l'ær
Lors qu'il fait beau la jouissance.
Du verd gay la reiouissance
N'est pour luy. Les prez fleurissans

Des herbes s'épanouissans,
 Au renouveau ne luy agreent:
 Les chams dorez ne le recreent
 Alors que plus blonde Ceres
 Fait herissonner ses forests.
 Il a belles tapisseries,
 Il a fort rares pierreries,
 Riches meubles en sa maison,
 Des pieces d'or à grand' foison,
 Des plus exquisés pourtraitures
 En images & en peintures.

Tous ces meubles, & ces joyaux
 Sont luisans, sont vernis, sont beaux:
 Sa femme est tant laide & vileine
 Et si hideuse à veoir, qu'à peine
 (Ce croy-ie) la mesme laideur
 Ne te feroit plus grand hideur.

Or malheureux en mille choses
 Dont ses prunelles sont forclosés,
 Bavin est heureux en vn point:
 C'est que sa femme il ne voit point.

DE BENE ST.

QVI t'a donné conseil, Benest,
 D'enaziller ton adultere?
 Badin mary, par là ce n'est,
 Que coupaut il t'en souloit faire.
 Pauvre sot, tu n'y gaignes rien,
 Ta femme n'y perd nullement:
 Tousiours son paillard aussi bien
 A de quoy faire le payment.

III. LIVRE
DE MARMOT.

SER René m'auoit donné
Vn buffolin de suete:
Quand Marmot l'ut alené,
Merde fine elle s'est faite.

A CHARLOTE.

C'EST à faire aux mal aprises
N'estre point d'amour éprises,
Et ne se faire valoir:
Et creindre tant d'une mere
La langue & l'œil trop seuer,
Qu'on se mette à nonchalour.
Le mignon de Cytheree
T'a Charlotte enamouree,
Et t'a fait jeter bien loin
Ton fil ta soye & ta laine.
Tu as la poitrine pleine,
Pleine d'un bien autre soin.
Qui vient de la bonne grace
De Camil que nul ne passe,
Soit à dresser vn cheual,
Soit à sauter, soit à faire
Mille voltes pour te plaire,
Soit à bien dancer vn bal.
Nul mieux de douce merucille,
Ne sçait (enchamant l'oreille)
Tenir les esprits ravis,
Quand il chante & son lut touche:

Nul ne verse de la bouche
Vn plus gracieux deuis.

A M A R I E.

O Rebelle maintenant des dons de Venus assuree,
Lors qu'à ta gloire viendra l'æle non encor esperee,
Quãd ce beau poil sera chut, qui sur tes épaules volete,
Quãd ce teint, qui maintenãt éteint la rose vermeillette,
Changé, Marie, mûra cette face en face ridee
Las (diras-tu au miroir te trouuant ainsi changee)
Le cœur que j'ay aujourdhuy que ne l'auoy-ie en mon
jeune âge,
Ou qu'au courage que j'ay ne reuiët mō premier visage!

D E G V I L L O T.

QVI dit que Guillot put le vin
Qu'il but à son souper hier,
Il faut, car Guillot fet metier:
Boyre du soir jusqu'au matin.

E P I T A P H E D E B A T I E R.

BA T I E R repose icy, non fait: on ne peut dire
Reposer d'vn qui fut des plus mechans le pire.
Son cors, ains sa charogne, y prend sa pourriture,
Qui donne à maint serpent nescance & nourriture,
Comme chaque partie auoit propre semance
Pour couuer des serpents la venimeuse enjance.

De ses deux yeux hideux deux basilics naquirent,
Cent scorpions coüeꝝ de sa langue se firent,

.III. LIVRE

Vn crapaut de son cœur, vn leZard de son foye,
 Vn roux aspic nessant dans ses poumons tournoye,
 Dans sa rate vn auuain : sa puante ceruelle
 Produit cent couleuvreaux. Dans ses os sa mouëlle
 Groulle de chenilleaux : de ses infètes veines,
 Qui d'vn noir sang caillé croupissoyent toutes pleines,
 Et de ses nerfs pourris, mille serpens qui nessant,
 De sa mesme charogne engendrez se repressent.
 Dedans vn loutarou son ame condamnée,
 Par ce monde acomplist sa peine destinee.
 Le jour en quelque creus il se cache sous terre
 Haïssant la lumiere : & toute la nuit erre
 S'arrestant aux carfours. Là de longues hullees,
 Il fait hideusement retentir les valces.
 Il crie par trois fois. Les matins s'en effroyent,
 Et repondant aux cris de toutes pars aboyent.
 Bâtier en ces hauts cris faisant sa penitance,
 Auertit les humains de fuir la mechance.
 Nul n'ait compassion de Batier. Que personne
 N'ait pitié de son mal : car Dieu juste l'ordonne.

A PIERRE LE BRVN
 DIT LA MOTTE.

DE MARIE.

LE BRVN, tu la cognois la brune,
 La brune au cors gent : elle est vne
 De celles qui le talon court,
 Et qui ont le fessier trop lourd,
 Dont le pou tirant contrebass
 A l'aise ne leur permet pas

D'estre sur piés. Quoy qu'on m'en dise,
 Trop sa mouuante mignardise-
 sent ce qu'elle est: & trop lassives
 Me semblent ses œillades viues.
 Par trop folâtre est son maintien:
 La preudeshomme ne peut bien
 Contrefaire naïvement
 Vn si débordé mouuement:
 Bien que la garse pratiquée
 Peut contrefaire la sucree.
 Mais quoy? veux-tu que ie te die
 Ce que ie pense de Marie?
 Ce qu'elle fét luy sied trop bien,
 Pour me sembler femme de bien.

A V S E I G N E V R

I. DV FAUR.

PVis que tu vas de ta douce merueille
 Raur le bal des Garomnides sœurs,
 Qui suit, quittant la cueillette des fleurs,
 Ton miel plus doux que l'œuvre de l'abeille:
 Puis que, du Faur, ton retour s'apareille,
 Nous n'orrons plus tes musiques douceurs,
 Plus de ton lut les doux sons rauisseurs
 N'enuoleront nos esprits par l'oreille.
 Mais quelque part que faces ton séjour
 Ne m'oubli pas, mais de toy chacun jour
 Soit en bon lieu nostre amitié nommée
 Aussi souuent, comme en plaisant é moy
 Par les deuis de Claudin & de moy,
 Se redira ta sainte renommée.

I I I. LIVRE
DE BERTRAND BERGER
DE MONTANBEVE

ET quoy, Muse, es tu derniere
A te monstrer en lumiere
Pour honorer ton Berger?
Si Berger tu oses dire
Celuy, qui laissant le rire
Poursuit vn vers non leger:
Celuy qui alécart laisse
Le chemin que tient la presse,
S'en frayant vn tout nouveau
En sa douce fantasie,
Aux chants d'une poésie
Inventee en son cerueau.
Celuy qui n'a en écharpe
Ne lut, ne sistre, ny harpe:
A qui le Dieu des estours
Donne la tonante rage
Dont il enfle le courage
Des souldars par ses tabours.
Lors que son chant magnanime
D'un vers resonnant anime
Le plus endormy souldart,
Et que hautemant il tonne
Et boulleuerse & canonne
D'un fort l'ébranlé rampart.
Lors que belliqueux poëte
Il fait bondir sa trompette,
De telle alêne qu'il faut:
Representant les alarmes

Et le claquetis des armes
 Qu'on oit au choc de l'assaut.
 Toutefois le dieu qui prise
 Ters vers, & te favorise,
 Dieu de guerre & dieu de paix,
 A l'une & à l'autre adestre
 Ainsi que luy t'a fait estre,
 Toy qui de son miel te pais.
 Bien que par fois tu bedonnes,
 Et bien que par fois tu tonnes
 De Mars les troubles diuers,
 Du tout la paix tu ne laisses,
 Mais quelque fois tu t'abaisse
 Jusqu'à l'orner de tes vers.
 Est-il son que tu n'exprimes
 Dans le naïf de tes rimes,
 Soit le tintin des oyseaux,
 Soit des cousteaux l'armonie
 Que le cuisinier manie,
 Soit les horlogins apeaux,
 Soit le triquetrac encores?
 Triquetracant vn vers ores,
 Ores le carillonant,
 L'achigigotant de sorte,
 Le tintant, ou de main forte.
 Au bedon le bedonant.
 Mais sus chante, ô Muse douce,
 Vne chanson qui se pouffe
 Jusqu'à la posterité,
 A fin qu'on ne la deçoine,
 Et ce poëte reçoine

L'honneur qu'il a merité.
 Sus donc à Berger ce metre
 Tel que tu peux pour le mettre
 Au premier front de ses vers,
 Temoing de la douceur belle
 Qui doucement l'emmielle
 En sa vieillesse aux ans vers.
 Quiconq te dira la mode
 Par qui le vieil Esiode
 Fut poëte à son recueil,
 Croy-le croy-le ô suiuant âge:
 Ce Berger fait dauantage
 Sans vn Ascrien sommeil.

D'VN CONTREFAIT.

IL n'est aisé d'un esprit contrefaire,
 Mais bien un cors : en toy tout le contraire.
 Car la nature en ton cors contrefait
 De ton esprit le vray portrait a fait:
 Mais la laideur de ton hideux visage,
 Et de ton cors le contrefait brouillage,
 Quel sçauant peintre au naïf depeindroit,
 Quand seulement le voir il ne voudroit?

D E V I S.

DIEU te gard fille? Et à vous. Qui est celle
 Qu'ainsi tu suis? Qu'en auez vous que faire?
 Si ay vrayment. C'est ma maistresse qu'elle.
 Auray ie bien ce que d'elle j'espere?

Possibl.ouy : mais quelle est vostre affaire ?
 Je veux entrer. Portez vous quelque chose ?
 Le bel éc. C'est assez, laissez faire,
 Ia ne craigneZ trouuer sa porte close.

LA MAISON DE BRVIT.

IL est vn certain lieu dans le milieu du monde
 Entre les cieux, la terre, & la vague de l'onde,
 Confin des trois manoirs : là où t' t ce qu'on fait,
 Quelque loïn que puisse estre, & se voit & se sçait:
 Et tout ce que l'ordit, vitemēt à n' ruelles
 Raporté, vient entrer dans les cre^{noüy}ueilles.
 BRVIT se heberg icy : quand u s'habitua
 Sur le plus haut cartir son palais situa:
 Et le faisant bastir vouut qu'en toutes sortes
 Par tout il fust declos sans fenestres ny portes,
 Entrelaisant expres vn milier de pertuis.

Lon treuve la demeure ouverte jours & nuits:
 Toute d'airein tintant elle retentit toute,
 Redouble les propos, redit ce qu'elle écoute:
 Nul repos n'est leans, silence n'y est pas,
 Ny le criment aussi, mais vn murmure bas,
 Comme celuy qu'on sent partir de la marine,
 Quand on est loïn du bord: où le gronder qui fine
 Le tonnerre bruyant, quand Iupiter tonnant
 Met aux nuages noirs l'orage marmonant.
 Vne grand' foule épesse en la court se pourmene:
 Là tousiours va & vient vne comme veine,
 Et là mille faux-bruits saboulent vagabons,
 Parmy les veritez comtes mauuai & bons.

III. LIVRE

Aucuns les nouveautez aux oreilles apportent,
 Autres ce qu'ont ouy à des autres rapportent.
 La mensonge tandis va tousiours en montant,
 Quand le dernier ajouste au premier racontat.
 Là la nice creance, là l'abus temeraire,
 Là est la fole joïe, & la creinte legera,
 Et l'émeute soudaine, & maint sacoutement
 Qui sans a veu certain s'épand subitement.
 BRUIT ^{il,} fait qu'on fait és cieux, & qu'est qu'on
^{no} apreste
 Dessus la grande mer de tout il s'endeste,
 Ce qu'on brasse en l'air: Il entend & voit tout
 Ce que par tout l'^{l'omme} monde est fait de bat en bout.

DE DIGENE LE CHIEN, DU LATIN DE IAN DORAE

Q V'ay-je plus de Laïs à lare,
 Ou du godet que poxe en vain,
 Quand les devoirs ma seule main
 De l'un & l'autre peut parfaire?
 Si la soif mes venes ultere
 Pour chasser tout le mal au loing,
 Ma main amiable au bebing
 Des deux l'office pourra faire.

D. V. M E S M E.

S I tu viens m'aboyer, Cerbere,
 S'ay dequoy te chastier bien:
 Mais si tu aimes mieux te taire,
 A toy chien ie veux estre chien.

DE VATOT.

PLus matin que l'aube ne point,
 Tout bon Vatot, tu ne fais point
 D'être debout pour tes parties,
 Apres leurs pieces que tu tries,
 Veillant soigneusement pour eux,
 Qui tremblent à ton huis poureux,
 Attendans derniere sentence:
 Et tu fais telle diligence,
 Qu'il te disent (pour ton état)
 Estre homme de bien d'Auocat:
 Mais veu que tu rens si conentes
 Toutes personnes attendentes,
 Et veu que te donnes l'ennuy
 De faire l'affaire d'autruy,
 C'est grand cas que ton propre affaire
 Autruy pour toy tu laisses faire.

DE FALAR TYRAN.

FALAR Roy d'Agrigant remply de felonnie,
 Exerça sans mercy jadis sa tyrannie
 Sur ses pauvres sujets, par tourmens inuentez,
 Les faisant bourreler sicrement tourmentez.
 Or le fondeur Peril, de soy peu pitoyable,
 Pensant faire au tyran vn present agreable,
 Forge vn Toreau d'airein pour vn nouueau tourment,
 Où le criminel clos, d'un beuf le muglement
 Formeroit de son cry, sentant la flamme éprise.
 Falar voyant ce don, d'une juste entreprise,

III. LIVRE

Fait sous l'airein muglant vn brasier alumer,
Et dedans pour l'essay l'ouurier mesme enfermer,
Ainsi qu'il meritoit faisant mourir le fevre,
Mugissant comme vn beuf, dans son cruel chefdenue,
Après tant d'innocens meurdres injustement,
Falar contre Peril fut juste seulement.

DE GILON.

Gilon se vante qu'à credit
Ne le fit onques à personne:
Je croy bien, nul n'y contredit:
Fait-on à credit quand on donne ?

DE IAQUES COLIN.

IAques Colin malade auoit couché,
Bien quinze jours de fievre continue.
Et pour auoir aux femmes trop touché
Au bon Abbé la fievre estoit venue.
Il se souuient du commun qui nous dit,
Prenez du poil du chien qui vous mordit.
Sa garde il prend toute vieille édentee
Au fau du cors: sur le lit l'a jettee:
Luy fait le coup chaud & couuert & roide:
Sa fievre chaude en celle vieille froide
Il perd tresbien. Quoy ? cette garison
Vous semble étrange ? & qu'eust-il peu mieux faire,
Que des docteurs ensuyuant la raison,
Garir le chaud par le froid son contraire ?

A COQUIER.

Sie te fay quelque requeste,
 Et que la chose te soit preste,
 Le premier est de la fournir:
 Ou, si tu ne la peux tenir,
 Le second est sans que m'amuses,
 Que tout à plat tu la refuses.

I'ayme bien celuy-là, Coquier,
 Qui fait cela que ie requier:
 Et ne hay pas celuy qui nie,
 Coquier, ce dequoy ie le prie:
 Mais ie hay celuy qui promet,
 Et remet, promet & remet.

DE GOVRMIER.

TV ne donnes de ton viuant,
 Mais apres ta mort, bien souuent
 Mainte promesse tu as faite:
 Tu dois, Gourmier, si tu n'es sot,
 Sans que pas vn t'en die mot,
 Deuiner ce qu'on te souhaite.

D'ANNE.

ANne, quelque part que tu ailles,
 Tousiours apres toy tu trainailles
 Vne meute de chiens, & grans
 Et petis: tousiours tu les prens
 Entre tes bras, & les careffes,
 Et deuant les gens ne les laiffes,

Et les appelle tes mignons,
 Les ayant tousiours compagnons.
 Mais si les gens on perd de vuë,
 Aussi tost abas on les ruë:
 Et lon peut aisément juger,
 Que ne leurs donne que manger,
 Car les os leur persent la peau:
 Anne, cela n'est guere beau.

Anne, tu n'aymes pas tes chiens,
 Puis qu'autre conte tu n'en tiens:
 Tu ne les aymes, n'aymas onques.
 Mais pourquoy les menes-tu donques
 Entre les gens? le plus souuent
 Ton ponent ne retient son vent:
 Le plus souuent d'entre tes fesses
 Maugré toy s'echapent les vesses,
 Et les chiens lors te font besoing:
 Car si quelcun se tirant loing
 Serre le nés, tourne la teste,
 Prenant sur eux excuse honeste,
 Les tensant le tort tu remets
 Sur tes chiens, qui n'en peuuent mets.

DE MARMOT.

Marmot, l'aléne que tu tires
 Est si puante horriblement,
 Que je fay douteux jugement
 Si tu vesses ou tu respires.

DV MESME MARMOT.

Ton cul, Marmot, & ta bouche mal-seine,
 Si t'ay bon nés, ont vne mesme aleine,
 (Miracle grand) voire qui pourroit bien
 Faire douter vn grand Fysicien.
 Mais ie te pry, Marmot, par écrit couche,
 Lequel des deux est le cul ou la bouche:
 Car en petant si tu parles par fois,
 Ie ne conoy ton pet d'avec ta voix:
 Ie ne sçay pas au vray si Marmot tire
 Du bas, ou bien si d'enhaut il respire,
 Veü que l'aléne & du haut & du bas
 A mesme flair, & ne differe pas.

Mais qui t'a fait tout à coup cet échange,
 Marmot, du haut & du bas, tant étrange?
 Voy ? qui t'a mis le cul en cet endroit,
 Auquel poser la bouche deueroit ?
 (O grand' merueille à qui de toy s'aprouche!)
 Punais Marmot par ta punaise bouche
 Tu vas petant, & tu n'en parles pas,
 Mais au rebours tu parles par le bas.

DE SON AMOVR
ENVERS CATIN.

Qui le croiroit ? vne mesme
 Ie hay chétif, & si l'ayme:
 Catin, comme se peut faire
 Vne chose tant contraire ?
 Ie ne sçay, mais ie le sens
 Eperdu de tous mes sens.

J'ayme ta beauté naïue,
 J'ayme cette couleur viue,
 A qui pale s'apareille
 La rose la plus vermeille:
 J'ayme ce ferme enbonpoint:
 Mais, Catin, ie n'ayme point
 Ta fierté ny ta rudesse:
 Ie n'ayme point ta finesse,
 Qui au dépourueu m'enuolle
 Hors de moy mon ame fole:
 Qui me fait tien, & n'a soin
 De moy à mon grand besoin.

Tu me sçais par belle amorce,
 Tu me sçais par douce force
 Attirer dans ta cordelle:
 Mais, ô trop fierement belle,
 Apres que tu me tiens pris
 Soudain tu m'as en mépris.
 Non ta grace ie n'accuse,
 Non, Catin, ie ne refuse
 D'estre tien : sous ton empire
 Viure & mourir ie desire,
 Surtout me plaist ta prison:
 Mais, Catin, c'est bien raison,
 Apres que par belle amorce,
 Apres que par douce force,
 Dans l'amoureuse cordelle
 Tu m'as tiré, fiere-belle,
 Qu'en fin de l'amoureux don
 Ie reçoive le guerdon.

Aumoins si dedans mon ame

*Tu as mise cette flamme,
 Si dans mon ame surprise
 Tu as cette amour éprise,
 Au moins de quelque douceur
 Pay' mon amoureuse ardeur.
 Qu'oy ? Catin, tu ne tiens conte
 Du mal qui tousiours surmonte
 Dedans moy ? ton œil s'égaye
 A voir empirer ma playe,
 Playe que ta belle main
 Fit dedans mon cœur mal sain ?
 O cruauté par trop belle !
 O beauté par trop cruelle !
 Qui me forces qu'une mesme
 Je hay chetif, & si l'aime:
 Cesse de plus m'enflamer,
 Ou commence de m'aimer.*

S V R L A M E D E E
 D E L A P E R V S E .

ET qu'est-ce que de nous, si apres nostre vie,
 Quand le triste tombeau couure & cache nos cors,
 Les hommes suruiuans de nous ne sont recors ?
 Si d'un beau souuenir nostre mort n'est suiuié ?
 Bien que ie blâme fort la trop auengle enuie
 De se faire fameux s'otant d'entre les mors
 Effacez de l'oubly, qu'eut Diodore lors
 Que le Temple il brusla de Diane Ephesie:
 Peruse, avec ton cors ton nom étoit caché
 En un mesme cercueil, mais Bouchet ut pitié

I I I. L I V R E

De te voir obscurcir avecque ta memoire:
 Bouchet par ta Medee a ton nom arraché
 De la fosse oublicuse : & sans son amitié
 A grand peine eusses-tu jamais si telle gloire.

G R I F F E D' V N C H I F F R E.

FAis vn cerne bien rond : dessus mene bien droit
 Vne ligne en longueur, qui des deux bouts égale
 Du cerne les deux flans : puis commence alendroit
 Où le cerne elle touche, vne autre qui deuale
 Contre bas pourfendant le cerne en deux demis,
 Et la mene plus outre aussi loin que l'espace
 Du cerne peut monter : là, le bout en soit mis.
 Puis commençant du point où le cerne elle passe,
 Sur ce qui sort dehors contourne vn demy rond,
 Et ce du costé droit : puis à la gauche tire,
 Tu point où elle joint l'autre ligne & le rond,
 Vne autre à elle égale : & la fin faut élire
 Tout droit dessous le bout de la ligne d'enhaut.
 Qui peindra bien cecy, de ma plus chere amie
 Et de moy trouuera la marque (s'il ne faut)
 Des lettres de nos noms, qui les premieres lie.

D V C O N T E N T E M E N T.

QV'vn autre se traueille affamé de richesse,
 A fin que par monceaux les pieces d'or il trie:
 Qu'vn autre vsant ses ans en vaine idolatrie
 Des seigneurs, Dieux du monde, au talon face presse:
 Mais qu'vne pauureté suportable me laisse

En paisible loisir couler ma douce vie,
 Et tousiours vn beau feu dans le foyer me rie,
 Et jamais le bon vin en ma caue ne cesse,
 Et que le doux lien d'vne maitresse chiere
 Des plus facheuses nuits la longueur acourcisse,
 Et des plus troubles jours sercine la lumiere.
 Ainsi content de peu, sans qu'on me vît ny pleindre
 De la neccessité, ny louiér l'auarice,
 La mort ie ne voudroy ny souhetter ny creindre.

DE SA FORTVNE.

Maudit soit le malheur qui m'a mis en tel point,
 Qu'aimant la Liberté me faut viure en seruice,
 Adorant la Vertu me plonger dans le vice,
 Entre ceux que ie n'aime & qui ne m'aiment point.
 Vne auengle fureur tellement ne m'époint,
 Ou par apast d'honneur ou par soif d'auarice,
 Que j'aime les méchans : & ne suis pas si nice,
 Que j'oiigne vn scorpion qui m'aguette & me point.
 O grande Nemesis, Deesse de vengeance,
 Soit ou que par mégarde ou qu'à mon esiant,
 Vn si dur chastiment se doiué à mon offence,
 Double sur moy les coups, & de ma penitencé
 Hasté le terme long : ou trop impatient
 Ie m'en va perdre ensemble & raison & constance.

A V SIEVR HOSTE.

O La grande mesauenture,
 O l'esclandre, ô fortune dure,
 O Dieux felons, injustes Dieux,

III. LIVRE

sur l'heur de Catin enuieux!

HOSTE, elle a perdu (la pauvette)

Son heur, son bien qu'elle regrette:

Elle a perdu tout son soulas,

Ses jeux, sa joye, ses ébas,

Son passetems : non tel que pleure

Vne jeune pucelle alheure,

Que sa poupee elle ne voit

Où deuant mise elle l'auoit:

Non tel que celuy que Lesbie

Du mignard Catule l'amie,

Quand pour sa Paisse en grans douleurs,

Ses yeux enfléz noya de pleurs:

Quand Catule avec la pauvette,

Qui sa Paisse morte regrette,

Fit plover pres de son tombeau

Mainte amourette & amoureux.

Cela qui de dueil la fait pale,

N'est vne sautrelle ou cigale,

Comme Myron comble de dueil

En mit dans vn mesme cercueil.

Elle ne plaint sa chienne encore,

Comme celle qui plaint sa Flore,

Pour laquelle Tyard veut bien

Eteindre l'astre Icarien.

Vn oiseau mort ne la tourmente,

Tel qu'un Perroquet que lamente

Forcadel par vers douloureux,

Le logeant aux chams bien-heureux:

Pour si petis jouets la belle

Ne feroit vne plainte telle,

Telle perte n'auroit pouuoir
A tels cris Catin émouuoir.

Mais vne perte elle plaint ores
D'un qui n'auoit vingt ans encores,
Mais auoit bien (si on ne ment)
Dix & neuf pousses d'instrument.

D'VN ENFANT MORNE.

I Amais né, toutesfois
Trespasé par deux fois,
Ie gy dans cette bierre.
Au ventre avec ma mere
Ie meur premierement,
Ie meur dernièrement
Enfant comme on m'emporte
Hors de ma mere morte:
En tout heureux, sinon
Que ie n'ay point de nom.

A MASTIN.

DE m'aboyer Mastin ne cesse
Pour auoir de mes vers renom,
Quel qu'il soit tel quel : mais si est-ce
Qu'on n'y lira iamais ton nom.
Qu'est-il besoin que lon conoisse,
Mal-heureux, si tu vis ou non ?

V O E V.

MOy, Biton, j'apar
De ce pin à Pan

III. LIVRE

Cette peau molette
 D'une brebiette:
 Ces léteux épis
 A Ceres : ces lis
 Aux Nymphes des ondes:
 Ces grappettes blondes
 De nouveaux raisins
 Au beau Dieu des vins.
 Pour ce peu d'offrande,
 Dieux, ie vous demande,
 O Pan, force agneaux:
 Nymphes, foison d'eaux:
 Ceres, bonne année:
 Bacchus, grand' vinee.

A I A N B R I N O N.

LE ciel nous rit, & la terre nous pleure:
 Fuians le pleur, le rire nous voulons.
 Comment cela ? Brinon, nous ne volons ?
 Ca deux cheuaux nous volerons sur l'heure.

D E R O N S A R D E T M Y R E T.

Quand deux vnis suyuent vne entreprise,
 Moindre l'ennuy, le courage est plus grand,
 Et tousiours mieux le proffit apparent
 D'un fait empris l'un deuant l'autre auisè.
 Mais quand vn seul (sans qu'un autre autorisè
 De son conseil l'œuvre qu'il entreprend)
 suit son auis, à la charge qu'il prend

Avec tel heur la fin ne se voit mise.
 Cecy disoit, celle nuit qu'épian
 Le camp vainqueur du Troyen endormy,
 Tydide acort s'accompagna d'Ulysse:
 Ainsi, Ronsard, de Muret t'aliant,
 Fausse le camp du vulgaire ennemy,
 Quoy qu'une nuit ton chemin obscurcisse.

V O E V.

TROIS freres trois rets t'apendent,
 O Pan : trois freres qui tendent
 Chacun à diuers gibier:
 Perrin aux oiseaux : Pasquier
 Aux poissons : Tenot aux bestes,
 Chacun en diuerses questes.
 Pour cecy, Pan, donne leur
 De toutes leurs chasses l'heur:
 L'un en l'air, l'autre és riuages,
 L'autre l'ait par les bocages.

A MONSEIGNEUR
LE CHEVALIER.

HENRY, sion Royal, qui nourry tendrement
 Des Musés au giron, rende leur nourriture,
 Embrassant & portant d'une soigneuse cure
 Tous ceux qui ont senty leur doux asollement.
 Moy, le moindre aujourdhuy je me sen tellement
 Redeuable enuers vous, Que ie ferois injure
 Trop grande à mon deuoir, Si par mon écriture

III. LIVRE

Je ne le publioy perpetuellement.
 Mes papiers vieux diront la douce courtoisie,
 Dont vous plaist honorer mon humble poësie,
 M'ouvrant de vos moyens la porte liberale.
 Mais à ce nouuel an preneꝫ en bonne étrene
 Le souhet de mon cœur, dont la voix ne soit véne:
 Viueꝫ tousiours heureux en la faueur Roiale.

EPITAPHE DV SIEVR
 D'ESPERVILLE.

L'Homme ne peut asseꝫ à son fait prendre garde.
 D'Esperville qui gist dauant ce que tu lis,
 O Passant, échapé des Martiaux perils,
 Au repos, d'Atropos sent la traitresse darde.
 Chassant libre & gaillard il tombe par mégarde
 Dans l'embusche de mort sur le bord d'vn taillis:
 Où contre des volcurs en armes racueillis,
 Pour le salut du peuple animé se haꝫarde.
 Là par eux fut blessé, non pas de leur vaillance,
 (Cinq ils estoyent contre vn) mais avecque végeance
 Car deux furent tueꝫ sur la place étendus:
 Les trois quites en sont étrangleꝫ & pendus.
 Belle fin, belle vie, au ciel & sur la terre,
 Qui poursuit les méchans soit en paix soit en guerre.

A LA ROYNE MERE
 DV ROY.

A Vous, Mere des Roys, qui mere de la France,
 Aueꝫ plus d'vne fois, veillant d'vn œil acort,
 Des peuples mutineꝫ apaisé le discord,

Lors que plus guerroyans s'armoyent à toute outrâce.
 A vous, qui confirmeꝝ d'une heureuse aliance
 Le lien de la paix, l'etreygnant de plus fort:
 A vous, des affigez l'amiable suport:
 A vous, Mere des arts & de toute science:
 A vous, qui des Palais si amples éleuez:
 A vous, qui de vos mains tant d'hommes haut leueꝝ
 Auez voulu combler d'honneur & de richesse:
 C'est peu parfaire en moy le dessein commencé,
 Qui par vostre faueur jusqu'au bout auancé,
 Publi ray de vos faits le bon heur & l'adresse.

P O U R M O N S I E V R
 D E B O N N I V E T .

DOnques, ô deloyal, faussant ta foy juree
 Tu poursuis la beauté qui m'a ravi le cœur !
 O l'étrange pouuoir d'une belle valeur,
 Qui romt du plus ami la promesse assurée !
 Bien tost ayant gousté mesme peine endurée,
 Que premier j'ay souffert deffous amour vainqueur,
 Tu me confesseras ton mal & ton erreur,
 Excusant le forfait de ton ame égaree.
 Tu diras que long tems dauant que l'entreprendre,
 Ta raison combatit encontre ses beautez:
 Mais qu'elles à la fin t'ont forcé de te rendre.
 Cognoy ce deloyal, ô ma belle maitresse.
 Deploye contre luy toutes tes cruautéꝝ:
 Ou ie le sommeray de me tenir promesse.

III. LIVRE
AV SIEVR DE FAVELLES
SECRETAIRE DE MON-
SEIGNEVR LE DVC.

FAVELLES, ie me plain de quoy l'humaine race
De viure par deux fois n'a des ciel la faueur,
A fin que la premiere acheuant en erreur,
En la vie seconde il fust tel disgrace.
Nous vivons incertains : Nostre âge coule & passe
Que nous doutons encor du bien & de l'honneur.
Qui nous paist? c'est l'esper de quelque faux bõ heur.
Mais dauant qu'il auienne il faut que lon trepasse.
O toy, que j'ay cognu droit, ouuert, sans feintise:
Qui rejettes au loin la fausse couuoitise,
Bien apris de donner à tout son juste pris.
Autant qu'auons vescu ie souhette d'annees,
Si pouuons l'obtenir des bonnes destinees,
Pour tenir le chemin que nous auons apris.

A CLAUDINE.

CLaudine vieille harangere,
Ie ven bien au vif te pourtrere,
Et tes beautez avec tes fleurs
Peindre de toutes leurs couleurs.
Tu as le cors comme vn cochon:
Tu as le nez comme vn guenon:
Les yeux comme vn crapaut, la jouë
Comme vn singe qui fait la mouë.
La bouche comme vn cul de poule,
Et le menton comme vne boule,

(Si la poule estoit éfondree
 Et la boule mal rabotee.)
 Tes oreilles comme deux vans,
 Crasseuses de hors & dedans.
 Ton poil est doux comme vne ortie:
 Ta main vne griffe d'Harpye:
 Ton aléne vn puant retret:
 Tes dens sont vn palis deffet.
 Tu as ta gorge tavelee
 Comme vn coc d'Inde piolee.
 Ton front rouge comme la creste
 D'vn coc qui a flambante teste.
 Ton gros sourcy tout reglissé
 Est comme vn chardon herissé.
 Tes mammelles sont deux sauates:
 Tes flans ce sont deux souches plates,
 De la pluye toutes pourries.
 Ton ventre est plein de pierreries,
 De safirs & rubis balés.
 Tes genoux sont crasseux & lés
 Comme le cul d'vn chauderon.
 C'est vn trou punés que ton con.
 Tes égues & tes gigoteaux
 Sont marquetez de maquereaux.
 Tes greues depuis le jarret
 Ce sont deux trippes de cotret.
 Tes cheucux sont vn vieil houffoir:
 Tes piés sont faits comme vn batoir:
 Tes cheuilles & ton talon
 Sont les marteaux d'vn forgeron.

I I I. L I V R E
D' V N E B O R G N E,

V N E borgne aime vn garçon qui en rien
De bonne grace & de beauté ne cede,
Tant il est beau, au Troyen Ganymede.
Pour vne borgne ô qu'elle juge bien!

A V R O Y H E N R I.

P Vis que tu recognois, noble prince, la gloire
De Dieu qui te la donne, époint de sa faueur,
Va trouuer ton armee, & ton soldat vainqueur.
Encores tout bouillant de la fraische victoire.
Pars sous vn bon augure, & rends à tous notoire
Comme Dieu veut punir l'Angloyse au traitre cœur,
Qui a rompu la paix pour suivre la rancueur
D'vn trompeur qu'à son dam elle a trop voulu croire.
Mais la juste vengeance, ô bon Roy, n'en est loüée
Dieu renforce ton bras : Dieu en a pris le soin,
Dieu qui sçait ta bonté & qui voit leur mechance.
Calais t'a de bon heur pour tout l'an estrené;
Si Dieu pour t'éprouuer fit l'autre infortuné,
Dans l'an il t'en rendra la double recompance.

A M O N S I E V R C H A I L L O V
R E C E V E V R G E N E R A L
D E S F I N A N C E S.

D Edans la tour d'Erein Danaé reserrée,
Sur les huis renforcez & sur les chiens guetans,
Autant que lon eust peu sembloit estre assurée
Des mignons qui perdoyent à l'assieger le sans:
Si du garde creintif de la pucelle enclosé

Jupiter & Venus se moquans n'eussent ris,
 Sçachans bien qu'à l'aman la tour ne seroit close,
 Aussi tost que de l'or la forme il auroit pris.
 Plus roide que le trait que le foudroyeur dardz,
 L'or fausse les rempars reuestus de rocher:
 L'or invincible passe attravers cors de garde:
 L'or fait des plus puissans les maisons trebucher.
 Le Prince Macedon ne trouuoit imprenable
 Nul fort où les mulets chargez d'or a venoyent,
 Iugeant que contre l'or n'y auoit rien tenable,
 Et que mesme les Rois par presens se menoyent.
 Maudit soit qui premier fouilla dedans la terre
 Ce metal adoré, pere de tant de maux:
 Et par qui & pour qui, les hommes font la guerre,
 Acharnez par entre eux plus que nuls animaux.
O CHAILLOV, ce mechant troublé de couuoitise
 Premier ou vrit le pas à la deloyauté:
 La bonté pervertit de fraude & de feintise:
 Enhardit les mortels à toute cruauté.
 On corront par presens le chef de la justice:
 On gaigne du país le traître gouuerneur:
 Vaillance & loyauté font joug à l'auarice:
 De nostre âge le gain a l'honneur sus l'honneur.
 L'acroissement des biens de trauai' s'accompagne:
 Plus lon a, plus lon est asamé d'en auoir:
 A bon droit des Seigneurs les rantes ie dedaigne,
 Et riche entre les grands ie ne voudroy me voir.
 Car j'ay pris en horreur la richesse abondante,
 Et d'estre recherché pour les biens ie ne veu:
 Mais que dans ma maison la souffrete ne hante
 Le desire à requoy viure content de peu.

I I I. L I V R E
D E M A R I E.

AVEC l'archet de la viole
Marie a l'arc de Cupidon:
De l'vn elle dit sa chanson,
De l'autre les cœurs elle afole.
Cetuy là retient les oreilles,
Et cetuy-cy flate les yeux,
D'vn jeu sur tous melodieux,
Et d'vn regard doux à merueilles.
Malheureux qui l'ayant rebelle
Ne peut à mercy l'émouuoir,
Mais tresheureux qui peut l'auoir
Autant douce comme elle est belle!

A L V C A S.

Lucas de t'enquerir cesse
Pourquoy tout chacun te laisse,
Pourquoy tout chacun te fuit
Pourquoy pas vn ne te suit,
Pourquoy où que tu te monstres
Nul deuant toy ne rencontres:
Tu as vn vice mauuais:
Partrop poëte tu es,
Lucas, tu es trop poëte:
O que la peste est infete
D'vn poëte si mauuais,
O Lucas, comme tu l'es.
On n'a pas si grande crainte
Souffrir d'vn Aspic l'attainte:

On ne craint le riagas
 Tant, & tant on ne craint pas
 D'un Scorpion la picure:
 On ne craint tant la morsure
 D'un gros mastin enragé,
 Comme tu as estrangé
 Ceux qu'à demi mors tu leffes
 Par les facheuses careffes,
 Quand tu les tiens en tes mains:
 Quand de tes vers inhumains
 Pleins de sotes falebourdes
 Tes mieux aymes tu essourdes,
 Quand tu es plus ennuyeux
 A ceux que tu aymes mieux.
 O que la peste est infete
 De toy si mauuais poëte:

Mais te diray-ie en vn mot
 Que tu es facheux & sot?
 Non : Mais veux-tu sçauoir comme
 Tu es vn importun homme:
 Celuy qui t'a plus ami
 Te voudroit son ennemi.

A CLAVDE MOISSON.

Celuy que tu cognois, Moisson,
 Qui a si piperie de façon,
 A tiré par la piperie
 De si simplette tromperie,
 Vn escu de mon escarselle:
 Et ce mon tresgrand bien j'appelle,

III. LIVRE

Bien que tu le dises perdu
Et qu'il ne me sera rendu.
Vrayment, Moisson, ie le veu bien:
Si est-ce que ie n'y pers rien,
Et tresmal tu me contredits,
Quand vn escu m'en sauue dix.

A PERRETTE.

TV as, Perrette, vn faux miroer:
Car si de ton miroer la glace
Representoit au vray ta face,
Tu ne voudrois jamais t'y voir.

DE BACCHUS ET DES NYMPHES.

Quand Bacchus du paternel foudre
Fut par les Nymphes enleué,
Elles de la soufreuse poudre
Dans leurs fontaines l'ont laué:
Deslors il ayma tant les belles
N'estant ingrat de leur bienfait,
Que celuy qui le prend sans elles
Prend vn feu qui encor mefait.

EPITAPHE DE RABELAIS.

O Pluton, Rabelais reçois,
A fin que toy qui es le Roy
De ceux qui ne rient jamais,
Tu ais vn rieur deormais.

FIN DV TROISIEME LIVRE DES PASSETEMES.



QUATRIEME LIVRE
DES PASSETEMS DE
IAN ANTOINE DE BAIF.

AV SEIGNEVR BERTELEMI
DELBENE GENTILHOME SER-
VANT DE MADAME DE SAVOIE.



TOY, qui d'un Toscan langage
Par odes nouvelles reduis,
Tout le decours de ton bel âge,
Qu'à tes familiers tu deduis.
Tu vas par vne voye belle

A la gloire, qui durera
Voire apres la mort immortelle,
A l'âge qui demeurera.
Toy content de mener ta vie
Auecques vn massif honneur,
Eloigné des dents de l'enuie,
Tu jouis d'un entier bon heur.
Aux Princes tu vis agreable,
Aux tiens tu rends le vray deuoir,
Aux amis ami secourable,
Voire aux vertueux sans les voir.
Ceux qui ont quelque renomée

I I I I. L I V R E

Pour la marque de la vertu,
 Tant elle est de ton cœur aymee,
 Encor les favorises-tu.
 I'en ay fait preuue sans merite,
 Qui m'as au besoin secouru,
 De grace qui ne m'est petite,
 Quand à ton secours recouru.
 Deslors (il faut que le confesse)
 Tu m'as ouuert par vn moyen
 A la fortune telle adresse
 Que ie n'ay soufrete de rien:
 Graces à la faueur Royale,
 Et des bons Freres de mon Roy,
 Et de leur Mere liberale,
 A qui ce que ie suis ie doÿ.

A V R O Y.

PUIS que mon Roy benin ouuert & veritable
 T'assure de ton aise, ô Muse, il faut choisir
 Vn beau chant non commun, pour luy donner plaisir
 Au doux remerciement de l'auoir favorable.
 Chante que c'est vn roc en sa parole stable:
 Qu'il promet & qu'il fait: & ne veut deffaisir
 Ce qu'il a resolu pour pensant à loysir:
 Que sa constante voix il garde irreuocable.
O CHARLE veritable: & qui vostre beau nom
 Honorez & titrez de tant digne surnom,
 Donnez vostre faueur qu'abondroit ie le chante.
CHARLE est puissant adroit courageux valeureux:
 D'autres hommes le sont. Mais d'estre si heureux
 Que meriter ce nom, Dieu seul & luy se vante.

DES PASSETÈMS. 90
CARTEL POVR MON-
SEIGNEVR LE CHEVALIER.

NON pour gangner vn present de haut pris,
Non pour desir de cruelle vangeance,
Non pour vouloir acroitre ma puissance,
I'ay brauement ce haut fait entrepris.
Mais viuement de la beauté surpris
D'une qui est des beautez l'excellance,
De tous guerriers ie deffi la vaillance,
Et n'en seray qu'injustement repris.
Tant ie me sen pour le merite d'elle
Et le cœur grand & juste la querelle,
Si quelcun veut son honneur rabesser.
Car ic maintien & prouueray, que celle
A qui ic suis plus que toute autre est belle,
Et luy feray par armes confesser.

A MONSIEVR CHANTERE-
REAV SECRETAIRE DE LA
ROINE MERE DV ROY.

CHANTEREAV, de qui l'ame caute
De la fortune & basse & haute
Cognoist justement la valeur:
Toy, qui sçais que c'est que du monde,
Il faut qu'à toy ie me debonde
D'un discours que j'ay dans le cœur.
Ie maintien que la vie humaine
Tout-par-tout de trauail est pleine,
Qui s'entremesle de plaisir.

IIII. LIVRE

Qui n'est pas vn seul, mais se change
 Selon que chacun se meslange
 De l'aborreur & du desir.
 Le Grand à ses desseins aspire,
 Le Petit ses souhets desire,
 Diferans chacun de sa part:
 L'vn creint par vne guerre ouuerte
 Ou par surprise vne grand' perte,
 L'autre doute vn petit hazard.
 Mais la peur & douleur Royale
 A celuy du Berger égale,
 Trauerse le courage humain:
 Le Berger, comme vn Roy d'Asie
 Sur tapis de Soye choisie,
 Sur l'herbe contante sa faim.
 Quant à liberté, que lon prise
 Plus que tout l'or, quand bien j'y vise,
 Je ne voy point de liberté:
 Ny le Roy libre ne se vante,
 Ny le Philosophe, qui chante
 Liberté l'yver & l'été.
 Tout homme combien qu'il soit brave
 De sa passion est esclave,
 N'eust-il qu'une once de raison:
 Et qui se vaneroit de vivre
 De toute passion delivre,
 Faudroit que ce fust vn oyson.
 Le Roy qui aux hommes commande,
 S'il ne veut qu'un autre y pretande,
 S'assujerist à son deuoir:
 Et voudroit aler à la chasse

- Bien souuent, qu'il faut qu'il s'en passe,
 Pour à son Royaume pour voir.
- Le Berger de ses moutons maistre
 Leur est serf pour les mener paistre:
 Autrement ne s'en seruiroit.
 Et de peur du loup il reueille
 Son œil traouillé qui sommeille,
 Quand plus volontiers dormiroit.
- L'auocat qui vend son langage,
 Le Soldat qui aime l'outrage,
 Le Pilote qui sçait la mer,
 Le maneuure & l'homme d'estude,
 Viuent tretous en seruitude,
 Qu'il ne faut haïr ne blamer.
- Le Genre humain ne sçauroit viure,
 De toy, Seruitude, deliure:
 C'est toy qui leur vie maintiens.
 Par toy secours ils s'entredonnent:
 A leur peine par toy s'adonnent:
 En leur deuoir tu les contiens,
- S'il est seruitude doree,
 C'est la seruitude adoree
 Des plus auansez courisfans:
 Qui sont les plus pres des personnes
 Des magestes douces & bonnes,
 A qui leurs ont voué leurs ans.
- Qui n'ont pas vne heure ordinaire
 A eux pour le fait necessaire
 Ny du repos ny du repas:
 Je m'en raporte au Sieur de Froze,
 Qui malement la nuit repose

I I I I. L I V R E

Sans souper ne le sçachant pas.
 C'est vn comte bien veritable:
 Il venoit de s'asseoir à table:
 Voicy messagier de la part
 De la Roync nostre Princessè,
 Qui le mande, & soudain le presse
 D'aler vers elle. Luy gaillard,
 Les mains nettes, la bouche fresche,
 Sans manger, sans boyre, de pesche:
 Et sa maistrresse va trouuer.
 Qui luy commanda quelque afaire,
 Que diligent il ala faire,
 Et puis s'en vient la retrouver.

La Roync l'oit. s'est retiree:
 Froze sans longue demeuree
 Se retire dans son logis.
 Le sommeil, qui la faim surmonte,
 Doucement ses paupieres domte,
 Et ferme ses yeux acueillis.

Froze, quelque petit sommeille.
 La faim regagne: & le reueille
 Chassant le sommeil de ses yeux.
 Il vcille: discourt: & repense
 De sa faim. Luy mesme se tanse,
 De son auanture oublieux.

Y'ay soupé. pourquoy me tourmente
 Cette faim? pourquoy se lamente
 Mon ventre aboyant sans raison?
 Le ventre d'ebat le contraire.
 Froze la nuit ut fort afaire
 A luy jouer telle traison,

Dont luy-mesme porte la peine.
 Voyez comme la Cour demaine,
 Ceux qu'elle detient en ses lacs !
 Tant s'en faut que ceux qui la suivent,
 Comme on dit, pour manger y vivent,
 Quand pour viure ils n'y mangent pas.

DES BIZERRES LIZEVRS.

Pour auoir la faueur, quel sujet doy-ie élire ?
 D'aller chantant de Dieu seroit trop dangereux :
 On me dira mondain si ie fay l'amoureux :
 Chacun se piquera si j'écri la Satyre.
 Des tragiques mechefs on n'ose plus écrire
 Pour n'ofencer les grans, qui les sentent sur eux :
 Les deuis pastoraux & les rustiques jeux,
 Sont friuoles sujets qu'on ne daigneroit lire.
 La comedie aussi ne se peut recevoir
 En langage François : mais dittes pour n'auoir
 La disgrâce d'aucun, qu'est-ce que ie doy faire ?
 Si d'escire aujourdhuy tu te pouuois tenir,
 N'entreprenant d'ateindre où tu ne peux venir,
 Ie te conseilerois en amy, de te taire.

SVR LA MVSIQVE
DE IANNEQVIN.

Pourquoy m'as-tu requis, Adrian, de donner
 Quelques vers pour les mettre au deuant de ce liure
 A fin de l'honorer ? Et bien ie te les liure :
 Mais le nom de l'Auther suffisoit pour l'arner.

I I I I. LIVRE

Où est-ce qu'on n'oit point Iannequin resonner,
 Iannequin qui si bien fait les voix s'entre-suivre,
 Que d'un plaisant Nectar les oyans il enyure,
 Et contreint leurs esprits les cors abandonner.
 Soit que d'accords pesans les motets il compose,
 Soit que représenter les vacarmes il ose,
 Soit qu'il jouë en ses chants le caquet féminin,
 Soit que des Oysillons les voix il représente,
 L'excellent Iannequin en tout cela qu'il chante
 N'a rien qui soit mortel, mais il est tout diuin.

DE VIS AMOUREUX.

Mignonne, ie te jure ma foy,
 Et ne t'en mentiray de rien,
 Ie ne sçay si tu m'aimes bien,
 Ie t'aime autant ou plus que moy.

R E S P O N C E.

Mignon, pour te monstrier combien
 Ie te porte entiere amitié,
 Ie ne t'en diray du tout rien,
 Car ie n'en diroy la moitié.

E P I T A P H E D E L A I S.

Cy gist Laïs, la Citoyenne
 De la ville Corintienne,
 Qui panadoit, donnant des tours
 En ses bobancieres amours,

En drap d'or & drap d'écarlate:
 Celle Laïs plus delicate,
 Que n'est delicate Cypris
 Dedans son Cyprien pourpris:
 Celle Cyteree mortelle,
 Qui par sa mignarde cautelle
 Avoit plus d'amis en ses las,
 (Que n'eut l'épouse à Menelas)
 Qui cueilloient les gaies fleurettes
 De ses paiables amourettes.

D'elle le cercueil odoreux
 Souffle encor vn fler saoureux:
 Et les cendres de cette Dame
 Sont encor confites en bâme,
 Et ses cheveux bien embâmeꝝ
 Flerent bon d'onguent parfumeꝝ.

Venus a pour la trépassée
 Sa bonne couleur effacée,
 Et de pleurs le mol Cupidon
 Eteignit presque son brandon.

L'Europe ainsi que pour Helene,
 Pour elle se fût mise en pene
 Tandis que le jour elle vit,
 Ne fût qu'au gain elle asseruit
 Sa trop commune jouissance,
 A quiconque avoit la puissance,
 Avec le vouloir de payer
 Du plaisir le pris & loyer.

A P E R R E T T E.

TV teins, Perrctte, tes cheveux,
 Mais c'est bien en vain que tu veux

III. LIVRE

Tâcher ainsi de faire prendre
 A ta vieilleſſe vn autre teint:
 Iamais de ton viſage peint
 Les rides tu ne feras tendre.
 Tu as beau d'eau de lis uſer,
 Et de faire à t'enceruſer
 De ton viſage vn ſau viſage:
 Tu ne fais rien que t'abuſer,
 N'en receuant nul auantage:
 Tu pers & ton fard & ta peine.
 Perrette, penſes-tu par l'art
 De ſçauoir detremper le fard,
 Faire d'vne Ecube vne Helene?

SVR LA MORT D'ALBERT
 IOVEVR DE LVT DV ROY,
 DV LATIN DE I. DORAT.

DE longue main la pierre qui t'auance
 Dans tes rongnons auoit pris ſa naiſſance,
 Sçauant joucur la ou entretenuë,
 Se ramaiſſoit la grauelle menuë,
 Qui les conduits t'étoupa d'vne fois,
 De ton vrine enſemble & de ta voix.
 La mort t'eſtoit dès long tems ordonnee,
 Mais ton doux lut de la corde ſonnee
 Deſſous tes doigts, de cette pierre dure
 Amoliſſoit la cruelle nature:
 Si que deſia la mace maniable
 Du grais moli ne t'eſt plus domageable.
 Mais quand venu au fort de ta vieilleſſe

De le sonner tant souuent tu fais cesse,
 La pierre tost reprend sa durezza,
 V'sant sur toy de plus grande fierté
 Que ne souloit. Quand toy ne conoissant
 Le mal secret en toy-mesme croissant,
 Et ta douleur desirant deceuoir,
 Tu fis vn chant à ton lut émouuoir.
 Et lors tu meurs, quand la pierre qui t'oït
 Deçà molist, Et delà mole estoit.
 Le grés tiré, qui ma parole apreue,
 Dur d'vne part, mol de l'autre se treuve.
 Comme vn coral, qui my- plante & my-pierre
 Montre vn costé, l'autre dans l'onde ferre:
 Comme est de frais l'image transmuee,
 Naguiere ayant la Meduse auisée,
 Qui n'a du tout d'vn homme la nature,
 Ny n'est du tout encores pierre dure.
 Telle est encor cette pierre, ô Albert,
 Que les Dieux font vn témoignage apert
 De ton doux jeu : duquel la renommee
 En ton viuant honorable semce,
 Sera plus grande apres que tu es mort.
 Tu meurs heureux, quand la pierre en ta mort
 Fait, ô Albert, la préuue du pouuoir
 Dont tu pouuois les pierres émouuoir.

SVR LE TEATRE DV
 SIEVR DE LAVNAY BOISTVAY.

TV as raison, Launay, d'appeller nostre vie,
 Le Teatre du Monde, où les Dieux immortels

III. LIVRE

Prennent plaisir de voir les malheureux mortels,
 Ou rire en comedie, ou pleindre en tragedie.
 Heureux sera celuy qui voyant la lumiere,
 Spectateur seulement des autres debandé,
 S'exemtera du jeu qui nous est commandé,
 Celuy de l'heur des Dieux ne s'éloignera guiere.
 O Launay, meritant vne louange grande,
 Des troubles d'aujourdhuy tu te fais spectateur,
 Où plus que la raison toute rage commande.
 Et depeignant au vis le Teatre du Monde,
 Tu ouvres le chemin pour jouir de cest heur,
 Nous tirant des malheurs dont cette vie abonde.

DV COURONNEMENT
 DE LA ROYNE.

R Eçoy dessus le chef la royale couronne,
 O Royne Elizabeth. Vien compagne à mon ROY
 Entrer dedans Paris en somptueux arroy,
 Confirmer les honneurs que la France te donne.
 Vien donque à la bonne heure : & toute faueur bonne
 Du ciel pleuve sur toy. Reviene avecque toy
 L'abondance & la paix, la justice & la Foy.
 Que vos deux Royautez tout bon heur environne.
 Fleurisse entre vous deux en heureuse concorde,
 Et le regne d'Auguste & l'amour de Livie,
 Qui du peuple François baniront la discorde.
 Desur les mécreans se decharge la guerre.
 Qui l'aimera la sente au peril de sa vie.
 La Paix soit le doux neu du lien qui vous serre.

D V R O Y S' A B I L L A N T
A L A V I E I L L E F R A N C O I S E .

SOit bon heur à la France, honneur & gaieté:
 Mon R O Y gaillard s'abille à la vieille Françoisé.
 Du ciel viene justice, & jamais n'y reuoise:
 Reflorisse en nos cœurs la sainte pieté.
 Regne par entre nous la ronde loyauté.
 Encor de là les monts la nation Gauloise,
 Encores outre-mer en la terre Idumoise,
 Le ve sûr le palmier nostre Lis replanté.
 Sire, parcida vant nostre tourbe legiere
 A pris en son abit la façon étrangiere:
 Vaine se depra vant a fait change de meurs.
 Mais vous, R O Y redouté vray miroir de noblesse,
 Vous montrant le patron de toute gentillesse,
 Conviez vos François aux antiques valeurs.

T R O Y E A P A L L A S .

GArdeuille Pallas, tandis que ie fu Troye,
 Autant qu'il fut besoing des honeurs ie t'offroye
 En ton temple doré: toutesfois à la fin
 M'abandonnant au sac tu m'as fait vn butin:
 Helas pour vne pomme enleuant par outrance
 De mon mur abatu la tant belle apparence.
 Si du berger Paris l'arrest ne te fit droit,
 N'etoit-ce pas asseZ si luy seul en mouroit,
 Luy qui fit le forfait, sans qu'ainsi lon resente
 Du coupable le tort sur ma ville innocente?

III. LIVRE
VN FAIT RICHE
EN VIEILLESSE.

TAndis que i'estois en jeunesse,
Ie fu pauvre, & ie n'auoy rien:
Et maintenant sur ma vieillesse
Ie suis riche & i'ay trop de bien.
O vray Dieu, en tous deux combien
Suis malheureux? quand ie pouuooy
Iouir des biens, ie n'en auoy:
Et quand ie n'ay plus la puissance,
Ny l'âge pour la jouissance,
Riche, mais en vain, ie me voy.

DE GALIN.

Pour hanter souuent les bordeaux
Le chancre t'acueillit si bien,
Que du nés en ta face rien
Ne t'est resté que les naseaux:
Et bien qu'on die que le chien
Echaudé n'aproche du pot,
GALIN, tu es tousiours si sot,
Que de hanter plus que jamais
Les bordeaux & les putains: mais,
Que dy-je si sot? tu es sage.
Car tu t'atens qu'en ton visage
Vn jour ton nés te soit rendu,
Le trouuant où tu l'as perdu.

DE MERCURE ET HERCVLE.

DE peu, Bergers, Mercure se contente,
 Prenant en gré ou du miel ou du lait:
 Non pas Hercule, qui veut qu'on luy presente
 Ou son mouton ou son veau grandelet,
 Voulant toujours sa beste à luy seulet.
 Aussi des loups il écarte la rage.
 Mais pour cecy qu'aués-vous dauantage,
 Puis qu'aussi bien le bestial récoux,
 En fin perdu doit mourir par l'outrage,
 Pauures Bergers, ou du garde ou des loups.

A CALLIOPE.

CALLIOPE, ô mon cher soucy,
 Que j'ay dès ma premiere enfance
 Tant aimée : & qui m'as aussi
 Tant aimé, que j'eu cognoissance
 De vos secrets, ayant credit
 D'entendre les rares merucilles,
 Que de ses profanes oreilles
 Le commun jamais n'entendit.
 Quel oubli paresseux detient
 En sommeil mon ame étourdie?
 Quel lien si pesant retient
 Ma langue en ma bouche engourdie?
 Qu'est peu si à coup deuenir
 Le haut dessein de mon courage,
 Qui menaçoit par son ouurage
 D'ctoner le siecle auenir?

IIII. LIVRE

Rechaufe ma lente chaleur,
 Et mon cœur paresseux anime,
 D'une si gaillarde fureur,
 Que si tu ne me fais le prime,
 Je ne reste pas à mépris
 En la course où l'honneur s'emporte.
 Mais si bien ma vigueur enhorte
 Que j'aye quelque digne pris.

AV ROY.

O ROY, qui pour jamais desirez aquerir
 Le titre & le surnom de Prince véritable,
 Titre & surnom Royal, qui fait recommandable
 Vn Roy plus que l'état de cent Roys conquerir:
 Si voulez à jamais empescher de perir
 Ce beau nom bien aquis, d'un vouloir immuable
 Maintenez & gardez vostre facture stable,
 Qu'avez daigné benin aprouver & cherir.
SIRE, sous vostre aueu (creve la barbarie)
 Nous donnons aux François la gentille façon,
 Et de vers & de chants qui estoit abolie.
 Vaine vostre promesse enuers nous acomplie:
 Vous, CHARLES, véritable en plus d'une chāçon,
 Gagnerez véritable vne immortelle vie.

O CHAR-

O CHARLES au beau nom noble Roy de la Frãces
 O vous Mere de Roys, des Vertus la faueur,
 Vous Frere & Fils de Roy HENRY le trionfeur,
 Vous FRANCOIS des Frãçois l'amour & l'esperãce,
 Gentil sang verrés-vous mourir en sa naissance
 Vostre facture née avecques si bon heur,
 Qu'elle peut à jamais celebrant vostre honneur,
 Publier de vos noms la gloire & l'excellance?
 Mes compagnons & moy sous vostre autorité,
 Ne mourrons depouilleꝫ de l'honneur merité,
 D'auoir osé, combien que l'entreprise meure.
 Quel reproche à venir vers la posterité,
 Par faute de sentir vostre benignité,
 Qu'un si rare dessein manque d'effét demeure?

A LA ROYNE MERE.

R OYNE, race de ceux qui premiers d'outre mer
 Mirent des anciens les arts en Italie,
 Et par toute l'Europe en façon mieux polie,
 Qui le nom MEDICIS fait par tout renommer.
 Si vous ouir des Roys & du peuple nommer
 Bonne Mere il vous plaît : Si vouleꝫ qu'on public
 Vostre sage valeur, qui jamais ne s'oublie,
 En tems de trouble & paix vous faisant estimer:
 Des Muses embrasseꝫ les seruans bien apris,
 Mainteneꝫ vos honneurs en vostre creature,
 Et ne laisseꝫ dechoir ce qu'auẽꝫ entrepris.
 Et vers les étrangers ne soufreꝫ de perir
 Le renom & l'essour de si noble facture.
 Ce n'est moins de vertu garder que d'aquerir.

IIII. LIVRE

MARS A MONSEIGNEUR
LE DVC D'ANIOV.

MOY le Dieu des guerriers, qui par ta main debelle
Les ennemis domtez, d'un lorier glorieux
Je veus environner ton front victorieux,
O grand DVC, la terreur de la tourbe rebelle.
Mais comme quand ie vâ de ma Maitresse belle
Essuyer ma sueur au giron gracieux,
Ainsi toy des combas n'estant plus soucieux
Des Muses tu cheris la douceur immortelle.
Elles, soit que te plaise entendre tes honneurs,
Ou rafraichir l'ardeur à tes ans bien seante,
Poussent en ta faueur mille gentils sonneurs.
Ils n'ont pas acheué : tu te reueilleras.
Un cœur tant genereux de peu ne se contante:
D'autres chants ils feront, d'autres faits tu feras.

APOLLON A MONSEI-
GNEUR LE DVC D'ANIOV.

A Mon tour ie ceindray de lorier verdoyant
Le jeune & sage front honoré de victoire
De ce grand DVC HENRY. Des filles de Memoire
Il va de sa chanson la dance recreant.
Et de la mesme main dont alla foudroyant
Des vices les scadrons, vaincueur se faisant croire
Par son terrible fer, il comble de sa gloire
Nostre gentil labeur, la plume maniant.
Toy Mars plus d'une fois de ma couronne aimée
Tu as orné son chef, qui merite à bon droit

Entre les plus vaillans heureuse renommee.
 Moy, pour qui seul Dafné lorier est deuenü,
 Feray-je moins pour luy ? qui va le chemin droit
 Du Pegase volant à la source conüe.

POVR LA ROYNE DE NAVARRE.

Vous qui au mois d'Avril, quand tout se renouuelle,
 Dans vn préau riant ou parterre flory,
 Choisissez vn fleuron des Heures fauory,
 Voyés-vous vne fleur plus que cette fleur belle?
 Vous qui sur l'Ocean tenez route nouvelle,
 A la terre qui prend nouveau nom d'Amery,
 Ou vers le bord Indoys, vites-vous onc chery
 Vn plus beau parangon que cette perle belle?
 Au printems ie la vy de roses entourée,
 Comme vn bouton de rose entre les autres fleurs,
 Et la plus belle rose en étoit reparee.
 En été ie la vy de perles decoree:
 Les perles de dépit se fondirent en pleurs.
 C'est la Perle & la Fleur des Princes honoree.

A MONSIEVR LE
DVC D'ALENCON.

FRANCOIS fleuron François, qui de vostre Granpere
 Pere des nobles arts le noble nom portez,
 Ainsi qu'auez son nom son renom emportez,
 Qui fait qu'entre les Roys glorieux il eclere.
 Ce renom il aquit d'aimer la troupe chere
 Des enfans de la Muse, ornez & suportez.

IIII. LIVRE

Vous de vostre suport les ouuriers enhortez,
 Qui vostre beau renom immortel pourront faire.
 Caressant les presens que la Deesse donne
 Comme les caressez, Atandez de sa main
 Vne plus que Ducale & Royale couronne.
 Qui les méprisera, l'oubliance est certaine
 Pour abolir son los: Elle menace en vain,
 Qui des dons de la Muse aura la maison pleine.

A LA ROYNE.

DE tout tems du haut ciel vne douce faueur,
 ROYNE, se repand sur la maison d'Autriche,
 Qui d'honneurs & de biens & d'estats la fait riche
 Par le sacré lien de nosses de bon heur.
 Ainsi ie presagy tout gaillard dans le cœur
 Par la sainte douceur qui de dans vos yeux niche,
 Que ciel, moins que jamais enuers la France chiche,
 Par vous la comblera d'abondance & d'honneur.
 Aussi la bonne Paix à vostre bon noffage
 Prepara le bon tems, nos discors apaisa,
 Atrempa les saisons pour bien-heureux presage:
 Nous ornant vos honneurs d'une mode nouvelle,
 Chantâmes cet accord, qui le trouble acoysa.
 soit le lien durable, & la Paix eternelle.

D'AMOVR ET CHASTETE'.

EN mesme instant Amour & Chasteté
 Se recontrans en contrariété,
 Dans les enfers deux ames enuoyerent:
 D'Amour cruel les brulantes ardeurs,
 La pauvre Phedre, & les trop chastes meurs
 Leur Hippolyt diuersement tuerent.

DE GVILLAVME CHIRVRGIEN.

CLande auoit la jambe bleffée,
 Guillaume l'a si bien pansée,
 Que le patient en est mort:
 Sur le Chirurgien chacun crie,
 Chacun sur luy remet sa mort:
 Qui pour en estre depeché,
 Dit: Aussi bien toute sa vie
 Le miserable il eust cloché.

A ESTIENNE IODELLE.

TAndis que graue en la Françoisé scene,
 Ta greue ornant de tragique chaussure,
 Ceignant ton chef d'ierre feuilleure,
 Tu fais marcher vne Didon malseine:
 Pauvre Didon en non portable peine,
 Ialouse irce à venger son injure,
 (Las malement!) contre Ænee parjure,
 Qui trop cruelle en soy-mesme forcene.
 Encor, Iodelle, en voix humble ie chante,
 N'osant pousser d'aleine qui soit forte

III. LIVRE

Mes petits vers rampans d'alure basse,
 Bien que Ronsard pour tragique me vante:
 Mais celle ardeur que i'eu premier est morte,
 Depuis qu'Amour me rompit mon audace.

LES MUSES.

CAlliope inuenta l'Heroïque chanson,
 Et Clion de la Lyre enseigna le doux son:
 La voix tragique fut par Euterpe eleuee,
 Melpomène premier l'épinette a trouuee,
 Des flutes les tuyaux Terpsichore entonna,
 Eraton des grans Dieux les louanges sonna,
 La docte Polymnie acorda la cadance,
 Polymnie à tous chans ajousta l'acordance,
 Vranie chanta le bal que font les cieux,
 Thalie du Comiq les jeux facecieux.

LE CHEVAL DE TROYE.

VOy d'aubout de dix ans l'embusche contre Troye:
 Voy le cheual enceint de celle troupe coye
 Des Gregeois tous armeZ. C'est Epé qui l'a fait,
 Et Minerue ordonna cet ouvrage parfait,
 Qui dans son ventre plein toutc la Grece enclost.
 Vrayment en vain mourut la plus part d'un tel ost,
 Puis que pour la victoire aux princes de la Grece,
 Plus que la bonne guerre a valu la finesse.

DV LATIN DE PASSERAT,

LA paix faite deux fois au fascheux mois de Mars
 Fut deux fois Martiale,
 Quand deux fois remit sus le cruel jeu de Mars
 Faite en saison fatale:
 Aujourdhuy que les cieux heureusement la font
 Au mois qu'Auguste nome,
 Qui les portes de fer du Dieu au double front
 Barra jadis à Rome.
 Le presage est heureux, d'autant que la fureur
 S'apaise de s'armee,
 Lors qu'au ciel du Lion la brulante chaleur
 S'abat des enflammee.
 Tost apres le soleil en la Vierge entrera
 A la Paix favorable.
 Cette Vierge est la Paix, ô CHARLES, qui fera
 Ta Paix ferme & durable.

AV SIEVR OTTOMAN.

Que cette folle rage, Ottoman, soit chassée,
 Qui pour le mettre ailleurs te dérobe ton cœur
 Ne nourry de mensonge vne vaine fureur,
 Qui naist d'oisiveté dans l'âme aparçssee.
 Amour bannist de nous toute malle pensée,
 Apastant nos esprits d'une feinte douceur:
 Amour nous enuelope en sa plaisante erreur,
 Où toute liberté se foule terrassée.
 La beauté florissante est comme la vipere
 Entre les belles fleurs, qui fait nouvelle peau,

I I I I. L I V R E

Quand le Soleil plus doux ouvre la prime vere.
 Ha malheureux l'Amant, tant soit sa Dame belle !
 Plus elle a le corsage & le visage beau,
 Plus de fausses traisons en son cœur elle cele.

A B A C C H U S.

O Doux pere Bacchus, Ariadne portee
 Par tes lions rampans dans les Astres des cieus,
 Témoigne que tu dois te montrer gracieux,
 A ceux qui de l'amour ont l'âme tourmentee.
 La fumeuse liqueur que tu as inuentee
 D'un sommeilleux oubly puisse clorre mes yeux,
 Afin que ne pouuant de ma belle auoir mieux,
 Au moins par son Nectar ma douleur soit matee.
 Tousiours les sobres nuits, des oisifs amoureux
 Tourmentent les esprits, esperans & poureux,
 Qui sont veillez à tour de peur & d'esperance.
 Ceux à qui tes presens ont échaufé le chef,
 Ou dorment afranchis de tout triste méchef,
 Ou veillent bien-heurez d'une riche assurance.

D'V L Y S S E E T P E N E L O P E.

H Eureux fils de Laërte, Vlysse sage caut,
 Qui jadis rencontras vne épouse sans blâme!
 La chaste Penelope eut bien vne bonne âme,
 Qui de son cher mary si longuement se chaut.
 Sa vertu, de bon bruit n'aura jamais defaut:
 Car toutes nations, de cette honeste Dame
 Ont fait des chants d'honneur, par qui la preudefame
 Du sexe feminin tient le ranc le plus haut.

Aussi vingt ans durant à son amy fidelle,
 Attendit son retour luy gardant loyauté,
 Trompant ses poursuiuans d'une sainte cautele.
 La fausse Clytemnestre au sien ne fut pas telle,
 Mais encor aujourdhuy par sa grand' cruauté,
 Les plus femmes de bien ont à rougir pour elle.

D'VN MEDECIN.

ME trouuant vn peu mal hier,
 Vn Medecin (mais de raison
 Vray ennemy) ie fay prier
 De venir pour ma garison:
 Il vient: il me taste le poux:
 Et puis du vin le nectar doux
 Deffendant au pauvre malade,
 Commande la tizane fade.
 Le lourdaut, qui ne sçait pas, comme
 Homere le joyeux vieillard,
 Chante tant que le vin gaillard
 Est la force & vigueur de l'homme.



DE PRATIER.

PRatier, pour vn double perdu
 Par desespoir se fust pendu:
 Ayant arresté de se pendre,
 Ne fust qu'un blanc on luy veut vendre
 Le cordeau. Mais voyant que tant
 On le luy fait, tout mal contant,
 Mieux vaut (dit-il) vure en misere
 Que mourir d'une mort si chere.

I I I I . L I V R E
A F R A N C O I S
D U C H A T .

Sie ne t'aymassé mieux,
Duchât, que mes propres yeux,
Crois tu que jamais tu pussés
Ou que demeurant tu fussés
Ainsi qu'hier me tréner
A fin d'ainsi me gesner,
D'une gesne si cruelle
Qu'aux enfers n'en a de telle?
Mais que t'ay-ie dit ou fait,
Mon Duchât, dont le forfait
Contre moy merite & vaille,
Que d'une telle canaille
De poëtes morfondus,
Tes mieux aymeꝝ soyent perdus?
Après la douce lecture
De ta poësie pure:
Après auoir leu tes vers
Pareꝝ d'ornemens diuers,
Qu'amoureux & amourettes
Et mignardises tendrettes
Donnent à celle des sœurs,
Qui les plonge en ses douceurs,
Tu fais la fade lecture
D'une poësie impure,
Tu me lis des rudes vers
Fangeux de bourbiers diuers,
De Richard, Suran, Bourbriere,
Vouté, Caquet, & Rabiere,

La honte & le deshonneur
De ce tems plein de bonheur.

Voicy donc la belle chere
Qu'à tes amis tu sçais faire,
Tes amis qu'ainsi tu trétes
Avec ces pietres poëtes.

Je ne veu pas, ie l'asseure,
Duchat, que cecy demeure
Impuni. Moqueur, cecy
Ne demourra pas ainsi,
Qu'ainsi tes amis tu traittes
Des pestes les plus infectes,
De tout l'Elicon Romain!

Mais, s'il peut estre demain
De matin ie delibere,
Aller à chacun Libraire
A chacun des Imprimeurs
Pour recouurer nos rimeurs.
Coing n'aura dans leur boutique
Tant de moiffon antique,
Soit-il relant ou caché,
Qui ne me soit recherché.
Là ie trouueray la noifé
De Sagon: Là de Pontoifé
Le bon enfant chercheray:
Là Bouchaud ie trouueray,
Et tout ce qui de naguieres
Sert d'envelopoirs aux beurrieres,
Aux Epifliers de cornets,
Aux Libraires de pacquets.
Toute ceste orde vermine,

IIII. LIVRE

Toute ceste bourbe fine,
 Des Rimeurs ie te triray
 Et chez moy te les liray,
 Et t'en effourdray l'oreille
 Pour te rendre la pareille,
 A fin que dorenavant
 Tu ne mettes en avant
 Toute ceste orde canaille,
 Et que par ceste merdaille
 De poètes morfondus
 Tes amis ne soyent perdus.

D'VN VIEILLARD.

VN flac Vieillard voyant sa jeune femme
 Perdre son teint par les pales couleurs,
 D'elle s'enquiert de son mal, & la blasme
 Qu'elle n'y pense. Elle avec tristes pleurs
 Et drus souspirs respond, Ia Dieu ne plaise
 En l'offençant que j'achette mon aise:
 Les Medecins, qui on tasté mon pous
 Faire cela me le conseillent tous:
 Mais j'ayme mieux malade me mourir,
 Qu'en offençant Dieu & vous me guarir.
 Son bon mary de se guarir la presse,
 De ne laisser perdre ainsi sa jeunesse,
 Et veut tresbien qu'autre face l'affaire
 Que l'âge vieil ne luy permet de faire.
 Elle à son chois, mande par tout querir
 Hommes dispos: Dedans sa chambre ils vont:
 Et là chacun (le doux mal qu'ils luy font!)
 A qui mieux mieux besogne à la guarir.

DES PASSÉTEMS.
A V M E D I Z A N T.

103

T^V trouues, ce t'oit on dire,
Mon stile rude & mal jointe
Je ne m'en ébahi point,
L'asne juge de la lyre.

D E I A N.

IAn, sous ceste biere close,
Repose, si lon peut bien
Sans faillir dire, il repose,
D'un qui ne fit jamais rien.

A G V I L L O T.

Q^VI est ce mignon jouvenceau
Si crepelu, si coint, si beau,
Qui est tousiours avec ta femme?
Y ay grand peur qu'il ne te diffame.
Qui est ce jeune compagnon,
Qui est ce muguet si mignon,
Bon Guillot, qui à sa maistresse
Si priuément tousiours fait presse,
Qui vient tousiours la sacouter:
Et qui vient tousiours s'acouder
Si hardiment dessus sa chaire,
Et qui là sacoutant la baize,
Et qui fait à chaque fois
Trotter ses anneaux par ses dois?
Respon moy, Guillot, ie te prie,
Respon moy, mais sans raillerie.
C'est mon mon cleric (ce dis-tu) qui fait

I I I I. L I V R E

Mes affaires. Mais en effect
 Ie le soupçonne fort de faire
 Pour tes affaires ton affaire.

D E P O L.

POL tu voudrois acheter l'heritage
 De ton voisin, & vrayment tu es sage:
 Mais ton voisin ne veut la vendre ainsi:
 Pol, ton voisin vrayment est sage aussi.

A M A R G O T.

ON te donne le bruit, Margot,
 Que tu estimes chacun sot,
 Qui est ton hoste quelque espace,
 Si tout soudain il ne t'embrasse.
 Bien, si tu n'es assez fillastre,
 Tu n'es aussi par trop vieillastre:
 Mais puis qu'ainsi tu te gaudis
 Des hostes qui s'en vont, tandis
 Que suis ton hoste, ie te prie
 Fay moy franc de ta moquerie.
 J'ayme mieux me moquer de toy
 Qu'apres tu te moques de moy.

D' A N N E.

ANNE se lcuoit d'une selle,
 (Anne assez gente Damoiselle
 Mais vn peu grasse) l'vn des plis
 De sa cotte demeura pris
 (Comme il auient aux acroupies
 Qui ont les fesses rebondies)
 Alendroit d'où s'escoule vn vent

Qui rien de l'ambre gris ne sent:
 Quelcun l'auiant, pensa dire
 Se raillant quelque mot pour rire,
 Et se rit le premier bien fort,
 Madamoiselle, mais qui mord
 (Dit-il) si estroit vostre cotte?
 Elle qui n'est pas vn brin sottte
 Luy respond & luy donne bon.
 Il torche sa bouche, mignon,
 Pour te baiser: vien t'en, aprouche:
 Il veut te baiser en la bouche.

A A G N E S.

Tas au front vn peu de cicatrice,
 Lequel Agnes tu tiens tousiours couuert.
 Ne cache rien: on pense plus de vice
 Au mal caché, qu'au mal qui est ouuert.

D E G O R M I E R.

Gormier s'est fié pour guerir
 A vn Medecin, qui se vante
 D'auoir son office vacante:
 Gormier ne doit-il pas mourir?

D E M A R G O T.

Tant soit-il de grace gentille,
 Nul demeurant en ceste ville
 Ou passant vanter ne se peut
 T'auoir baizé tant seulement,
 Margot: & ie te croy vrayment,
 Qui te baise, il fait plus s'il veut.

IIII. LIVRE
DE PERRETTE.

ON fait courir le bruit, Perrette,
Que tu le fais à la rangette
A tous les moynes du couuent:
Et tu dis que femme viuant
Mieux que tu l'es n'est preude femme.
Voy ! ce n'est moy qui te diffame.

Plus tu dis qu'en tous tes cartiers
Femme n'est, qui plus volontiers
Voise à l'Eglise des bons freres:
Et chacun qui a des affaires
Au marche n'y va til, di moy,
Aussi volontiers, comme toy
A l'Eglise, où sont tes pratiques,
Où tes affaires tu traficques?
Mais si suis-ie femme de bien.
Pourquoy non ? aussi ie le tien.
Pour le moins preuue tu en donnes,
Ne hantant que saintes personnes.

D'ANNE

ENtre vn vieillard & vn chatré,
Toutes les nuits Anne est couchee,
N'estant de nul au vif touchee.
L'vn d'eux est de vieilleesse oultré,
Et l'autre d'âge conuenante,
Mais chacun en vain se tormente:
Pour ces malheureux Anne fait
Et pour elle ceste priere:
Fay ces deux reuenir, Cythere,
L'vn jeune, l'autre homme parfait.

DE MARQUET.

LE bon Marquet commence tout,
 Qui l'a jamais veu rien parfaire?
 Marquet, ie croy, n'en vient à bout,
 Quand à sa femme il le veut faire.

DE BONPAIN.

BOnpain auoit esté blessé:
 Et soudain pour estre pansé
 Se fourra dedans vn ouuroir
 D'vn barbier, qui fait son deuoir,
 De sonder si la playe donne
 Dans la ceruelle. Vn qu'on testonne,
 Laissez ce pauvre homme (dit-il)
 Où fouillés-vous de vostre outil,
 Quand il n'auoit point de ceruelle
 A l'heure qu'il prit la querelle?

DE GILON.

Gilon se plaint qu'au matin
 Gobert Guillaume Robin,
 Au lit prendre ne la laissent
 Nul repos, & qu'ils ne cessent
 De la presser tous les jours,
 La priant du point d'amours.
 Ils ont tort : l'importunee
 A raison : pourquoy aussi
 Importunent-ils ainsi
 Vne pauvre abandonnee?

I I I I . L I V R E
D E N E G I N E .

Tu es & si n'es pas digne
Du nom que tu as, Negine:
De deux choses tu n'as qu'une,
Tu es froide, & tu es brune;
Tu es Negine d'un point,
De l'autre tu ne l'es point.

D E M A R G O T .

MArgot n'attend qu'autre la prie,
Mais veut la premiere prier,
Et sans couuerte ypocrisie
Veut tousiours le droit manier:
Donques s'elle ayme tant le droit,
Et s'elle est tousiours en priere,
Ne se peust elle à bien bon droit,
Dire deuote & droituriere?

D E M A S Q U E .

Masque au visage rechigné,
Me vit en gaillarde pensée:
Et d'un front hideux renfrogné,
Comme de ma joye offensée,
Dit: que j'auoy veu mes amours.
Masque, est-il vray ce que tu dis?
Tu n'es jamais en tes bons jours,
Tes amours jamais tu ne vis.

VN muguet de mes vers barbouille,
Mais qu'il se garde que Baif
Ne sente pas qu'il le chatouille,
Qu'il ne le pique jusqu'au vis.

A IAQVES PELETIER.

Mais d'où vient cela ie te prie,
Peletier, que durant sa vie
Le Poëte mieux accomply
Ne se veoit jamais anobly,
Et bien peu souuent se voit lire
Quelque beau vers qu'il puisse écrire:
Et que tousiours on prise mieux,
Que les plus jeunes les plus vieux:
Bien que des jeunes l'écriture
Ait plus exquise polissure:
Encor que les vers plus âgés,
Trainent des flots plus enfangés?

Peletier, est-ce que l'enuie
Acompagne l'humaine vie,
Qui aussi tost sa rage éteint,
Que la vie a son but atteint?
N'est-ce point qu'à regret on laisse
Ce qu'on ayme dès la jeunesse,
Et qu'on ne peut mettre en oubly,
Ny delaisser son premier ply?
Son aage se moquoit d'Homere:
On lisoit Enne le vieil pere,
Que Rome auoit Maron viuant.

I I I I . L I V R E

*Iamais comme l'âge suyuant,
On n'a vu que le present âge
Donnast l'honneur & l'auantage
A qui le meritant viuoit
Aussi grand que le mort l'auoit.*

*Mais quoy que ce soit, petit Liure,
Pour moy ne te haste de viure:
Ie ne suis pressé d'auoir nom,
Puis que tant couste le renom.*

A C R O S T I C H E .

A Yant tourné cent fois les lettres de ton nom,
N'ay peu rien rencontrer qui soit propre devise,
Ny pour la grace rare en telle beauté misé,
Et moins pour la vertu, digne de grand renom.
D'où peut venir la faute ? ou, puis-je m'abuser ?
Est-ce que j'ay fuy d'en prendre assez de peine ?
Bien feroit contre moy cette excuse trop vaine,
Et ie m'accuserois au lieu de m'excuser:
Ta valeur, ta vertu, ta grace, ta beauté,
Venant du plus parfait qu'on peut, des cieux attendre,
Ne daignant de ton nom quelque louange prendre,
Enrichissent ton nom d'un honneur merité.

D E L A F O L I E C O M V N E .

Quel letarge endormant assoupit mes esprits ?
Quelle froide poison en bruuage ay-je pris,
Qui m'a du tout éteint la fureur agreable,
Dont ie me rauissoy, moy pauvre miserable ?
Ie ne me conoy plus, tel est l'auengle é moy
De l'oubly qui me tient, que ne pense estre moy.

J'écriroy volontiers, mais ma langue pliee
 Attachee au palais, ou colee ou liee
 Dans ma bouche ne peut ny parler ny chanter,
 Et s'efforçant en vain ne fait que hocqueter.
 Si faut-il qu'à hocquets, de peur que ie ne creue,
 Je decharge mon cœur de l'ennuy qui me greue.

Monsieur, depuis le tems qu'à vous ie suis venu,
 Et depuis que m'auez pour vostre retenu,
 Vous auez fait si peu de séjour, qu'à vous suyure,
 Je n'ay mis vn seul coup le nés dedans le liure,
 Bien que ce soit le seul & le plus grand plaisir,
 Ou ie passe le tems, quand ic suis de loisir:
 Car quel plaisir plus grand au monde scauroit prendre
 L'homme s'il a raison, que de lire ou d'apprendre?
 Or bien que ie n'ay leu, ie ne seray repris,
 Depuis que suis à vous, de n'auoir rien appris:
 Et s'il vous plaist m'ouïr, ie vous en rendray conte,
 Si bon que vous & moy ne rougions de honte,
 Vous de m'auoir à vous, moy d'auoir perdu tems:
 Car ie feray si bien que ic rendray contents
 Ceux qui nous blasmeroyent, s'ils ne trouuent étrange
 Que ie gratte vn petit la peau qui leur demange.

Monsieur, j'ay plus appris à voir ce que j'ay vu,
 Que ie n'ay fait deuant en ce que j'auoy lu:
 Car des liures écrits la fumeuse science
 Ne peut de rien seruir qui n'a l'experience:
 Qui s'acquiert prattiquant les meurs & les façons
 Des bières humains, & non pas les chansons.
 Il est vray qu'ayant lu du liure l'écriture,
 L'esprit est plus ouuert à juger leur nature.
 Et bien qu'as-tu appris? Que la plus part de tous,

I I I I . L I V R E

*Ou pour n'en mentir point, tous les hommes sont fous.
Le prouueras-tu bien? Ouy bien sur ma vie,
Si ton peu de bon sens ne quitte à ta folie.*

R E C I T E N L A S A L L E
D E B O U R B O N P O U R L E F E S T I N
de monseigneur de Neuers au mariage de
monseigneur de Guise, sur l'entreprise du
chateau Faé du Negromant, qui repre-
sentoit l'Amiral de Coligny.

DAmes, en qui reluit toute valeur,
Quel sort malin vous jette en ce malheur?
Que faites-vous en cette place pleine.
Tout à l'entour de hazard & de peine?
Si vous sçauiez quel seigneur a pouuoir
Dedans ce lieu, vous crâindriez son sçauoir.
Retirés-vous en haste, n'arrestez:
Sortez, fuyez, le danger euitiez:
Si me croyant vous quittez de bon heure
Le mal fatal de si fausse demeure,
Vous me lourez deliures du méchef,
Qui dans ce lieu vous pendoit sur le chef.

A M O U R .

QVi es-tu toy, qui veux à l'étourdie
Mettre en effroy si noble compagnie?
Non, ce vieillard trompeur n'a plus pouuoir,
Ny cœur d'oser vser de son sçauoir:
Ses charmes vains ont perdu leur puissance:
Plus ne tuy sert sa méchante science.

Toy souuien-t'en. Sçachez, ô vous les belles,
 Que le Dieu Mars a mis des forces telles
 Au vaillant bras de trois preux Cheualiers,
 Adroits & forts, inuincibles guerriers,
 En les armant de si grande vertu,
 Que nul des trois ne peut estre abbatu.
 Car nul hum un ne Daimon (tant soit forte
 Celle fureur qui au choc le transporte)
 Contre ces trois ne pourra plus tenir,
 A peine donc au dessus d'eux venir.
 Donc ne bougez : mais d'assuré courage
 Ebattés-vous, moquant son vain langage.

CARTEL POUR VN CHEVA-
 LIER MENE PAR DEUX AMOVR S.

Voyez ces deux Amours qui vont victorieux,
 Me menans prisonnier, trionfans de ma prise,
 Et chastians mon cœur de sa fiere entreprise
 De s'afranchir de l'arc qui metrise les Dieux,
 Bien que ie soy veincu, i'en suis plus glorieux,
 Que si i'estoy veincueur. & beaucoup plus ie prise
 Estre mené captif qu'auoir pleine franchise,
 Me voyant enchené d'un or si precieux.
 Si quelque Cheualier dessus les rans se treuve,
 Qui dedegne mon heur ou qui l'estime à honte,
 Les armes en la main ie veu luy faire preuue,
 Qu'il n'est point seruiteur de m'uirssi plus belle:
 Et que ma loyauté d'autant sa foy surmonte,
 Que celle que ie fers, dessus la siene excelle.

I Anot ioueur de musette,
 Qui de vieillesse foiblette
 Déjà commence à trembler,
 Et qui souloit acabler
 Les loups de cette massuë,
 Mais maintenant d'ahan suë
 Du pié iusques au sommet,
 Quand à s'en aider il met
 Tout ce qu'il a de courage:
 La quittant pour son vieil âge,
 Il prend vn bâton au poin,
 Pour s'en aider au besoin
 A soutenir sa vieillesse,
 Et la massuë qu'il laisse,
 Te la vouë, ô gardien
 Des troupeaux, & n'en veut rien,
 Sinon (Roy des cheuuretestes)
 Que les loups & autres bestes
 Par les boys n'entendent pas
 Que sa force est mise au bas.

DE BONPAIN.

V A paître à l'écart si tu veux,
 Pastoureau, les beufs que tu menes,
 Que Bonpain dehors de ces plenes
 Ne t'enleue toy & tes beufs.

DV MESME.

S I legier comme sa main,
 Estoit le pié de Bonpain:

*Cé Bonpain, ie t'en assure,
Seroit en terre vn Mercure.*

V O E V.

A Pollon au crin doré,
Si ie t'ay bien honoré
D'vn cœur net de toute offence,
Depuis ma premiere enfance:
Veules d'vn bon œil me voir,
Et ce mien vœu recevoir.
C'est de ma jouë barbue
La premiere fleur tondue,
Tu me feras pour cecy
Que ie tonde vn jour ainsi
Que la fleur de ma jeunesse,
Les grisons de ma vieillesse.

A MARC ANTOINE

DE MURET,

CONTRE,

Quel train de vie est-il bon que ie suiue, &c.

Tout train de vie il est bon que tu suiues,
A fin, Muret, que heureusement tu viues?
Dans le Palais sont punis les exces,
Par bon conseil s'appaisent les proces,
Voy les maisons de mille plaisirs pleines:
Le labourage est plein de douces peines:
Le matelot par vn peu de labeur,

I I I I . L I V R E

Iouist dugaing deliuré de la peur.
 Celuy qui erre en vn país estrange
 S'il a du bien à son plaisir le mange,
 Sil n'en a point il en est moins troublé:
 Le marié vit de joye comblé:
 Celuy qui vit sans estre en mariage,
 Seul sans traual passera son doux âge.
 Auoir enfans, n'auoir enfans aussi
 Ne donne plus l'un que l'autre soucy.
 La jeunesse est gaye belle agreable:
 La vieillesse est rasisse, & venerable,
 Qui le passé remet deuant les yeux.

Donques, Muret, ie croy qu'il vaudroit mieux,
 Si lon pouuoit, ne cesser jamais d'estre,
 Que de mourir si tost qu'on vient de naistre.

D' A M O U R.

S'Amour cruel enflamme & naure les humains,
 Souillant dedans leur sang ses inhumaines mains,
 Est-ce rien de merueille? A qui Venus est mere,
 Venus qui le Dieu Mars a pour son adultere?
 Qui est aussi la femme au Dieu fevre des Dieux?
 Qui pour merc a la mer, dans les flots furieux
 Ayant pris sa naissance? Amour a donc ses braises,
 Des brasiers de Vulcain ardans en ses fournaises:
 Sa cruauté des flots de la mer: & de Mars
 Le meurdrier ayme-sang, ses homicides dars.

D E V E N I C E.

ON te fait trop grand tort, Venice,
 De te reprocher l'auarice:

Ils ont menty les medifans,
 Qui vont ainfi de toy difans,
 Pour te rendre deshonorée
 Que tu es chiche & referree:
 Ils te donnent ce faux renom
 Les bauars : il n'en est rien, non:
 Ic le fçay. au moins à l'espreuue
 Ouuerte & large ie te treuue.

DE FAYTOVT.

Tu es banquier, tu auocaffes,
 Tu es mouche, tu es flateur,
 Tu as estaux en toutes places,
 Tu es maquignon, rapporteur,
 Faux monoyeur, témoing, menteur,
 Maquereau, larron, sans menage:
 Et tu fais tout ce couretage
 sans auoir charge en ta maison,
 M'ébay-ie donc sans raison
 Que tu n'as du bien dauantage?

DE DEMOCRIT.

Quand le bon rieur Democrit
 Toute chose cut bien méprifée
 De son ris, la mort qui tout rit
 De luy-mefme fit sa rifée.

A HENRY ESTIENNE.

Donc, Estienne, tu te redonnes
 A ta ville, & tu abandonnes
 Des chams le séjour gracieux?

I I I I . L I V R E

Donc le repos folacieux
 De nos chams plus ne te recree,
 Mais le bruit de Paris t'agree:
 Comme tu as bien merit e
 Iouy du bien de ta cit e:
 Toustours   tes oreilles tonne
 Le tonnelier coignant sa tonne.
 Le tailleur s'en vienne tailler
 Sa pierre pour te reueiller
 Le matin : Et qu'au soir t'effourde
 Le son de quelque cloche lourde.
 Le charretier le long du jour
 Criant ne te donne sejour,
 Importun deuant ta fenestre:
 Et ce quand plus tu voudrois estre
 En repos pour jouir des dons
 Que des Muses nous pretendons.
 Et si tu vas parmi les rues,
 Sois tant que point ne te remues
 De crieurs de sien empresse.
 Ou le solliciteur presse
 Donne tel coup en ta poitrine
 Qu'il t'en face ployer l'echine:
 Le portefange tumbereau
 Souille de fange ton manteau.
 Rencontre vne charogne morte
 Que loin en la voirie on porte:
 Trouue quelqu'un de peste atteint
 Qui sur la suiere se plaint :
 Endure des maux plus de mille
 Ordinaires dedans la ville

Soule toy de tous les ennuis
 Qu'on y a les jours & les nuits:
 Tandis qu'aux champestres delices
 Mon Dorat & moy (loing des vices
 Qui foisonent dans les citez)
 De sainte fureur incitez,
 Nous nous jouons, au populaire
 Nous plaisâns sur tout de deplaire,
 Qui meprisant la verité
 Va beant à la vanité.

Il nous plaist chercher les montagnes,
 Et loing de là voir les compagnes:
 Aux campagnes nous descendons
 Dou les montagnes regardons.
 Tantost par la verdure gaye,
 Couuers de la palle saussaye,
 Nous allons pourmener nous deux
 Alentour de ces prés herbceux,
 Où paissent les vaches penchantes
 L'herbe lentement arrachantes,
 Tandis ques les gais pastoureaux
 Font retentir leurs chalumeaux.
 Au son les gentes pastourelles
 Foullent les herbetes nouvelles,
 Trepignans d'un folastre pié,
 En un rond par les mains lié.
 Souuant pour à leur ris entendre
 Le bestial nous voyons tendre
 Leurs musles leuez pour les voir
 Sans des prez se ramener voir.
 Et pour mieux les heures seduire

Nous auons coustume de lire,
 Ou les vers qu'Ouide a sonnez,
 Ou ceux qu'Horace a faconnez,
 Ou les raillardes chançonnettes
 Que le Syracusain à faittes,
 Ou du Berger Latin les chants
 Qui monstrent le labour des chams.
 Tantost mucez dans vn bocage,
 Tantost du long d'vn frais riuage
 Sous l'ombre palle aux saules vers
 Nous pourpensons quelques beaux vers,
 Qui desiront bien les journees,
 Les mois & les longues annees,
 Si vne des neuf doctes sœurs
 Les a confis de ses douceurs.

Si quelque repentir, Estienne,
 Te remord, qu'aux chans on reuienne:
 Qu'on lessé en son aduersité
 Aucc ses troubles la cité.

A MONSIEVR DE NOYON
 ADVOCAT EN PARLEMENT.

NOYON, qui bien voulu des Musés,
 Pour t'en faire meilleur en vs,
 T'armant d'vne ferme valeur:
 Qui sçais le blanc du noir conoistre,
 A l'estre non à l'aparoistre,
 Iugeant de l'heur & du malheur.
 Qui te retirant du vulgaire,
 Sçais bien choisir ce qu'on doit faire,

Pour se maintenir doucement:
 Qui gardes la pure justice,
 Loin de souffrete & d'avarice,
 Vivant bien & heureusement.

Si tu veux, tu tiens l'industrie
 Pour honorer ta noble vie,
 Par doctes & rares écrits.
 Du sçavoir, ami, tu n'as faite:
 Mais ie croy qu'en ton âme caute
 De nostre vain nom tu te ris.

Qui par nostre sotise sommes
 Cognus quasi de tous les hommes,
 Parquoy nostre aise est empesché.
 Heureux, qui le bon sçait élire !
 Heureux de qui mort on peut dire,
 En bien vivant il s'est caché.

Ne fust que la forte Fortune,
 Contre mes desirs importune,
 A violenté ma raison,
 Yusse fait chous de telle vie,
 Loin des soupçons & de l'envie,
 Loin des faux biens & de traison.

Mais quoy ? De ne sçay quelle sorte
 Le sort de mon propos m'emporte,
 Douè ie ne puis me recourir.
 Plustost que languir miserable
 M'a falu me faire enviable
 Laisant ma fortune courir.

Par vne tardive influence,
 Des Grands j'aqui la cognoissance:
 A vous, Muses, j'en suis tenu.

IIII. LIVRE DES PASSET.

*Quand me tirant du populaire,
A mes Princes m'avez fait plaire,
Qui m'ont par bienfaits retenu.*

Jamais ingrat ie ne puis estre:

*M'ayans fait leur bonté paroistre,
Mon bon cœur ie temoigneray.*

*Les Graces par tout j'en veu rendre:
Et pour les faire au loin entendre,
Vn bel œuvre desseigneray.*

*Plongé dans la Cour ie me treuve,
Auanture qui m'est bien neuve:*

*Et qui me contraint confesser,
Qu'en la plus part la vie humaine
Au gré de fortune se meine,
Qui nous fait nos desseins laisser.*

*Là tout nouveau ie me comporte
Maintenant ma raison plus forte,*

Radressant ma fortune d'art:

A fin qu'elle me fauorise

En ma valeureuse entreprise,

Que j'ose poursuiure gaillard.

NOYON, si tu prises la France,

Si tu detestes l'ignorance,

Si de mon parti tu te rans:

Employe ta langue diserte,

Et garde mon droit de la perte,

Contre les malins ignorans.

FIN DV QUATRIEME LIVRE
DES PASSETEMS.



CINQUIEME LIVRE

DES PASSETEMPS DE

IAN ANTOINE DE BAIFF.

A MONSIEVR DE

GRAMMONT.



*A S, las, par les mois les annees,
O GRAMMONT, & par les journées
Les mois se derobent glissant:
Les jours par les heures échapent:
Par moments les heures se frapent:
Et nous en alons perissant.*

Ce n'est rien nostre âge fuiarde:

C'est vn point, si on la regarde

A l'égard de l'éternité.

Depuis qu'vne fois morts nous sommes,

Aussi morts que les premiers hommes,

A vons fait le cours limité.

Mais nous, à qui la foyble vie

Passé & vole si tost rauie:

Nous que Dieu doüa de raison,

Pour nous seruir à nous conduire,

Ce peu que le jour nous doit luire,

N'en vsons en nulle saison.

V. LIVRE

Toujours en tout l'ame tant belle,
 Semence du ciel immortelle,
 Mise à mépris par le mortel,
 Au cors ne sert que de saumure,
 Pour le garder de pourriture,
 Comme le lard dedans le sel.

Beaucoup, non au bien nécessaire,
 Mais l'employent pour se mal-faire
 S'entremachinans mille maux,
 Ou par procez ou par rapines:
 Ou pour opinions malines
 Prenans inutiles travaux.

Aucuns cherchans la gloire vëne
 Plustost que doctrine certëne,
 Pour bien sçauans seront tenus:
 Qui, souuent cachant ce qu'il pansent,
 Des propos étranges auansent
 Contre l'ancien mainiens.

Ainsi par fole outrecuidance
 Troublent du vray la cognoissance,
 Et la foy de la verité,
 Par dispute au vray bien contraire
 Les simples cœurs venans distraire,
 Ebranlez de l'antiquité.

La plus part de ceux qui debatent,
 Ainsi que des bestes combatent,
 Pour rester vainqueurs en effet:
 Non pour choisir ou pour aprendre,
 Ce qui de vroit meilleurs nous rendre,
 Et d'entandement & de fait.

De là vient que nous pauures hommes

Malement foruoyez nous sommes,
 Ne plus ne moins que les moutons
 Qui sautent quand vn autre saute.
 Aussi nous en plus d'une faute
 A patron souuent nous sautons.
 Asses pour s'enrichir trauaillent
 Creignans que les biens ne leur faillent,
 Et veulent viure seulement:
 Mais de chercher & de poursuiure
 Le certain moyen de bien viure,
 Ils n'y labeurent nullement.
 Il cognoist au fort de l'affaire
 Ce qui luy manque pour bien faire,
 Qui souffre sentant le besoin.
 Si tost qu'il part de la detresse,
 D'un orgueil insolent il leesse
 Du bien le desir & le soin.
 Qui pour le branle du nauire
 Non acoutumé, du cœur tire,
 Changeant du nauire à l'esquif
 De son mal tousiours s'accompagne:
 Qui fascheux le present dedaigne,
 L'éloignant n'en est moins plaintif.
 Vn Tersite n'est pas abile
 Pour vetir les armes d'Achile:
 Iamais bien ne s'en armeroit.
 Les armures de l'esprit sage
 Ne donne au lourdaud ou volage,
 Qui malement s'en aideroit.
 Qui veut courageux entreprendre
 Au port de la vertu se rendre,

V. LIVRE

Comme son Itaque cherchant:
 Fuie les voluptés mondaines,
 Comme les chansons des Sirenes,
 Qui les vont au mal alechant.
 C'est fort grande rejouissance
 A voir l'entiere jouissance
 De ses beaux souhets & desirs:
 Mais j'estime grace plus grande
 Au vertueux, qui se commande
 De n'aimer qu'honestes plaisirs.
 Mesure le bien à l'usage.
 Qui liberal modeste & sage
 Sa richesse dispensera,
 Je le tiendray pour le plus riche,
 Non le vilain taquin & chiche
 Qui plus de biens amassera.
 Malade il est le miserable
 De pauvreté non secourable.
 Il est pauvre, non de l'avoir,
 Mais dedans son ame peruersé,
 Qui les biens à tās boulle versé,
 Et n'en sçait faire son deuoir.
 Qu'on le confesse où qu'on le nie,
 La vilenie est vilenie,
 L'honneur honneur, le tort est tort:
 Arachons de nous l'ignorance,
 Maudite racine & semance
 Du fruit, qui nous donne la mort.
 La personne bien saine & forte,
 Aisément l'injure suporte,
 Ou soit du froid ou soit du chaud:

*La raison en l'ame bien saine,
Courroux, douleur, joye incertaine,
Sçaura moderer comme il faut.*

SVR LE LIVRE DES
MEDITATIONS.

A G V I T O T.

CE liure tout diuin pour d'âge en âge viure,
N'a besoing d'un sonnet qui soit de ma façon:
Guitot il ne faut point au bon vin de bouchon,
La vie doit venir de la bonté du liure.
Quel argument plus beau peut on choisir & suiure,
Pour l'homme chrestien en tems d'affliction,
Que des vrais zelateurs de la religion,
Les discours consolans que ton liuret nous liure?
Venez (ô vous élus) qui en pure pensée,
Adorez ce grand Dieu pere de l'univers:
Icy sa voye sainte est clairement tracee.
Icy de son secours vne ame renforcee,
Repousse les assauts de l'ennemy peruers:
Et la terre quiçtant vole au ciel élancee.

A MONSIEVR DE SAINT
GOVARD AMBASSADEVR VERS
LE ROY D'ESPAGNE.

LA grand montagne Pyrenee,
Le tems, ny l'espace des lieux,
Dont ta personne est éloignée,

V. LIVRE

De moy ne t'ont fait oublieux:
 Mais vne gaye souuenance
 De Baif, qu'il te plaist aimer
 En absence autant qu'en presance,
 Font que ie veu te renommer.
 Saint Gouard, qui d'vne amour viue
 Cheris & cherches la vertu:
 Et qui d'vne bonté naïve
 Tousiours le vice as combatu:
 Par tout à ton Prince fidele
 Par mer & terre as voyagé:
 Mesme dans le peuple infidele,
 D'vn Zele bon encouragé,
 Tu visitas la terre sainte
 Et le saint Sepulcre, où lon mit
 L'humanité mortelle éteinte,
 Qui morte en grace nous remit.
 Toy, comme vn Vlysse qui erre
 Pour les meurs des hommes sçauoir,
 Et s'en aider en paix & guerre,
 La Grece & l'Asie alas voir.
 De là retourné dans la France
 Tu fus honoré de ton Roy:
 Qui ores pour ta suffisance,
 Et ta nonchancelante foy,
 Te tient au pres du Roy d'Espagne
 Pour son loyal ambassadeur:
 Où la vertu qui t'accompagne
 Iette vne belle resplendeur:
 Soit que d'vn gracieux langage
 Des propos tu sois discourant,

Que l'Espagnol acort & sage
 Tout entemif voise admirant.
 Soit qu'une atrempance louable,
 Et ta rare sobrieté,
 Te rende sur tout venerable,
 T'aquerant nom de sainteté:
 Là tu fais honeur à nostre âge,
 Et prouues qu'entre les François,
 Tant ne regne encores l'outrage,
 Qu'à la vertu prompt tu ne sois.
 Dont ne seroyent nulles nouvelles
 Cent ans apres nous, Sain-gouard,
 Si des neuf sçauantes pucelles
 Baif qui t'aime n'auoit l'art.
 Qui en souuenance du liure
 De Marc que luy as enuoyé,
 Le sien, où ton beau nom doit viure,
 Pour étrenes t'a renuoyé.
 Lequel tu prendras en excuse
 De quoy ie ne t'écry souuent:
 D'autant que c'est luy qui m'amuse,
 Son impression poursuiuant.
 S'il est digne de comparoître
 Entre les Castillans polis,
 Des Castillans fay moy conoitre
 Pour nourrisson des fleurs de Lis.
 Ils verront des Princes de France
 Les noms en mon liure honorez:
 Et conoitront que l'ignorance
 Tous les François n'a deuorez.
 Si le Roy d'Espagne desire

V. LIVRE

Par mes écrits veindre les ans,
 Ses honeurs ie sçauray bien dire
 Bien honoré de ses presans.

Toy, qui m'es amy, bon & sage,
 Fay luy mon present d'heure & d'heur:
 Prescrire n'en faut le langage
 A Toy royal ambassadeur.

Ce n'est pas que ie luy demande:
 Ie suis hors de necessité:
 Mais que mon Roy me le commande,
 I'en seray bien tost aquité.

S'il faisoit en ce tems barbare,
 Ce que jadis faisoit vn Roy
 Pour Simonide & pour Pindare,
 Ce qu'ils faisoient ie luy feroiy.

Voire (chose qui n'est qu'en France)
 Des chants de la mesme façon,
 Et de mesure & de cadance,
 Selon l'ancienne chanson.

Hardiment de cela te vante,
 Dy que nous sommes les ouuriers,
 Qui telle musique excelante
 Renouuelons tous les premiers.

Dequoy faut que l'honneur se rande,
 Que nos Princes ont merité:
 Desquels nostre gaillarde bande
 Gouste la liberalité.

POVR CLAVDE LE CLERC
A DAMOISELLE IANE DE
SAINTE CHRISTINE.

EPI TAPHE.

TOy de qui j'esperoy jouir en bon ménage,
T'ayant pour mon épouse, en la fleur de ton âge
Vne enuieuse mort vient à moy te raurir,
Et fraudant mon espoir ne me fait te suiuir !
Tu es morte, & ie vi, si c'est viure sans vie:
Car ma vie tu fus. O destin ! O enuie
Contraire à nos souhets ! Au moins que j'usse l'heur,
Quand tu rendis l'esprit (soulas à ma douleur,
Piteux, mais désiré !) Pour le moins que l'heur j'usse
D'auoit esté présent ! Car si présent j'y fusse
De mes lévres aumoins sur tes lévres alors
Le reste des esprits que tu jettois dehors,
Las ! j'usse recueilly. Lors mon âme meslee
Peut-estre avec ton âme au ciel s'en fust volée.
Tant heureux je ne suis. Pour tout reçoÿ mes pleurs,
Les fleurs de nos desirs, les fruits de mes douleurs.

D E L'ENTREE DV
ROY CHARLES IX.

ENtre heureusement, ô grand Roy de la France
Dans la grande Paris Royne de vos citez.
Paris ouvre tes bras. Seine & ses Deitez,
Baissant leurs verdes eaux, facent réjouissance.
Campagnes & forests d'une gaie esperance

IIII. LIVRE

Reprenez vos honneurs. Toutes auersitez
 Soyent mises en oubly: De plaisir incitez
 Faison d'entiere joye heureuse demontrance.
 O Paris, dans tes murs, Le bon CHARLE ton ROY,
 Beau sur vn beau cheval, en trionfant arroy,
 D'armes enuironné, va faire son entree.
 Les armes cesseront entre les citoyens.
 Mais si quelque mutin ose ataquier les tiens,
 O CHARLE, la deffence aux armes est montree.

DV IOVR DE L'ENTREE.

Voyez rir le ciel d'une clarté serene:
 Voyez le fleuve clair qui desenfle ses eaux:
 Voyez rebourgeonner les seveux arbrisseaux:
 Voyez reuerdoyer la montagne & la plaine.
 Voyez le doux souleil, qui du printems ramene
 La gaillarde saison. Ecoutez des oiseaux
 Qui réjouissent l'air mille motets nouveaux:
 En l'honneur de mon Roy la joye se demeine.
 Mon ROY fait dans Paris sa magnifique entree:
 Alegresse par tout nous voyons demontree,
 Presage bien-heureux de meilleure saison.
 Regne la pieté, fleurisse la justice:
 Vertu soit en honneur, à mépris la malice:
 Defaille la fureur, commande la raison.

DES PASSETEM S.
A V A N T V R E S
D E S D A M E S.

117

PVIS que demandeZ par plaisir
L'auanture au ciel ordonnec,
SçacheZ que vain est le desir
Qui veut forcer la destinee.

Qu'heureuse seroit vostre vie
Si pouuiez seule la mener:
Fuiiez fuiez la compagnie
Qui tant de maux doit amener.

Vous faites refus de vostre aise
Et pourchasseZ vostre maleur.
GardeZ qu'vn jour ne vous deplaise
Ce qui plaist tant à vostre cueur.

Vostre beauté qui est si fiere
Rabaissera fort son courage,
Quand vne volonte legiere
Vous bridera du mariage.

Haïssant celuy qui vous aime,
Vn qui vous hait alleZ aimer:
Autant fait de profit qui seme
Dedans les vagues de la mer.

V. LIVRE

Ne vous plaignez de jalousie
 Ou vous plaignez d'estre si belle:
 Car tousiours la beauté martelle
 Des mieux aimans la fantaisie.

C'est vostre bien & non pas vous,
 Que ce beau seruiteur courtise:
 Celuy qui tant vous fait le doux
 Vous cuira quand vous aura prise.

Vous faites bien fort de la fine:
 Vous éprouuez, vous refusez,
 Et mille amans vous abusez.
 Gardez-vous qu'un ne vous affine.

Quand l'airein argent deviendra,
 Alors vostre facheux seruage,
 Son cours rigoureux ne tiendra
 Contre l'or d'un plus heureux âge.

Les fleurs de vostre primevére
 Vous n'aucz pas laissé fleurir,
 Ny vos fruits en été meurir:
 L'hyver vous ne scaurez que faire.

Vous vous alaitez d'esperance,
 Vous consumant d'un vain desir:
 Faute d'auoir bien sceu choisir,
 Vous tomberez en repentance.

Vn torrent de larmes s'apreste,
 Vne tempeste de soupirs,
 Vn mont-gibel de chauds desirs,
 A qui vos beaux yeux feront feste.

Montez dans le coche atelé
 De blancs chevaux, & demandez:
 Vostre cœur sera consolé
 De plus que vous ne pretendez.

Vous estes dans vn carrefour,
 Et ne sçavez quel chemin prendre.
 Marche: car dans vn beau séjour
 Tous les chemins vous peuuent rendre.

L'entreprise est trop auancee,
 Il ne faut plus tirer arriere:
 Si allez changer de pensée
 Vous acquerrez nom de legiere.

Il n'est pas à chacun loysible
 D'aprocher tant les Deitez:
 Il vous pourroit estre nuisible,
 Si vne fois les irritez.

Bien que soyeZ deparagée,
 Vous n'y perdieZ: vostre bon heur,
 Vous montrereZ auantagee.
 En vous seule gist vostre honneur.

V. LIVRE

L'estoc se mourra desché,
Le beau sion reuerdira.
L'ombrage plus ne luy nuira,
Dont il souloyt estre empesché:

Bien heureuse la jalousie
Qui s'enflamme avec si grand heur,
Vne etincelle est amortie
Par vne grande resplendeur.

Combien que soyeZ engagee
Ne feigneZ de vous retirer:
Vous pouuez estre auantagee,
Vostre sort ne peut empirer.

Qui a bon bruit, on a beau faire
Tout ce qu'on veut, nul n'en médit:
Qui a mauuais nom à credit,
Le monde ne peut faire taire.

Vous ne sçauuez cueillir les fleurs
Que vostre beau printemps vous donne.
Mais les fruits en seront meilleurs
Que vous cueillirez en Autonne.

Que vous estes bien deplorable
De ne sçauoir le bien choisir!
Fuiez le plaisir miserable,
Qui n'apporte que deplaisir.

Vous iouïrez, ie le deuine,
 Le danger est à l'enuiron.
 La rose n'est point sans épine,
 Ny l'aigle sans piqueron.

Vous raillez, vous souriez:
 Et n'aimez rien que vous mignone.
 Si vous ne vous apariez
 Tirant à tous n'aurez personne.

Quand l'eau recourra vers la source,
 Quand l'huyet en aisté fera,
 Quand les cieux changeront leur course,
 Ce que vous pensez se fera.

Vostre cœur de grands maux endure,
 Pour cela rien n'auancerez.
 Alors que moins y penserez
 Viendra vostre bone auenture.

Si la fortune vn petit lente
 Ne vous rit si tost que voulez,
 Endurez, ne vous en doulez:
 Dautant vous fera plus contente.

Ce doux desir qui vous allume
 Vous travaille (j'en suis bien seur.)
 On ne merite la douceur,
 Qui n'a goûté de l'amertume.

V. LIVRE

Il semble que vous regrettiez
Ce qui vous fait honneur à honte:
Auisse que ne regrettiez
Ce dequoy vous ne faites conte.

Usez de l'heur en la jeunesse,
Vous ferez bien si m'en croiez:
Vous aiderez de la sagesse,
Mais que sur l'âge vous soiez.

Vous aucz plus d'une entreprise
Pour les cœurs des hommes surprendre:
Mais gardez vous qu'en voulant prédr.
Vous mesme ne vous trouviez prise.

Tel tient la bride & la courroye,
Qui vuidera bien tost l'arçon.
Tel rit, gaudit & n'a que joye,
Qui dira piteuse chanson.

Après la pluie le beau tems,
Après le beau tems vient la pluie:
L'heure vient (vostre pleur s'essuie)
Qui fera deux Amans contens.

Où fuiés-vous pauvre étrangere
Cherchant à vostre âme repos?
Pensez vous estre assez legere
Pour vn qui porte ailes au dos?

Faisant

Faisant les fautes aprendreꝫ,
 Vous courrant fereꝫ découuerte.
 Vous prendreꝫ ceux que vous perdreꝫ,
 De ceux que prendreꝫ fereꝫ perte.

Vous vous plaignés des inconstans,
 Dont la flamme tost allumee
 Ne dure que bien peu de tems.
 Aimeꝫ si vouleꝫ estre aimee.

Ce qui vous fait tant languoureuse
 N'est que vostre grande bonté:
 Heureuse heureuse, ô trop heureuse,
 Si n'auieꝫ point de volonté.

Vous faites volontiers la feste
 A ce paladin écolier.
 Que ferez vous de cette beste?
 Lon dit qu'il n'est franc du colier.

Maudit soit l'honneur qui vous couste
 La perte de tant de plaisir?
 Le vain bruit d'un vent vous dégouste
 Du bien que vous pourriez choisir.

Ta beauté de graces ornée
 Est d'une longue & belle dance
 De seruiteurs enuironée:
 Et tu es pauvre en abondance.

V. LIVRE

Dequoz vous pouués-vous douloir,
Sinon de ne sçauoir choisir?
Rien ne vous faut que le vouloir
Pour contenter vostre desir.

Vous cherisséz tant l'artifice
Que mepriséz le naturel:
Ensuire nature n'est vicos
La corrompre est cas criminel.

Beauté qui est acompagnée
D'orgueil seure audacieux,
Demeure à la fin dedaignée.
Amour niche au cœur gratioux.

Vous aimez vn qui ne vous aime,
Vn vous aime que n'aimez pas:
A bon change lon rand de mesme:
Ce sont d'amour les beaux ébas.

si cherchez le ferme bonheur,
Cherchez-le tardiu en pensée:
Mais hastier faut pour vostre honneur
L'entreprise bien-comencée.

Auare craignez d'encourir
Diçette dont n'aurez diçette:
Micux vaut en depence mourir,
Que viure tousiours en souffrète.

Recherchez l'air la terre & l'onde
 Cherchant le souverain plaisir:
 Il n'est rien si plaisant au monde
 Que de jouir de son desir.

A V R O Y.

O Grand ROY, votre Poëte,
 N'ayant rien que vous donner,
 Sinon l'heur qu'il vous souhete,
 Vous vient du votre êtrener.
 Vous sereZ donc êtrené
 (Si j'ose tant entreprendre,
 Et vous plaiſt en gré le prendre)
 De votre nom retourné.

CHARLES MAXIMILIAN

DE VALOIS.

ANAGRAMME.

AN, M, D, LXVIII, A LE
 ROY CHASSEMAL.

CHARLES MAXIMILIAN
 L'honneur du sang de VALOIS,
 Sera l'Hercule Gaulois:
 Car ſon nom porte que L'AN
 M. D. LXVIII,
 Par un preſage fatal,
 AURA LE ROY CHASSEMAL,
 Deuant qui le mal s'enfuit.

Hercule tant renommé
 Des monstres le ruineur,
 Des Grecs en titre d'honneur
 Fut CHASSEMAL surnommé.

Face Dieu que mon grand ROY
 (Remetant sus la vertu,
 Domtant le vice abatu)
 Donne à ce presige foy,
 Tant que ce braue surnom
 De CHASSEMAL merité
 Voysé à la posterité,
 Ornant de Charles le nom.

AV SEIGNEVR IAN BA-
 TISTE BENCIVIEN ABBE DE
 BELLEBRANCHE.

LA Muse Toscane regréte,
 BENCIVIEN, ton ame distrcte,
 Comme de son cher enfance:
 Se plaignant que la seruitude
 De la Cour amoindríst l'étude
 De toy son docte nourrissant,
 Mais l'amour de la Poésie
 Apparoist en ta courtoisie,
 Quand tu cheris ceux du métier;
 Et pour faire gouster les graces
 De ta Royne, tu les embrasses
 D'vn racueil doux & cœur entier.
 Tu es vraiment digne de viure
 Immortellement dans mon Livre
 BENCIVIEN, bien sois-tu venu.

Voicy la dissettième année,
 Que par vne amitié bien née
 Je t'ay premièrement connu.
 Ce fut lors que la bonne tréve,
 Heureuse aux François, mais trop brève,
 Fut jurée par les Flamens
 Dans le royal séjour d'Amboise,
 Lors que la nation Gauloise
 L'uisoit en tous ses ornemens.
 Moy lors à la Cour bien novice,
 Je gardois vn dangereux vice
 De la honte desur le Front:
 Cette honte à mon bien contraire
 Par vn dépit me vient distraire,
 Et ma belle entreprise romt.
 Et dix ans depuis s'en alerent,
 Qui sur moy sans profit coûterent
 Tout mon meilleur âge perdu:
 A la fin reprenant courage,
 Ou d'un sort ou d'un avis sage,
 A mes Princes me suis rendu.
 Mais vn vouloir naïf m'entline
 A ma Princesse CATERINE,
 Bonne MERE de nos bons ROYS,
 ROYNE en cent vertus excellente,
 De qui les beaux honneurs ie chante
 De mon liure aux plus beaux endroits.
 J'ay sur tout recherché sa grace,
 M'assurant que jamais sa race
 Elle ne pourroit dementir,
 Sa race l'apuy de la Muse:

V. LIVRE

*Et l'honorant je ne m'abuse
Pour en attendre vn repentir.*

BENCIVIEN, l'heure bonne épie,
*Que les vers que je luy dedie,
De bon œil elle deigne voir:
A fin vn jour, comme elle est bonne,
Que son Poëte elle guerdonne,
Qui ne manque de son deuoir.*

**SUR LE MEDAILLON
D'ALEXANDRE:**

**ET L'ESCELLE D'ARGENT
TROUVEZ A CHARLEVAL**

Où est la face d'Alexandre est écrit:

Α Α Ε Χ Α Ν Δ Ρ Ο Σ Α Λ Ε Χ Α Ν Δ Ρ Ε .

Au reuers où est vn char trionfal tiré par quatre Elephans, & dessus assis Alexandre ayant à ses piés vne esclauie les mains liees & enchainees sur les reins.

Π Ε Ρ Σ Ι Κ Η Α Λ Ω Θ Ε Ι Κ Η .

PERSE CAPTIVE.

SONET.

SIRE, j'oseray bien plein de bonne esperance
Presagir tout bon heur à vostre magesté.
Outre ce medaillon qui vous est aporté,
L'escuelle d'argent m'en donne l'assurance.

C'est honneur & soulas pour vous & vostre France.
 Vostre ennemy sera de chaisnes garoté:
 Vous en trionferez luy ostant liberté:
 Vostre peuple ornerez de ioyeuse abondance.
 L'écuelle d'argent, parement de la table,
 Denonce qu'en festins pleins de bien-heureté
 Ferez cueillir les fruits d'une paix riche & stable.
 Le Medaillon d'argent où le grand Alexandre,
 De la Perse vainqueur, en trionse est porté,
 Deffand à l'étranger contre vous entreprendre.

A MONSIEUR
 DE SAINT SYPHICE.

SAINTE SYPHICE la bonté nette,
 Et des meurs la grace parfette
 T'a mis pres du DUC d'Alençon:
 Comme pour exemplaire adresse,
 Où sa genereuse jeunesse
 Prist vne courtoise façon.
 Bien-heureux ie te vante d'estre
 Pres d'un Prince que voyons croistre
 Tous les jours en dignes vertus.
 Bien-heureux, quand je te voy Pere
 D'une jouvence qui prospere,
 D'Enfans de valeur reuetus.
 O combien vaut la biennaisance,
 Qui prend sa facile accroissance,
 Au bien où l'esprit coule enclin.
 Car vne mauuaise nature
 A peine par la nourriture

V. LIVRE

Redresse vn courage malin.
 Mais du plant de ta bonne race,
 Les vns croissent en toute grace
 Pres du sang Royal favoris:
 D'autres au giron des neuf Muses,
 Reçoivent leurs douceurs infuses,
 Desous leurs ombrages nourris:
 Pour seruir vn jour à nos Princes,
 Dans les étrangères prouinces,
 Ou dans le Royaume employez:
 Qui en guerre de leur vaillance,
 Qui en conseil de leur prudance
 Montreront les dons déployez.
 Ainsi ta vertu tousiours viue
 En leur gentillesse naïue
 Reluira ne s'éteignant pas:
 Et si j'ay quelque faueur bonne
 De la Muse, vn don ie te donne,
 Qui sauue ton nom du trépas.
 Du soleil la douce lumiere
 C'est vne plaisance treschiere:
 La mer calme est riante à voir,
 Et la saison re florissante,
 Chose n'est tant rejoyissante,
 Que des fils qui peut en auoir.
 Les filles en leur aliance
 Donnent quelque réjouissance,
 Mais souuent eteignent le nom.
 Les enfans masles qui en sortent,
 Et qui le nom gardent & portent,
 Sont les piliers d'vne maison.

Je te loü', Sage Saint-Suplice,
 Qui par ce tems plein de malice,
 Quand les Musés ont moins d'honneur,
 Fay tes fils aux lettres instruire,
 A fin qu'ils sçachent se conduire
 Par les malheurs au vray bonheur.

Vrayment la Françoisé noblesse
 Fait tort à sa belle jeunesse
 D'aborrer des Musés le fruit:
 Croyant à sa honte & domage,
 Qu'elles abatent le courage,
 Acouhardissant qui les suit.

Estoit-ce vn poltron qu' Alexandre,
 Pour qui Filippe degna prendre
 Aristote pour precepteur?
 Ce grand guerrier qui souloit fêre
 Son oreiller du bon Homère
 Pour estre meilleur combateur?

César fondateur de l'Empire,
 Qui sçauoit aussi bien écrire
 Comme de la Milice l'art:
 Qui renuersa tant de murailles:
 Qui vainquit en tant de batailles
 Le tient on pour homme couhard?

Luy vaillant maistre de la guerre,
 Par soudars neZ en vostre terre,
 Vainquit vos vainqueurs sés Romains:
 Sage & sçauant par sa prudance
 Bien conduisant vostre vaillance,
 Rangea tout le monde en sés mains.

Et montra que, si la sagesse

V. LIVRE

Ornoit des doctes Chefs l'adresse,
 Entre les François genercux,
 Nous fonderions l'Empire stable
 Sur toute la terre abitable,
 Non moins sçauans que valeureux.

AV SIEVR ANDRE' THEVET,
 COSMOGRAPHE DV ROY.

THEVET, qui trauersant & les mers & les terres
 Tout le monde alas voir sous le cours du Soleil,
 Depuis l'Hesperien à l'Indien reueil,
 Où desireux d'apprendre & courageux tu erres:
 Dou sauve retourné, diligent tu enserres
 En vn volume beau tout ce qu'a vu ton œil:
 Veritable temoin, d'un labeur nonparcil,
 Rendant aisé le fruit qu'en public tu desferres.
 Nous voyons les citez: les états nous sçauons:
 Par ton liure des lieux la cognoissance a uons,
 Des montagnes & bois, des mines & riuieres.
 Nous te deuons vn bien, Que loin de tout danger,
 Sans éloigner sa terre au païs étranger,
 Des hommes nous voyons les loix & les manieres.

A MONSIEVR GARNIER,
 CONSEILLER AV SIEGE PRE-
 SIDIAL DV MANS.

ENcores nous oyons les furies d'Ajax,
 Et les cris depiteux de l'accort Promethee,
 Et le jaloux courroux de l'ardante Medee,
 Et du chaste Hippolyt l'exécrable trespas.
 Au Theatre François gentil Garnier, tu as
 Fait marcher grauement Porce à l'ame indomtee:

Si la Muse Gregeoise est encor escoutee,
 La tienne pour mille ans ne s'amortira pas.
 Où que tu marcheras, sous tes piés de la terre
 Puisse t'encourtiner le verdoyant lierre,
 Pour l'honorable pris de ta graue chanson:
 Garnier, sous honoré (s'il reste dans la France,
 Pour les rares ouvrier honneur & recompance)
 Comme des Musés Sœurs le plus cher nourrisson.

P O U R M O N S I E U R
 D E B O N N I V E T .

MAitresse à qui ie suis, quand de mes mains ie livre
 Entre vos blanches mains ce liyre qui est blanc,
 C'est vne carte blanche, où j'écri de mon sang
 Que de vous & non d'autre a voüé ie veu viyre.
 Vous, Belle, qui vivez de tout soucy deliyre,
 De tous vos seruiteurs les passions de ranc
 Vous y ferez coucher: Las, moy seul en mon flanc
 L'en ay plus que n'en peut contenir votre liyre.
 Que chacun hardiment y note sa pensee,
 Y decriue sa flamme, y peigne ses desirs,
 Le nourri plus de foy dans mon cœur amassée.
 Qui sera par sus tous vn jour recompensee
 Du loyer mérité des amoureux plaisirs,
 D'autant que mon amour la leur a surpassée.

A M O N S I E U R D E P I B R A C
 A D V O C A T D U R O Y E N
 P A R L E M E N T .

MAIS que les Musés mignonnetes
 Me fournissent de chansonnetes,
 Par lesquelles j'aquiere honneur,

V. LIVRE

Heureux me moquant de l'enuie,
 Et chassant la faim de ma vie
 Par vn bon ROY mon guerdonneur.
 Et que me faut-il dauantage
 Pour doucement couler mon âge?
 A quoy plus voudroy-ie aspirer?
 Bien que j'usse la suffisance
 Pour treter des faits d'importance,
 Petit ie me veu retirer.
 N'atendez que ie me surcharge
 De quelque si pesante charge,
 Qui me pust sous elle acabler:
 Ie louroy Dieu de ma fortune,
 Sans que haue ie l'importune,
 Taschant sans fin de la doubler.
 O DV FAVR, si nous pauvres hommes,
 Qui jamais assouvis ne sommes,
 Avions à viure par deux fois:
 L'une fois en douce lieffe,
 Et l'autre en amere tristesse,
 Trauersant nos jours & nos mois:
 Ion iroit aleure (peut estre)
 (Portant la fortune fenestre
 Par vn viure plein de trauaux)
 Pour la mener en chiere lie,
 A franchir la seconde vie
 De soin de tourments & de maux.
 Mais si Dieu n'a fait tant de grace
 A la chetiue humaine race,
 Qu'ell' ust à viure plus d'vn tems,
 Vn tems de petite duree

D'une vie moins assurée

Qu'une tendre fleur du Printems:

Ah nous malheureux ! pourquoy est-ce,

Que nous souffrons telle détresse,

Nous forçons nous mesmes en vain?

Jusqu'à quand afamez de rage

Banderons-nous nostre courage

Sans mesure tirant au gain?

Et tandis nous faisons la perte

De nos bons jours, qui est couverte

Sous un faux bien que poursuivons:

Et nous oublions pauvres hommes,

Que sujets à la mort nous sommes,

Qui rien de certain ne vivons.

C'est pourquoy me contenant d'heure

Dans ma peau content ie demeure:

Et si j'aprouche la Grandeur,

Comme du feu ie m'en aprouche,

M'y rechaufant sans que j'y touche,

Non ebloui de la splendeur.

O du Faur, la chaleur plaisante

Et non la brulure cuisante

Ie cherche en la Cour de nos Roys:

Ne faisant, comme à la chandele

La mouche, qui brulant son ale,

Y vole une dernière fois.

Tu les sers, Toy sçauant & sage,

Cognu par maint bon temoignage,

Pour loyal, & de cœur entier.

Moy puis que mon P R I N C E en fait conte,

En l'honorant ie n'auray honte

Faire des Musés le metier.

V. LIVRE
 EPITAPHE DE CATERINE
 IAKET EPOUSE DE IOACHIN
 TIBAUD DE COVRVILLE.

NVILLE mere ne croye en ce monde estre heureuse
 Pour s'assurer de l'heur. Ny santé vigoureuse,
 Ny se voir honorer, ny se voir prospérer
 Pour enfans & mari, ne doit faire esperer
 Vn heur certain icy. Ie me vis honoree
 Pour mes fils & leur pere : & presques adoree
 Pour leur belle chanson, qui les cœurs rauissoit
 Les nombres animant que Baïfourdissoit.
 Mais en plene santé lors que moins ie m'en doute
 Vne sievre, vn frisson puis vn chaud, me prend toute,
 M'atache dans le lit, emportant mes plaisirs,
 Ecartant mes espoirs, & frustrant mes desirs.
 La sievre froide & chaude enclose dans mes venes
 Me dessecha le sang par quatorze semènes:
 Puis elle me lâcha : mais elle me laissa
 Vn mal lent sans douleur, qui dans moy ne cessa
 Iusqu'au dernier soupir : Et ic n'u la pensèe
 La memoire & raison pour le mal offensee.
 Ainsi tout l'heur mondain en viuant ie perdi:
 Mourant l'esprit entier à mon Dieu ie rendi.

ELLE DECEDA LE XVI.
 DECÈMBRE M. CCCC. LXXII.

DES PASSETEM S. 126
A MONSIEVR DE MAR-
CHAVMONT SECRETAIRE
DES FINANCES.

CLAVSSE, j'ay fait vn bien gros liure:
Son bon Ange sçait s'il doit viure:
Mais tel par mon âge passé,
Pour du tout ne viure inutile,
Et m'essayer en diuers stile,
Ie l'ay fait, & puis ramassé.
Tel qu'il est pour mien ie l'a vouë:
Soit qu'on m'en blame ou qu'on m'en louë.
Il me plaist l'enuoyer au jour:
Mes vers tels qu'ils sont ie ne cache:
Et veu bien que mon siecle sçache
Qu'ils ont fait par trop long séjour.
Quatrefois cinq & trois annees
Se sont par les mois retournees,
Depuis que ie l'ay commencé:
Mais vn destin à moy contraire
Iusques icy m'a pu distraire
Que ne l'ay plustost auancé.
Il faut que non ingrat ie chante,
Comme la fortune mechante
M'en a distrait par pauureté,
Qu'ainsi par CHARLES debonaire,
Et ses bons Freres, & leur Mere,
Moy liberalement treté,
I'ay recu le loisir & l'aise,
(Soit que l'euvre plaise ou deplaise)
De recueillir tout mon labour:

V. LIVRE DES PASSET.

*Qui est tel que j'ose bien dire,
Qu'il se peut faire vn amas pire,
Plustost que d'en faire vn meilleur.
Il y a du bon en l'ouvrage
Qui peut contenter le plus sage:
Il y en a de moins parfait,
Quitrouvera bien à qui plaires
Il y en a qui ne vaut guiere:
Vn autre autrement ne se fait.*



AV LISEVR.

T*OY qui lis ces gais Passetems,
Rien graue de moy tu n'attens:
Ie le sçay bien. mais je te prie,
Si de ma gaye raillerie
En quelque mot te penses poind,
Penser que je n'y pensoy point.*

FIN DES PASSETEMS DE
IAN ANTOINE DE BAIF.





